


BAPAKOLAMI NA NTANGO YA SUKA

 Mbote, balandi bayoki. Sikawa tosolola na Nkolo na biso. Nzambe Monene, Mokeli ya likolo pe na nsé, Oyo asili kobongisela biso ngonga oyo na ntongo oyo, na lolenge ya Bonzambe, mpo na kokumisa Yo. Pe tika ete biso, Nkolo, na mitema na biso, tomipesa mobimba na mokano ya Bonzambe na Yo pe na mosala ya Molimo Mosantu kati na biso, mpo na kotalisa makambo oyo Yo olingi biso ete toyeba. Mposa na biso ezali kozala Baklisto malamumu koleka pe bantoma ya malamumu koleka mpo na Yo. Kokisela biso yango na ntongo oyo, wana tozali kotalela Yo, na Nkombo na Yesu Klisto. Amen.

Bokoki kofanda. [Moto moko alobi: “Olingi kotia pembeni bilamba ya mabondeli?”—N.D.E.] Iyo.

² Tozali na esengo mingi ya kozala awa lisusu na ntongo oyo, na—na mosala ya Mokonzi monene. Pe tosengi lisusu bolimbisi, mpo tozangi bisika ya kofandisa bato, kasi tozali bobele na . . . Tokomeka kosala nyonso oyo tokoki kosala, ata ndenge nini.

³ Sikawa, bato mingi bazali na miswále pe malombo oyo etiami awa mpo babondela likolo na yango. Pe nakotia yango naino pembeni; ezali te ete nákomona yango te, kasi nakobondela mpo na yango sima . . . nalingaka mingi-mingi . . . na mpokwa oyo, nakosala yango na ntongo oyo, pe lisusu na mpokwa, ntango, na sima nde nakobondela pe nakotalela Molimo na Nzambe mpo na lobiko na nzoto. Na ntango wana nde nasepelaka kobondela mpo na—na miswále pe makambo mosusu.

⁴ Pe mpo na oyo etali bosenga engebene ya moto na moto, Billy apesaki ngai yango, yango nyonso. Ezali pene na nkama misato, pe nauti kolongwa bisika yango. Bomoni, nakomeka kotala yango noki noki, moko moko na yango, oyo nakokoka. Pe nakomeka kotala yango na lombangu nyonso mpenza ndenge. Nakokoka kotala yango nyonso te. Kosembola kaka loboko, kozua moko, pe koloba: “Nkolo, ekozala nde *oyo*, pe *oyo*?” Bobele bongo, mpamba te ezali, bosenga, moko moko na yango, malombo mpenza; eloko moko oyo, na ntembe te, tosengeli kosolola elongo na ntina na yango. Pe na . . . Bobele soki, boyebi, ntango mosusu Molimo Mosantu akoki koloba likambo moko oyo natangaki, pe etikali na motema na ngai; nakozongela yango lisusu, pe nakolukaluka kino nakozua yango. Soki boye te, nakozua yango kozanga kopona.

⁵ Sikawa, tolingi pe koloba, na ntongo oyo, pe kopesa mbote na baoyo bazuami kuna na bituka mosusu ya ekólo. Tolingi kopesa mbote na bandeko na ntongo oyo na nzela ya telefone, na New York City; na Beaumont, Texas; na Prescott, Arizona; na Tucson, Arizona; na San Jose, na Californie; na Connecticut; na Gainesville, Georgie; pe na New Albany, Indiana; na ekólo mobimba. Topesi bino mbote na Nkombo na Nkolo Yesu.

⁶ Na ntongo oyo, na Indiana, ezali ntongo moko kitoko. Na butu eleki, mbula enókaki pe epesaki mpio. Pe tozali. . . Mongombo etondi meke, pe moto nyonso azali kozela na mposa makasi, liteya ya eteyelo ya Lomingo. Pe nandimi ete mapamboli ya Nzambe oyo eleki na bozui ekozala likolo na bino kuna.

⁷ Pe tozali kolikya, na ndenge ekokoka, koluka lo—lolenge oyo tokoka kozala na, esika oyo tokoki kosangana biso nyonso elongo, ntango mosusu na nse na hema moko ya monene, esika oyo nakomiyoka mpenza ete nakambami mpo na koteya likolo na Mbeki Nsambo ya suka kati na Biblia.

⁸ Bongo sikawa, mpo na koumela ntango molai mpenza te na oyo etali liteya monene na ntongo oyo. . . Nalukaki elongi na Nkolo, kokanisáká: “Nakoloba nini?” koyebáká ete oyo ekoki kozala liyangani na biso ya suka oyo tokoki kosala. Boyei na Nkolo ebelemi mpenza mpenza!

⁹ Namoni, sima na esakweli oyo epesamaki na Californie, ezali na bandako kuna, pe bisika ndenge na ndenge, ebandi kozinda na ntanka ya centimetre koleka ntuku misato na ngonga moko, mabaya ezali kopasuka pe kobukana. Pe bayebi te eloko nini ezali kosala yango. Tokómi na suka. Bandako ya ba-dollar nkoto monkama, ezali kozinda. Nazali na ba-titre minene ya ba-zulunale, bafotó, oyo nakolikya komema yango na mpokwa, lokola nalingi koloba likambo moko likolo na yango na mpokwa ya lelo.

¹⁰ Pe, lisusu, lelo na mpokwa tokozala na mabondeli mpo na babeli. Boya sima ya nzánga oyo, na ngonga ya mitano, ya motoba, to na ngonga nyonso yango. Tokobanda na ntango malam, nabanzi, mpo bato bakoka kozonga na ntango malam, pe kozua bakalati na bino ya mabondeli. Pe na mpokwa tokobondela mpo na babeli, soki Nkolo alingi.

¹¹ Sikawa, sima na ngai kokanisa na nzela ya mabondeli: “Nasengeli kosala nini?” Nayebi ete mokolo moko nakosambisama mpo na makambo nákoloba awa. . . Pe nazuaki mokano, to nakambamaki na Molimo Mosantu koteya na ntongo oyo likolo na esakweli, mpo na kopesa biso boyebi. Bomoni? Ezali likambo oyo biso. . . Soki toyebi yango mpenza te, pe likambo moko esalemi kaka na mpwasa boye, tosengeli koyeba na ntina na yango. Molimo Mosantu apesi biso yango, mpo tokebisa bato na makambo ezali koya. Boyebi, Biblia elobi, ete: “Nzambe akosala likambo te bobele ete atalisa liboso baombo na Ye,

basakoli.” Pe—pe ndenge Yesu akebisaki bato, na makambo oyo ekosalema; ndenge basakoli bakebisaki bato, na oyo ekosalema. Pe ebongi na biso sikawa, na ntango monene tozali kobika na yango, koyeba eleko nini tozali kobika na yango, pe nini éko- . . . pe nini ekosalema na eleko oyo. Boye moko na mateya ya kokamwa oyo ntango mosusu tosila kotanga mbala mingi, eyeli ngai na motema ko—kolobela yango na bato na ntongo oyo.

¹² Sikawa tofungola ba-Biblia na biso na Matai mokapo ya 24, pe tokotanga eteni moko ya Liloba. [Ndeko Branham abongisi mongongo—N.D.E.] (Bolimbisa ngai.) Ezali lolenge ya—ya kopesa ntina na motó ya liteya pe mokonza na biso.

¹³ Sikawa, bobosana te ete tokoteya yango lokola kelasi ya Biblia, malembe-malembe. Bokamata bikomeli na bino ná nkasa. Nakomaki biteni ya Makomi mingi awa, mpo—mpo bokoka kokoma yango. Na sima bozonga na ndako pe boyekola yango, mpo oyo ezali lokola kelasi ya eteyelo ya Lomingo, mpo tokoka koyeba, kokebisama pe komilengela mpo na mikolo tozali kobika kati na yango.

¹⁴ Kati na Mokanda ya Matai, [Ndeko Branham abongisi mongongo na ye—N.D.E.] (Bolimbisa ngai.) Molongó ya 24, to, mokapo ya 24, ezali nde, kobanda na molongó ya 15, nalingi kotanga eteni ya Liloba na Ye.

Bongo wana ekomona bino mbindo-na-libebisi ezali kotelema na esika na bulee, lokola na likambo lilobaki mosakoli Danyelee (tika ete motangi ayeba ntina),

Bongo baoyo bazali na Yuda bakima kuna na ngomba pe:

Ye oyo azali likolo na ndako—ndako akita te mpo na kozua eloko ezali kati na ndako na ye:

Ye oyo azali kati na elanga azonga nsima te mpo na kozua elamba monene na ye.

Mawa epai na basi bazali na zemi pe na bango bakonungisa bana na mikolo yango!

Bondela ete kokima na bino ezala na ntango na mpio te, soko na mokolo na sabata te.

Ekozala na mpasi mingi lokola esalema naino te longwa na ebandeli ya mokili kino na ntango oyo, ekosalema pe boye lisusu te.

Soko mikolo yango iyei mikuse te mbele moto moko te akobika. Nde mpo na baponami, mikolo yango ikoya mikuse.

Yango wana, soki nani akoloba na bino ete, Tala Klisto wana, soko ete tala ye oyo, bondima te.

Zambi Baklisto na lokuta pe basakoli na lokuta bakotelema, pe bakomonisa bilembo pe bikamwiseli

minene; mpo na kopengwisa baponami mpenza, soko nde bakokoka.

Tala nasili koyebisa bino liboso.

Bongo soko bakoloba na bino ete, Tala azali na lisobe, bobima te. Soko ete, Tala azali na eteni ya katikati na ndako, bondima te.

Mpo ete, lokola mokalikali ekobimaka epai na likolo, ekongengaka epai na ngele, bongo pe koya na Mwana na moto ekozala.

Esika nini ezali ebembe, wana bampongo ikoyangana. . .

- ¹⁵ Sikawa, lokola motó na liteya, nalingi kozua molongó ya 24, mpo na kobeta sete na molongó oyo mpo na liteya na biso ya kelasi ya Lomingo na ntongo oyo. Pe boyoka malamú wana nakozongela kotanga oyo, lisusu.

Zambi Baklisto na lokuta pe basakoli na lokuta bakotelema pe bakomonisa bilembo pe bikamwiseli minene; mpo na kopengwisa baponami mpenza, soko nde bakokoka.

- ¹⁶ Sikawa lokola motó na liteya na ntongo oyo, to lokola liteya, nalingi kozua: *Bapakolami Na Ntango Ya Suka*. Yango nde motó na liteya oyo nalingi kolobela, to liteya: *Bapakolami Na Ntango Ya Suka*.

- ¹⁷ Nandimi ete tozali kobika na ntango ya suka. Nakanisi pene na moto nyonso oyo. . . Motangi ya Makomi, to ata mo—mondimi, ayebi ete tokómi sikawa na suka ya lisolo ya mokili. Ntina ya kokoma yango ekozala te, mpamba te moto ya kotanga yango akozala te. Ezali suka ya ntango. Ntango nini, ngai nayebi te. Ekoumela ntango boni, ata Banje ya Likolo bayebi miniti to ngonga yango te. Kasi Nkolo Yesu alobaki na biso, ete, ntango makambo oyo tozali komona sikawa ekobanda kosalema, boye totombola mitó, mpo lisiko na biso ekómi pene. Sikawa, “kokóma pene” elingi koloba nini, ngai nayebi te. Ekoki koloba. . .

- ¹⁸ Ndenge bato ya sciences balobaki mokolo mosusu wana, na televizió, bazalaki koloba na ntina na kobukana monene, ya bankoto ya bakilometele, kati na mabele oyo ekozinda. Batunaki ye motuna: “Ekoki kozinda nde kuna?” Ezali Los Angeles, Libongo ya Westi. Pe mingi kati na bino bomonaki ndenge balandelaki yango na radar, emataki kino na. . . epasolaki nzela na nse ya San Jose, ekendaki kino na Alaska, ebimeli kino na Bisanga ya Aleutia, pene na ntaka ya kilometele koleka nkama mibale kati na mai na mbu, pe ekiteli lisusu na San Diego, ebalukaki na nganmbo ya Los Angeles, pe emati kuna, lidusu moko monene.

Pe koningana ya mabele nyonso oyo totikali kozua euti na misala ya ba-volcan oyo ezali kosalema na lidusu monene wana. Nayebi lisusu nkombo ba—babengaki yango te. Ata bongo, ntango eninganaka, yango ebotaka koningana ya mabele oyo ekomelaka biso mibu ebele na Libongo ya Westi. Sikawa epasuki zongazonga na yango nyonso. Pe bato na Sciences balobaki, moko . . .

19 Mobali yango alobaki na mosusu: “Ekoki kozinda?”

Alobaki: “‘Ekoki’ te, kasi ekozinda.”

Alobaki: “Kasi na ekeke na biso te, ntango mosusu?”

Alobaki: “Na miniti mitano ékolanda, to na mibu mitano oyo ekolanda. Toyebi mpenza ntango yango te.”

20 Na mposu oyo, batindelaki ngai ba-titre minene ya zulunale, ya bandako minene ya ba-dollar nkoto monkama oyo ezali kopasuka pe kobukana, bato bazali kolongwa na bango. Pe bayebi lolenge ya kotelemisa yango te. Lolenge ya kotelemisa yango ezali te. Bomoni, Nzambe akoki kosala likambo Ye alingi, pe moto moko te akoki koyebisa Ye ndenge ya kosala yango.

21 Bokotonga bandako, bokoki kosala biloko na mayele ya science, kasi Nzambe nde Mokeli ya science. Bokopekisa Ye ndenge nini? Akoki kobebisa mokili na ntongo oyo na ba-nsili soki Alingi. Boyebi yango, Akoki koloba ba-nsili ékelama, pe bakotonda na ntaka ya kilometele koleka ntuku motoba na minei se na eteni ya ngonga, bomoni, eloko ezali te . . . pe ekosilisa nye bato nyonso na mokili. Azali Nzambe. Asalaka ndenge Ye alingi. Azali na bokonzi nyonso, na Ye moko.

22 Sikawa, wana tókomona polele makambo nyonso oyo, pe ngonga tozali kobika na yango sikawa, nakanisi ezali malamumu kozongela makambo oyo pe komonisa yango polele, lokola Bilembo esili kofungwama, pe koyeba solo ya makambo oyo, lokola pe Nzambe asili kozala mpenza sembo epai na biso, na ngolu na Ye, mpo na kolakisa biso makambo oyo.

23 Nalingi botala malamumu awa na Matai 24, Yesu asalelaki liloba oyo “Ba-Klisto,” B-a-k-l-i-s-t-o, “Ba-Klisto.” Klisto te, kasi “Ba-Klisto,” na boike, na bomoko te. “Ba-Klisto.” Na bongo, liloba oyo *Klisto* elingi koloba “Mopakolami.” Pe lisusu soki ezali “oyo apakolami,” ekozala bobele moto moko te, kasi bato mingi, oyo apakólami, “bapakolami.” Bomoni?

24 Na elobeli mosusu, soki Alingaki kolimbola yango mpo tokoka kososola yango mwa malamumu koleka, Alingaki koloba: “Na mikolo na suka, bapokolami ya lokuta bakotelema.” Sikawa, ezali komonana lokola ekoki kosalema te, bomoni, maloba oyo “bapakolami.” Kasi botala malamumu maloba mpenza oyo elandi: “pe basakoli ya lokuta,” b-a-s-a-k-o-l-i, na boike.

25 Sikawa, *mopakolami*, ezali, “ye oyo azali na nsango.” Pe lolenge moko oyo nsango ekoki koteyama, ezali na nzela ya moto

oyo *apakólami*, pe yango ezali mosakoli, mopakolami, “balakisi ya lokuta, oyo bapakólami, bakotelema.” Mosakoli ateyaka oyo nsango na ye ezali. Balakisi oyo bapakólami, kasi bato oyo bapakólami na malakisi ya lokuta. Bapakolami, “Ba-Klisto,” na boike; “basakoli,” na boike. Pe soki ezali na eloko moko lokola kli—Klisto, na bomoko, na boye baoyo wana basengeli kozala “bapakolami,” ete esakweli ya malakisi na bango nde ezali na bokeseni, mpo bazali bapakolami, bapakólámí.

²⁶ Sikawa, ezali liteya ya eteyelo ya Lomongo, tolingi ko—komeka kotalisa yango mpenza polele, na nzela ya Makomi, na oyo moto mosusu alobeli yango te, kasi na kotanga bobele Makomi.

Bokoki koloba: “Ekosalema ndenge nini? Bapakolami yango bako . . . ? Bazalaki nini?”

²⁷ “Ba-Klisto,” B-a-k-l-i-s-t-o, “Bapakólami ba-Klisto, pe basakoli ya lokuta.” Bapakolami, kasi basakoli ya lokuta!

Yesu alobaki, ete: “Mbula enokaka likolo ya bayengebeni ná bato mabe.”

²⁸ Sikawa, moto moko akoki koloba na ngai: “Ondimaka ete epakweli oyo ezali likolo na bato wana elingi koloba ete ezali epakweli ya Molimo Mosantu?” Iyo, misie, ezali Molimo Mosantu ya solosolo ya Nzambe likolo na moto, ata bongo bazali bato na lokuta.

Sikawa boyoka malamumu pe botala oyo Ye alobaki. “Pe bakomonisa bilembo pe bikamwiseli mpo na kopengwisa Baponami mpenza, soko nde bakokoka.” Kasi bapakólami na Molimo Mosantu ya solosolo. Nayebi ezali komonana lokola bolema mpenza, kasi tokozua ntango mpo na kolimbola yango na Liloba, ete yango ezali mpenza YANGO ELOBI NKOLO, Bosolo.

²⁹ Sikawa tokamata ba-Biblia na biso, miniti moke, na Matai mokapo ya 5, pe tobanda na—na molongo ya 45, pe tomona sikawa wana tokotanga Makomi oyo na ngonga moke. Pe sima na biso kokoma awa, ee, tokopesa bino . . . Boye bino, soki totangi yango nyonso te, bongo bozua ba-Biblia na bino; pe—pe lisusu bokoki kotanga yango sima na biso kolongwa awa pe bozongi na ndako, pe—pe botanga oyo Biblia elobi na ntina na yango.

³⁰ Sikawa, mpo na kowela ntango na biso, pe kotia mo—mobóko, mpo nazali koloba awa likambo moko ya kokamwisa. Ndenge nini Molimo Mosantu akoki kopakola molakisi ya lokuta? Kasi yango nde likambo oyo Yesu alobaki ekosalema.

Sikawa, Matai, mokapo ya 5, molongó ya 45, totanga sikawa. Tokamata, tobanda mo—moke liboso na yango, na molongó ya 44.

Nde ngai nazali koloba na bino ete, Bolinga bayini na bino, bopambola baoyo bazali kolakela bino mabe, bosala malamumu epai na baoyo bazali koyina bino, . . .

bobondela mpo na baoyo bákomonisa bino mpasi bazali konyokola bino;

Bongo bokozala bana na Tata na bino na likolo: zambi akobimisa moi na ye na bato mabe pe . . . na bato malamumu, pe akonokisa mbula likolo na bayengebeni pe . . . bato mabe. (Mbula enokaka likolo na bato mabe ndenge moko pe likolo na bato malamumu.)

³¹ Sikawa, mpo na kolandisa yango, na esakweli mosusu kokokana na oyo, tika ete tokamata sikawa Baebele mokapo ya 6, mpo na molongo oyo elandani na oyo, esika Polo azali kokanisela makambo yango moko oyo Yesu alobaki. Polo nde azali koloba awa. Wana bozali koluka yango . . . Pe bino baoyo bozali kolanda na ba-radio, bozala na ba-Biblia na bino pembeni na bino ná eteni ya lokasa, pe botala yango sikawa. Baebele mokapo ya 6, Polo nde akomeli Baebele, kotalisa bango bililingi pe bitaliseli, komema bango longwa na Judaizme kino na Boklisto, kotalisa bango lolenge nini makambo nyonso ya kala ezalaki bobele bililingi ya makambo oyo esengelaki koya. Polo azali koloba sikawa, na Baebele 6.

Boye totika makambo mike mike ya liboso ya mateya ya Klisto (K-l-i-s-to, na bomoko), pe toleka kino suka. Totika naino kotia moboko na kobongwana na motema . . . misala na kufa pe kondima Nzambe.

Pe . . . mateya mpo na libatizi pe kotiyama maboko pe kosekwa na kufa pe esambiseli na seko.

Tokosalaka bongo soko Nzambe apesi nzela.

Zambi mpo na bango basili kongengelama moi pe koyoka elengi ya likabo na likolo, pe kosangana na Molimo Mosantu,

Nalingi kobenda bokebi na bino mpo na miniti moke. Botali malamumu? Ezali “likabo”; kasi “makabo te, kosangana na makabo ya likolo”; Kasi, “likabo ya likolo,” na bomoko; “Klisto,” na bomoko; “likabo,” na bomoko.

. . . likabo na likolo, pe . . . kosangana na Molimo Mosantu,

Bayoki elengi ya . . . liloba na Nzambe . . . (bayoki elengi ya nini?) . . . ya liloba na Nzambe, pe ya nguya na ekeke ekoya,

Soko na sima basili kopengwa, nzela na kobongola bango mpenza lisusu na motema ezali te; mpo bazali kobakisa Mwana na Nzambe na ekulusu bango mpenza, pe bazali kotiola ye.

Zambi (boyoka) mabele . . . komela mbula oyo ekonokaka na yango mbala mingi, mpo na kobimisa ndunda kosunga baoyo batimoli yango, makozuaka mapamboli na Nzambe:

Nde soko makobimisa nzube...matiti mpamba, makoki na eloko te pe malingi kolakelama mabe; suka na yango kozika móto.

³² Sikawa bokokanisa yango lisusu na Matai 5:24. Botala malamu, Yesu alobaki mbula pe mói ekitaka na mabele, pe Nzambe atindaka yango mpo na koléngéle bilei pe biloko mosusu mpo na bato ya mokili. Pe mbula etindamaka mpo na bilei, ndunda. Kasi matiti ya mpamba, matiti mabe, lokola ezali kati na elanga, ezuaka mbula yango moko. Mbula moko oyo ekolisaka masangu ezali mbula yango moko oyo ekolisaka matiti mabe.

³³ Nayekolaki liteya moko ya boye ngonga moko, ntango nakutanáká na ba-Pantekotiste mbala ya liboso! Pe ezalaki liteya monene mpo na ngai. Namonaki mibali mibale, moko... Nayokáká naino te koloba na minoko na sika liboso. Moko azalaki koloba minoko na sika, oyo mosusu azalaki kolimbola yango, pe bongo na bongo. Pe bazalaki koloba solo, koloba ete: “Ezali na bato mingi awa oyo bakobongola mitema na mpokwa oyo. Ezali basi ná mibali, elongo.” Pe bato bazalaki kotelema pe kokende na etumbelo.

Nakanisaki: “Eloko ya nkembo mpenza!”

³⁴ Na bongo ná mwa likabo ya Molimo Mosantu, nasololaki na bato yango, bobele, bino boyebi ndenge, na kososola makanisi, lolenge moke ya koyeba makambo. Pe moko na bango azalaki Moklisto ya solosolo, pe azalaki mosali ya Klisto ya solo mpenza, pe mosusu wana azalaki mokosi. Pe moko na bango, oyo azalaki mokosi, azalaki kobika na mwasi moko ya nsuki moindo, pe azalaki kobima na mosusu ya nsuki motane pe abotaki na ye bana. Ee, emonanaki polele kati na emononeli; ekokaki kotiyama ntembe te. Pe nalobelaki ye yango. Atalaki ngai pe akendeki sima na ndako.

³⁵ Sikawa nakomaki na mobulu, ya solo mpenza. Ngai nakanisaki nakómaki katikati na banje, boye namitunaki soki nazalaki nde katikati ya milimo mabe te. Ndenge nini yango ekokaki kosalema? Nakokaki kososola yango te. Pe mibu na mibu natikaki likambo yango mosika na ngai, kino mokolo moko epai oyo... .

George Smith, elenge mobali oyo abandonaka na mwana na ngai ya mwasi, tokendeki lobi, kuna na esika ya masini ya kala ya masangu, epai nakendeke kobondela.

Pe sima na ngai kofanda wana mikolo mibale to misato, Molimo Mosantu azongiselaki ngai lisusu Likomi oyo: “Zambi mbula ekonokaka mbala mingi na mabele mpo na kobimisa na yango ndunda, kasi nzube pe nsende ebikaka bobele na mbula yango moko, pe suka na yango ezali kozika moto.” Ezali kobika na liziba moko ya Nzambe, oyo epesaka bomoi. Bongo nde nasosolaki, ete: “Na,” Yesu alobaki: “Bakoyeba bango na mbuma na bango.”

³⁶ Sikawa, yango wana, mbula oyo ekitaka mpenza likolo ya matiti ya zamba na mokili, ezali etaliseli ya mbula ya Molimo oyo epesaka Bomoi na Seko, ékokitáká likolo ya Lingomba, mpo tobengaka yango mbula ya liboso pe mbula ya suka. Pe ezali mbula, oyo ezali konoka kouta na Molimo na Nzambe, likolo ya Lingomba na Ye.

³⁷ Botala malamumu, awa ezali likambo moko ya ndenge mpenza. Bomoni? Ntango mimboto yango etiamaki na mabele, ata lolenge nini yango ekomaki kuna, ezalaki nzube mpo na kobanda. Kasi kuna, masangu oyo etiamaki na mabele, ná ndunda, ezalaki bobele ndunda mpo na kobanda. Pe ndunda moko na moko ezalaki koyikana yango moko, lisusu, kotalisa ete ezalaki uta na ebandeli mpenza.

³⁸ “Pe bakopengwisa Baponami soko nde bakokoka,” mpamba te bazali kozua mbula yango moko, mapamboli yango moko, kotalisa bilembo yango moko, bikamwiseli yango moko. Bomoni? “Bakolinga kopengwisa, to bakopengwisa Baponami, soko nde bakokoka.” Kasi, nzube ekoki koboya kozala nzube te, lisangu pe ekoki koboya kozala lisangu te; ezali oyo Mokeli ya moko na moko akanaki longwa ebandeli. Yango nde Moaponami. Mbula yango moko!

³⁹ Mói ebimaka na ntongo pe etambolaka mokili mobimba, ndenge esali lelo na mokili pe na mokolo oyo tozali kobika na yango. Pe mói, mói moko oyo ebimaka na Esti ezali mói yango moko oyo elalaka na Westi. Pe mói yango etindami mpo na kotelisa mbuma na mabele, oyo uta na yango nde banzoto na biso esalemá.

⁴⁰ Tozali kobika na nzela ya eloko oyo ekufi. Yango nde lolenge bobele moko oyo bokoki kozala na bomoi. Pe soki eloko moko esengeli kokufa mokolo na mokolo mpo óbika, na nzoto, boye ezali sóló te ete soki ya yo— nzoto na yo esengeli kobika na nzela ya eloko oyo ekufi, mpo na bomoi na nzoto, boye osengeli kozala na Eloko moko ékufa, na molimo, mpo na kobikisa bomoi na yo ya molimo. Pe Nzambe, akomaki eloko ekoki kosimbama, mosuni, pe akufaki mpo biso tokoka kobika. Ezali na Lingomba moko te, to eloko mosusu te na mokili, oyo ekoki kobikisa yo, bobele Nzambe. Bobele na nzela na yango nde bakobika.

⁴¹ Sikawa botala na Makomi. Yesu azali Liloba. “Na ebandeli Liloba azalaki. Pe Liloba akómaki mosuni pe afandaki kati na biso. Na ebandeli Liloba azalaki, pe Liloba azalaki mboka na Nzambe. Pe Liloba ekómaki mosuni, pe Ye abikaki, afandaki kati na biso.” “Pe moto akobika bobele na lipa te,” mpo na nzoto, “kasi na Liloba nyonso oyo ebimaka na monoko na Nzambe.” Na bongo, bomoni, tobikaka na Liloba, pe yango ezali Nzambe.

⁴² Sikawa mói eyaka mpo na kotelisa mbuma. Sikawa, ekoki kotelisa yango nyonso mbala moko te. Ntango ezali kokoba,

kokomela, ezali kotela moke moke kino ébimisa motó na yango mobimba.

Ezali pe bongo, lelo, mpo na Lingomba. Ebandaki na bomwana na yango, kuna na eleko ya molili, epai ezalaki na nse ya mabele. Ekoli kino ekomeli sikawa. Pe tokoki komona yango, na kobonga be, ndenge Nzambe ntango nyonso, na nzela ya bozalisi. . .

⁴³ Bokoki kotia mobulu na bozalisi te. Yango nde likambo lelo. Tozali kotinda ba-bombe na mipepe, pe kuna na maina-mbu, kopanza yango pe kobambola yango ná ba-bombe atomik. Bozali bobele nde kobebisa yango lisusu koleka ntango nyonso wana, ezali bino kobwaka bosoto yango. Bókata banzete; mipepe makasi ekomema bino. Bótonga bitutu oyo ékopekisa mai kotiola, ebale ekotonda koleka.

Bosengeli koyeba lolenge ya Nzambe ya kosala makambo pe kotikala kati na yango. Tokotisi bato na mangomba pe bibongiseli mpo bakoma bato na mangomba; botala nini tozui! Bokangama na lolenge oyo Nzambe asili kobongisa.

⁴⁴ Kasi, bomoni: “Anokisaka mbula,” tozonga na liteya na biso, “likolo na bayengebeni pe bato mabe.” Yesu azali sikawa koyebisa bino awa, na Matai 24, ekozala elembo na ntango ya suka.

Sikawa, soki elembo oyo esengeli bobele koyebana na ntango ya suka, na bongo ekosengela ézala sima ya bofungwami ya Bilembo yango. Bomoni? Ezali elembo ya suka. Yango ekozala, ntango makambo oyo ekosalema, ekozala na ntango ya suka. Pe ekozala bongo elembo, mpo Baponami bakozala na mobulu te na makambo oyo. Bomoni yango? Na bongo, esengeli komonisama, kotalisama polele.

⁴⁵ Botala malamumu, masangu ná matiti mabe ebikaka na Epakweli yango moko uta na Lola. Yango nyonso mibale esepelaka na Yango.

Nakanisi lisusu likambo oyo, nakozua ndakisa ya likambo oyo esalemaki mokolo wana na Green’s Mill. Na—namonaki emononeli yango kofunwama. Pe ezalaki etando monene moko ya mabele, oyo ebongisamaki mpenza mpo na kolona. Pe tala Moloni moko ayaki, liboso. Nalingi kalakisa bino yango malamumu. Botala eloko nini eyei liboso, pe nini elandi yango na sima. Pe wana Moto yango, ná elamba ya pembe ayaki zinga zinga ya mokili, kolonáká momboto, bongo sima na Ye moto moko ayaki, alataki bilamba ya moindo tuu, azalaki lokola moto ya mayele mabe, amikotisaki na mayele sima na Ye, kolonáká matiti mabe. Pe ntango likambo yango esalemaki, na sima namonaki milona nyonso mibale kobima. Pe ntango ebimaki, moko ezalaki lisangu pe oyo mosusu ezalaki matiti mabe.

Na sima kokauka eyaki, pe ntango, emonanaki lokola, yango nyonso mibale egumbaki mitó na nse kolela ete mbula

énoka. Na sima lipata moko monene eyaki kozipa mokili, pe mbula ebetaki. Pe lisangu emisembolaki pe elobaki: “Nkembo na Nkolo! Nkembo na Nkolo!” Matiti mabe pe emisembolaki pe egángaki: “Nkembo na Nkolo! Nkembo na Nkolo!” Mbano ndenge moko. Bango mibale bazalaki kokufa, bango mibale bazalaki kokauka. Pe na sima lisangu ebimaki pe eyokaki mposa ya mai. Bongo lokola ezalaki na elanga moko, na lopango moko, na esika moko, na nse ya komwangisama ya mai moko, lisangu ebimaki pe matiti mabe pe ebimaki, na nzela ya eloko yango moko mpenza. Botala malamumu, mai ya epakweli moko yango ekolisaka lisangu, ekolisaka pe matiti mabe.

⁴⁶ Molimo Mosantu moko oyo epakwelaka Lingomba, oyo epesaka bango mposa ya kobikisa milimo, oyo epesaka bango nguya ya kosala bikamwa, Ekitaka likolo ya bato mabe ndenge moko pe na bayengebeni. Molimo yango moko mpenza! Sikawa, bokoki kosala yango ndenge mosusu te mpo na kososola Matai 24:24. Alobaki: “Ekozala na ba-Klisto ya lokuta,” bapokolami, ya lokuta. Bapakólámí ná Eloko ya solosolo, kasi bazali basakoli na Yango ya lokuta, balakisi na Yango ya lokuta.

Eloko nini ekosala ete moto ázala molakisi ya lokuta na likambo oyo ezali Solo? Sikawa tokokóma na elemba na nyama sima na miniti moke, pe bokomona ete denomnation. Bomoni? Balakisi ya lokuta; mopokolami ya lokuta. Ba-Klisto bapakólámá, kasi balakisi ya lokuta. Ezali lolenge moko oyo bokoki komona yango.

⁴⁷ Kaka lokola awa, eleki ntango moke, nalobelaki likambo oyo. Nakoki kolobela yango, mpo ekólo mobimba ezali kolanda na nzela ya singa. Mokolo moko nazalaki kosolola na moninga na ngai moko, esika bazali kolanda biso na ntongo oyo, na Arizona. Pe azalaki na—na elanga ya ndímo. Pe azalaki na nzete moko oyo ezalaki nzete ya malála oyo ezalaki kobimisa mbuma ya pamplumus, na ndímo-ya-ngai, mandarine, na kelementine. Pe nabosani ba-mbuma ya ndenge na ndenge boni ezalaki kobima na nzete moko wana. Pe nalobaki na mo—mo—moto yango, nalobaki: “Ndenge nini? Lolenge ya nzete nini oyo?”

Alobaki: “Nzete, yango moko, ezali nzete ya malála.”

Nalobaki: “Ndenge nini ezali kobimisa ba-mbuma ya pamplumus? Mpo na nini ezali kobimisa ndímo-ya-ngai?”

Alobaki: “Babambi kobamba bitape na yango.”

Nalobaki: “Namoni. Ee, sikawa,” nalobaki, “boye, na mbula ekolanda ntango nzete yango ekobota mbuma mosusu,” yango nyonso eteleka pene-pene na ntango moko, nalobaki, “na boye nyonso ekobota malála. Soki ezali nzete ya malála navele, ekobota malála navele, boye te, misie?”

Alobaki: “Te, misie. Etape ya nzete nyonso oyo babambaki kobamba ekobota kokokana na lolenge na yango.”

Nalobaki: “Olingi koloba ete ndímo-ya-ngai ekobota ndímo-ya-ngai uta na nzete ya malala yango?”

Alobaki: “Iyo, misie.”

“Pamplemus ekobota pamplemus uta na nzete yango ya malala?”

Alobaki: “Iyo, mesie. Ezali lolenge ya etape oyo babambaki.”

Nalobaki: “Nkembo na Nzambe!”

Alobaki: “Olingi koloba nini?”

Nalobaki: “Motuna moko lisusu. Sika, nzete yango ya malala ekobota lisusu malala?”

Alobaki: “Ntango ekobimisa etape mosusu.” Ntango *yango* ekobimisa etape mosusu, na ntango te oyo bakobamba etape moko na yango. Kasi, yango nyonso ezali ba-mbuma ya ndímo, pe ezali kobika na bomoi ya ndímo oyo ezali na kati ya nzete ya ndímo.

⁴⁸ Nalobaki: “Nde yango mpenza! Ba-Methodiste bakobota ba-Methodiste, ntango nyonso. Ba-Baptiste bakobota ba-Baptiste, ntango nyonso. Bakatoliko bakobota Bakatoliko, ntango nyonso. Kasi Lingomba ya Nzambe na Bomoi ekobota Klisto longwa na mosisá, Liloba ntango nyonso, soki ebimisi mowiti mosusu ya yango Moko.”

⁴⁹ Sikawa, bokoki kobamba yango na kati, bomoni. Pamplemus nyonso, ndímo-ya-ngai, kelemantine, mandarine, ezala mbuma ya ndímo ya lolenge nini, yango nyonso ekoki kobika na nzete wana; kasi ekopesa litatoli ya lokuta ya nzete yango, ezali kobika na nzela ya nzete yango. Bomoni yango? Ezali kobika pe kokola na bomoi ya solosolo oyo ezali kati na nzete wana.

Sikawa, Matai 24:24 yango wana, kobikáká bobele na Bomoi moko yango, kasi bazalaki malamau te, uta ebandeli. Bazali kopesa litatoli ya lokuta ya Nzete yango! Ezali nzete ya malala, kasi ezali nzete ya ndímo. Pe balobaka: “Lingomba oyo, denomination oyo ezali kotatola Klisto.” Pe bazali na libatisi ya lokuta, litatoli ya lokuta ya Liloba, komeka koloba ete nguya na Nzambe ezalaki bobele mpo na bayekoli?

Yesu, Ye moko, alobaki: “Bokende na mokili mobimba pe boteya Nsango Malamau na etape nyonso oyo eko...nzete oyo ekobota, etape nyonso oyo ekozala na nzete. Pe bilembo oyo ekolanda bitape ya solosolo.” Wapi? Ntango nyonso oyo ekozala Nzete, ntango nyonso oyo Ekobimisa bitape, kino na suka ya molóngó. “Bakobengana milimo mabe na Nkombo na Ngai; bakoloba minoko na sika; bakolokota banyoka; bakomela eloko na kufa; bakotia maboko na babeli pe bakobika.” Bomoni ngonga nini oyo tozali kobika? Bomoni likambo Yesu alobaki?

⁵⁰ Bomikanisela, likambo oyo ezalaki na ntango ya suka, na eleko ya Wesley te ná kuna te. Sikawa, na ntango ya suka, likambo oyo esengelaki kosalema.

Sikawa botala Makomi malamu; tika Yango etatola. Yesu alobaki: “Bokolukaluka kati na Makomi, mpo bokanisi, to bondimi, ete kati na Yango nde bokozua Bomoi na Seko, pe Yango nde Ezali kotatola mpo na Ngai.” Na elobeli mosusu, soki nzete oyo ebote etape mosusu. . . “Ngai nazali Mowiti, Nzete; bino bozali bitape. Ye oyo akondimela Ngai, misala mizali Ngai kosala, akosala yango pe lokola,” Yoane 14:12.

⁵¹ Sikawa: “Ye oyo akoumela kati na Ngai, ye oyo. . . ye oyo azalaki kati na mosisá na Ngai longwa na ebandeli.”

Yango wana Yesu azalaki ye moko Ntina pe Libota ya Dawidi. Azalaki liboso na Dawidi, kati na Dawidi, pe sima na Dawidi, Ntina pe Libota ya Dawidi; Monzoto na Ntongo, Fololo ya Sharon, Lísí ya Lobwaku, Alifa pe Omega; Tata, Mwana, pe Molimo Mosantu. “Litondi na Bonzambe efandaka kati na Ye na motindo na nzoto.” Ye moko Ntina pe Libota na Dawidi!

“Ye oyo azali Bomoi eponámá, Bomoi ebongisámá liboso, oyo ezali kati na Ngai,” pe Ye azali Liloba, “uta ebandeli; ntango akoya, akobota mbuma na Ngai.” Santu Yoane 14:12.

Kasi baoyo mosusu bakobika na eloko yango moko, komibengáká Baklisto pe bandimi. “Ezali te baoyo nyonso balobaka ‘Nkolo, Nkolo,’ nde bakokota wana.”

Sikawa, likambo oyo esengeli kosalema pe komonisama na mikolo ya suka, “ntango mabombami na Nzambe ekosila,” ndenge tokomona yango sima na ntango moke.

⁵² Ba-nzete oyo, mowiti ya solo pe mowiti ya lokuta! Boyóká ngai koteya na ntina na yango mbala moko, eleki mibu ebele, ndenge ekolaki esika moko. Natalisaki yango na nzela ya bato, pe namonisaki yango polele, kobanda Kaina pe Abele, miwiti mibale yango oyo ekutanaki na etumbelo; bango mibale basambeli, bango mibale bapokolami, bango mibale bazalaki na mposa ya bomoi, pe bazalaki kosambela Nzambe moko. Kasi moko aboyamaki pe mosusu ayambamaki.

Pe lolenge moko oyo ye oyo ayambamaki akokaki kosala likambo moko oyo ekesanaki na ndeko na ye: yango emonisamelamaki ye. Mpamba te Biblia elobi: “Na kondima. . .” Baebele, mokapo ya 11: “Na kondima, Abele apesaki Nzambe mbeka malamu koleka oyo ya Kaina, oyo Nzambe atatolaki ete azalaki moyengebeni.”

Yesu, alobaki, emoniseli ya molimo ya Nani Ye azalaki! “Bato bazali koloba ete Ngai Mwana na moto nazali nani?”

Alobaki, Petelo alobaki: “Yo ozali Klisto, Mwana na Nzambe na bomoi.”

“Esengo na yo, Simona—Simona, mwana na Yona, mosuni pe makila emonisá yo oyo soko moke te. Tata na ngai oyo azali na Likolo nde amonisi yango. Likolo na libanga oyo Nakotonga

Lingomba na Ngai,” (nini?) emoniseli ya solo ya Liloba. Wana nde Mowiti ya solo lisusu. “Abele, na kondima!”

Okoloba: “Ezalaki emoniseli te.”

⁵³ Kondima ezali eloko nini? Kondima ezali eloko oyo emonisami epai na yo; ezali naino te, kasi ondimi ete ekozala. Kondima ezali emoniseli ya mokano na Nzambe. Boye, na emoniseli!

⁵⁴ Pe mangomba lelo bandimelaka ata emoniseli ya molimo te. Bandimelaka malakisi ya bindimeli ya lolenge moko boye ya kosala makambo. “Na emoniseli Abele apesaki Nzambe mbeka ya malamumu koleka oyo ya Kaina, na nzela na yango Nzambe atalolaki ete ezalaki moyengebeni.” Amen. Nandimi ete bomoni yango. Bomoni epai wapi tozali kobika? Bomoni ngonga yango?

Nazalaki kosolola na mo—moto moko malamumu eumeli te, Moklisto, moko ya mayele pe moto malamumu. Alobaki: “Misie Branham, biso toboi bimoniseli nyonso.”

⁵⁵ Nalobaki: “Boye bosengeli koboya Yesu Klisto, mpo Ye azali emoniseli ya Nzambe, Nzambe amonisami na nzoto ya moto.” Soki omoni yango te, obungi.

Yesu alobaki: “Soki bondimi te ete Ngai nazali Ye, bokokufa na masumu na bino.” Ye azali emoniseli ya Nzambe, Molimo na Nzambe emonisami na lolenge ya moto. Soki okoki kondima yango te, osili kobunga. Kokómisa Ye moto ya misato, moto ya mibale, to moto mosusu libanda na Nzambe, osili kobunga. “Soko bokondima te ete Ngai nazali Ye bokokufa na masumu na bino.” Emoniseli!

⁵⁶ Ékokamwisa te ndenge bakokaki komona Ye te. “Moto akoki koya epai na Ngai te bobele soki Tata na Ngai akobenda ye. Pe baoyo nyonso Tata asili kopesa Ngai,” kobanda na misisá, “bakoya epai na Ngai.” Bomoni? Bososoli yango? Oh, boni tosengeli mpenza kolinga Ye, kokumisa Ye, kosanzola Ye; komona mbuma ya Molimo na mikolo ya suka, pe Nzete ya Mwasi na libala kokomela na songe ya ntango!

⁵⁷ Mowiti ya solo pe mowiti ya lokuta, yango nionso mibale ezuaki epakweli moko. Mai ekweyaki likolo na yango nionso mibale. Ékokamwisa te soki Akebisaki biso: “Ékopengwisa Baponami mpenza, soko ekokaki kosalema.”

⁵⁸ Botala, bazali komonana ndenge moko. Bapakólami ndenge moko. Kasi botala malamumu: “Na mbuma na bango . . .” Bokoyeba yango ndenge nini?

Ndenge nini boyebaka ete wana ezali lilala te? Mpo ebimisi pamplumus. Mowiti yango ezali malamumu mpenza, ezali kobika kati na nzete yango, kasi ebimisi pamplumus. Ezali lokola oyo ya liboso te.

Pe soki lingomba moko elobi bango “bandimaka ete Yesu Klisto azali motindo moko lobi, lelo, pe libela,” pe baboyi Nguya

na Ye, baboyi misala na Ye, baboyi Liloba na Ye; soki—soki. . . Lingomba oyo endimelaka Yesu Klisto, ekosala misala na Yesu Klisto, ekozala na Bomoi ya Yesu Klisto. Pe soki ezali te, ata soki Bomoi ezali kosopana kati na yango ndenge nini, soki ebongisámá liboso te, uta na misisá, ekobimisa ba-pamplemus ntango nyonso, to eloko ya ndenge mosusu. Kasi soki ezali Bomoi oyo ebongisámá liboso, uta na misisa, ekobimisa Yesu Klisto motindo moko lobi, lelo, pe libela, soki ezali Liloba oyo ezali koyela kouta na nzela ya Mosisá. Oyo, Ye azali Mosisá yango, ebandeli ya ntango.

⁵⁹ Botala malamumu, kasi ezali eloko oyo bazali kobimisa nde ezali kolakisa bino bokesení. “Na mbuma na bango,” Yesu alobaki, “nde bokoyeba bango.” “Moto akozua mbuma na miwiti kouta na nsende te,” atako nsende ezali kati na elanga na miwiti. Yango ekoki kosalema, kasi mbuma ekolakisa yango.

Mbuma ezali nini? Liloba, mpo na ele- . . . mbuma ya eleko. Nde oyo yango ezali, malakisi na bango. Malakisi ya nini? Malakisi ya eleko, ekómi ntango nini. Malakisi ya bato, malakisi ya denomination, kasi, to Liloba na Nzambe mpo na eleko?

Sikawa, ntango ezali koleka noki-noki mpenza, mpo tokokaki kouwela na yango ntango molai. Kasi nandimi mpenza ete bino baoyo bozali awa, pe nandimi mpenza ete bino baoyo bozali kuna na ekólo mobimba, bokoki komona likambo oyo nazomeka koyebisa bino, mpo tozali na ntango mingi mpenza te ya kouwela likolo na yango.

⁶⁰ Kasi bokoki komona ete Epakweli ekitaka likolo ya bato mabe, balakisi ya lokuta, pe etindaka bango kosala mpenza makambo Nzambe ayebisaki bango basala yango te; kasi, ata bongo, bakosala yango. Mpo na nini? Bakoki kosala ndenge mosusu te. Ndenge nini nsende ekoki kozala eloko mosusu soki nsende te? Ata ebeteli mbula malamumu ndenge nini, ekozala bobele nsende. Yango nde ntina oyo Yesu alobaki: “Bakozala mpenza pene na lolenge ya kopengwisa Baponami mpenza,” baoyo bazali kati na misisá, “soko ekokaki kosalema,” kasi ekoki kosalema te. Lisangu ekoki kosala eloko mosusu te bobele kobota lisangu; wana nde nionso oyo yango ekoki kobota.

⁶¹ Botala malamumu. Bomikanisela, Nzambe azali mobandisi ya ebongiseli te. Zabolo nde azali mobandisi ya ebongiseli. Natalisaki yango polele na nzela ya Liloba, na ndenge nionso, pe mbala na mbala; tokokota na yango te na ntango oyo. Toyebi ete Nzambe atikálá kosangisa bato elongo na lolenge wana te, mpo na kosala ebongiseli. Mibu nkama na nkama sima na liwa ya moyekoli ya suka, liboso bátikala kosala ebongiseli ya liboso. Emonisáma ntango nyonso été esimbá te. Soki te, mpo na nini lelo tozali esika moko te kati na bolingo: ba-Methodiste, ba-Baptiste, ba-Presbiterien, Bakatoliko pe nyonso wana? Boye, mpo na nini misala na Nzambe ezali kolanda

biso te, soki mangomba nyonso ezali na likambo yango moko, Liloba? Makambo oyo nde ezali kokabola bato, bondeko... Tozali mosika na Nzambe koleka ndenge tozalaki, mangomba, nde nákolobela.

⁶² Sikawa, bayebisi biso ete: “Makambo nyonso ya kala esalemaki lokola ndakisa, mpo na kolakisa, kopamela pe kosembola biso.” Ete makambo nyonso ya kala ya Kondima na Kala oyo esalemaki, ezalaki elilingi, mpo tomona eloko nini ekozala na Kondimana na Sika, na eleko na biso.

Ezali lokola omoná naino loboko na yo te, pe ótomboli miso pe omoni elilingi na etutu, ndenge loboko na ngai ekozala uta na pole yango. Soki ezali na misapi mitano awa na elilingi (ntango ezali elili), pe soki óbelemisi maboko na yo pembeni (lokola solo ya elili), pembeni na—pembeni na elili yango, esengeli kotalisa misapi mitano.

Ndenge Biblia elobi na biso, ete: “Kondimana na Kala ezali elilingi, etaliseli ya makambo ya sika, to ya makambo esengelaki koya; ezali mpenza makambo ya solo te, kasi ezali elilingi, etaliseli ya makambo esengeli koya.”

⁶³ Tozonga sima pe totala soki likambo oyo etikálá kosalema na eleko mosusu. Bolingi? [Losambo balobi: “Amen.”—N.D.E.] Boye tokoyeba, mpo na kotalisa yango polele, na ndenge nionso, na nzela ya Liloba; na likanisi ya moto moko te, to ndimbola.

Ézala ata nani; moto mosusu, ngai moko to moto nani mosusu, etali ngai te: “Soki alobi te kokokana na mobeko pe basakoli, Pole ezali kati na ye te.” Bomoni? Wana nde oyo Biblia elobi. “Tika maloba ya bato nyonso ezala lokuta, kasi oyo ya Ngai ézala solo,” ata moto yango azali nani.

⁶⁴ Sikawa tozonga sima pe totala soki likambo oyo etikálá kosalema, mpo etalisa biso ndakisa.

Tokoki sikawa kozonga sima na Mokanda na Esode pe tolobela moto moko na nkombo Mose, oyo azalaki mosakoli apakolami pe atindamaki na Nzambe, ná Liloba na Nzambe pe mokano na Nzambe mpo na ekeke na ye. Lokola Liloba na Nzambe etambolaka ntango nyonso na bokobi, Alobaki: “Akosala likambo moko te kino Amonisi Yango liboso epai na basakoli na Ye.” Bongo Asalaki yango. Uh-huh.

Sikawa, Ye akoki kokosa te. Akoki te kokosa pe Ázala Nzambe. Te, misie. Asengeli kotikala solo. Lokuta ezali kati na Ye te. Azali . . .

Pe Akoki kobongola Yango te. Soki Asali yango, boye Azali Nzambe te; Asali libunga. Asengeli kozanga suka. Pe oyo azangi suka akoki kosala libunga te. Bomoni? Boye oyo Nzambe alobi, ezali solo Seko-na-Seko. Bomoni? Pe Alakaki yango. Boye, botala malamumu, ezali na esika moko te na Biblia oyo ezangi kolandana mpenza na yango.

⁶⁵ Sikawa, Nzambe alakaki Abraham ete momboto na ye ekozala mopaya na—na mboka mopaya na mibu nkama minei, na sima Akobimisa bango na loboko na Ye monene ya nguya pe ya makasi, Akolakisa bilembo pe bikamwiseli na Ye katikati na bato oyo bazalaki kofanda na bango. Ntango ya elaka ekómaki pene. Bato babosanaki yango. Bazalaki na Bafalisai ná Basadukai, pe bongo na bongo, ba-denominations. Kasi, na pwasa, tala Nzambe ye moko ayaki pe abimisaki moko, libanda, mosika na bango nyonso.

Nzambe naino, na eleko moko te to na ntango moko te, abenga mosakoli uta na denomination moko te. Te, misie. Akozala asila kobeba, akokoka kosala yango te; akosepela kotikala na denomination wana.

⁶⁶ Mose, moto atindami na Nzambe, ná Liloba na Nzambe, pe ezalaki ye na mobembo ya komema Yisalaele na mboka ya elaka, bobele ná mitindo ya Nzambe mpenza, akutanaki na mosakoli mosusu, mopakolami mosusu oyo azalaki na epakweli ya solosolo ya Molimo Mosantu moko oyo ezalaki likolo na Mose. Ezali solo. Azalaki mosakoli. Molimo Mosantu ezalaki likolo na moto yango. Nkombo na ye ezalaki Balame. Toyebi ye malamumu biso nyonso. Ee, makambo yango mpenza, motindo moko, makambo—makambo oyo moto yango alobaki, ezali kokoba kosalema, esili koleka pene na mibu nkoto mibale na nkama mwambe. “Yo ozali lokola nzale, E Yisalaele. Ye nani oyo apamboli yo akopambolama. Ye nani oyo alakeli yo mabe akolakelama pe mabe. Makasi na yo, pe nguya, hema na yo ezali mpenza sembo E Yakobo!” Bomoni, akokaki kosala ndenge mosusu te. Ayaki wana na likanisi kati na motema na ye ya kolakela libota yango mabe.

⁶⁷ Oh, bino balakisi ya lokuta oyo boyokaka ba-bande oyo mibu nyonso oyo, pe bozali komona Nzambe kokokisa mpenza makambo oyo Alobaki, pe bofandi na biro na bino pe boyebi ete ezali Solo; kasi mpo na bokeseni ya ba-denomination na bino, bozali kotelemela yango pe koyebisa bato na bino ete ezali bongo te. Mawa na bino! Ngonga na bino ebeleli pene mpenza.

⁶⁸ Balame, apakolamaki na Molimo moko oyo ezalaki likolo na Mose. Bokeseni ezalaki nini? Malakisi ya Mose ebongaki be. Biblia elobi awa na Petelo ya Mibale, ete ezalaki “malakisi ya Balame” nde Yisalaele ayambaki, pe Nzambe alimbisaki yango ata moke te. Lisumu elimbisamaka te! Moko te kati na bango abikisamaki, atako babimaki na nse ya mapamboli ya Nzambe, pe bamonaki loboko na Nzambe kosala na nzela ya mosakoli na nguya oyo, pe bamonaki yango kotatolama mpenza na Nzambe. Pe, mpo ete, mosakoli mosusu ayaki wana na malakisi, ya kokesene, pe atelemelaki Mose, pe amekaki kotalisa na bato ete Mose azalaki na libunga. Pe Datan, Kore, pe mingi kati na bango, bayokanaki na ye pe bateyaki bana na Yisalaele kosala pite, ete bálanda ebongiseli na ye, ete: “Biso nyonso tozali ndenge moko.”

“Tózala ba-Metodiste, ba-Batiste, ba-Presbiterien, to ba-Pantekotiste, pe soko nini mosusu, biso nyonso tozali ndenge moko.”

⁶⁹ Tozali ndenge moko te! Bozali libota etiami pembeni, bulee mpo na Nkolo, tobulisami na Liloba pe na Molimo na Nzambe, mpo na kobota mbuma ya elaka na Ye mpo na mokolo oyo. Pe bozali baoyo ya bango te! Nayebi ezali likambo moko ya makasi, kasi ezali Solo se ndenge moko. Babulisami mpo na mosala na mikolo ya suka oyo! “Bobima kati na yango.”

⁷⁰ Kasi, “malakisi ya Balame,” esakweli ya Balame te. Yango ezalaki malamumu. Yango ezalaki Nzambe. Boni bandimi yango? [Losambo balobi: “Amen.”—N.D.E.] Esakweli ya Balame ezalaki mpenza malamumu, mpo akokaki koloba eloko mosusu te. Epakweli ya Nzambe elingaki koloba eloko mosusu te, pe Nzambe atatulaki yango na kotalisáká yango polele ete ezalaki Solo. Kasi ezalaki “malakisi ya Balame.”

⁷¹ Sikawa bokokanisa yango na Matai 24:24. Bapakolami, kasi malakisi na bango ezali lokuta. Bosato bosantu, pe makambo nyonso ya motindo wana; lokuta, motemeli na Klisto!

Nakanisi bozali koyoka mitema na bino mpassi te. Pe bokanga yango te, ba-telephone. Pe botelema te mpo na kobima. Bofanda bobele kimia, pe totala soki Molimo Mosantu akomonisa biso yango te, pe kotalisa biso yango polele. Bokoloba: “Kasi yango. . .” Ata bondimaka soko nini, bofanda bobele kimia pe boyoka. Pe bosenga Nzambe afungola mitema na bino, bongo nde bokomona soki bozali nzube, to nsende, to esika nini botelemi. Bomoni?

⁷² Sikawa, ata Yuda, “abongisamaki liboso mpo na kosambisama,” azalaki wana liboso na Yesu. Pe Yesu alobaki na ye: “Ezali yo. Oyo nyonso olingi kosala, pe nyonso osengeli kosala, kenda kosala yango noki.” Ye ayebaki oyo ye azalaki kosala, kasi, mpo na palata ntuku misato, pe lokumu, atekaki Nkolo Yesu Klisto. Moko na bayekoli na Ye, mobombi misolo ya lingomba, Yesu abengaki ye “moninga” na Ye. Bomoni? Biblia elobi: “Abotamaki mwana na libebi,” ndenge moko lokola Yesu abotamaki Mwana na Nzambe. “Kopengwisa Baponami mpenza soko nde ekokoka.”

⁷³ Bolanda na bokebi wana tozali kokoba koyekola. Tokozua ndakisa mosusu, na Mokanda ya Mikonzi. Ezalaki na mosakoli moko, pe nkombo na ye ezalaki Mikaya. Azalaki mwana na Yimila, azalaki pe mosakoli. Ye azalaki.

Pe ezalaki na mosakoli mosusu, mokonzi ya ebongiseli ya basakoli, bapakolami. Biblia elobi ete bazalaki “basakoli,” ndenge moko lokola Alobaki ete Balame azalaki mosakoli, bapakolami.

Pe moko na bango azalaki na nkombo Mikaya, oyo apakolamaki na Nzambe pe atindamaki na Nzambe, ná Liloba na Nzambe.

Ezalaki na moko, Sedekiya, oyo azalaki kokanisa ete atindamaki na Nzambe. Apakolamaki na Nzambe, kasi malakisi na ye ekesanaki na Liloba na Nzambe. “Bakotelema, ba-Klisto ya lokuta, bakomonisa bilembo minene, ekopengwisa Baponami, soko nde ekoka.”

⁷⁴ Botala, bango mibale, bango mibale bapakólamaki. Sika, ndenge nini okokaki koyeba oyo ezalaki solo, pe lokuta? Botala eloko nini Liloba elakaki mpo na Akaba. Mosakoli oyo azalaki liboso na ye, ezalaki Eliya, moko na basakoli minene koleka ya eleko yango, ye azalaki mosakoli oyo atitolami. Mosakoli wana oyo atitolamaki alobaki, ete: “Lokola Akaba asalaki mabe oyo, ba-mbwa bakoleta makila na ye; lokola abomaki Nabota. Pe ba-mbwa bakolia Yezabele, pe na . . . nzoto na ye ekozala lokola nyei na bilanga.” Sikawa, ndenge nini okoki kopambola eloko oyo Nzambe alakeli mabe? To ndenge nini okoki kolakela mabe, ndenge Balame alobaki, eloko oyo Nzambe apamboli? Bomoni?

Kasi basakoli oyo bazalaki sembo. Bazalaki, na ntembe te, bato malamumu, bato na lokumu. Mpamba te, mpo na kozala mosakoli na Yisalaele, osengeli kozala moto na lokumu, to mpo na kozala ata mo-Yisalaele. Soki te, okobomama na mabanga. Bazalaki bato na lokumu. Bazalaki bato na mayele. Bazalaki bato batangá. Bazalaki bato baponami na Akaba, kati na ekólo. (Omoni yango, Ndeko mwasi Wright?) Baoyo baponami kati na ekólo, balongobani malamumu mpo na e- . . .

⁷⁵ Boye sikawa, ntango Mikaya azuaki emononeli na ye, ayebaki na motema na ye likambo oyo Liloba elobaki, kasi alingaki komona nini Molimo oyo ezalaki kati na ye ekoloba.

Bongo bayebisaki ye, balobaki: “Yo loba likambo ndenge moko basakoli mosusu oyo balobi. Pe ntango okosala yango, ee, okozala, na ntembe te, tokozongisa yo, lisusu, kati na lisanga na biso. Bomoni? Tokokómisa yo moko na biso. Tokozongisa yo na kati ya denomination na biso. Ozali . . . Toyebi ozali mosakoli, kasi yo olobaka ntango nyonso bilakeli mabe. Olakelaka ntango nyonso Akaba mabe. Kasi, Sedekiya, mokonzi, pápa, to mo . . .” ata azalaki nani. “Ye apambolaki Akaba, pe alobaki, ‘Kende kosala yango.’ Sika, yo loba ndenge moko, Yimila. Ee, ozali na yo bobele mobola ya moto. Ozali na yo ata na losambo te, ata moke te. Pe bato oyo bazali na ba-milio. Ekólo mobimba ezali mpo na bango. Sikawa yo loba ndenge moko ná bango, bongo okomona nini okosala, oko—okolia bozui ya mboka.” Azalaki kosolola na moto oyo ye ayebaki malamumu te!

⁷⁶ Bongo soki elobamaki: “Okoki komona mbeba moko na Sedekiya, Mikaya?”

“Te.”

“Okángá ye na lisumu?”

“Te.”

“Oyóká ye kofinga moto?”

“Te.”

“Okútá ye alangwi masanga?”

“Te.”

“Okoki kotia ntembe na boyebi na ye?”

“Te.”

“Okanisi diplome na ye ya doctorat ezali ya lokuta?”

“Te.”

“Ondimi Doctorat ya Philosophie na—na ye ezali ya malamú?”

“Na ntembe te. Epesami na likita ya ba-Sanedrin; nabanzi ezali ma . . . likita, nabanzi ezali malamú.”

“Ee, bongo, mpo na nini oboi kosangana na ye?”

“Mpo azali libanda na Liloba!”

⁷⁷ Ee, tokosukisa likambo yango, ntango wana, lokola Eliya mosakoli liboso na yango. Pe soki ozali mwana na Nzambe, okotikala na mosakoli ya Biblia oyo. Ezali Liloba. Botala ngonga, eleko.

⁷⁸ Ee, bongo soki Sedekiya alobaki: “Oh, nayebi mosakoli alobaki yango, kasi ezali mpo na ekeke ekoya. Ezali mpo na ntango molai kobanda lelo?”

Alobaki: “Bozela kino názua emononeli kouta na Nzambe, na sima nde nakoyebisa bino.”

Alobaki: “Na sima okoloba ndenge moko?”

Alobaki: “Nakoloba bobele oyo Nzambe alobi; eloko mosusu te, nakobakisa te. Nakoki kobakisa liloba moko na Yango te, to kolongola Liloba moko na Yango te.”

Bongo na butu wana, kati na libondeli, Nkolo ayaki epai na ye na emononeli. Na ntongo elandi, abimaki, alobaki . . .

Botala basakoli mibale!

⁷⁹ Moto monene koleka kati na ekólo, na miso ya basoda pe ya ekólo, ezalaki Sedekiya. Azalaki mosakoli-mokonzi, mpo na mokonzi. Azalaki mokonzi ya basakoli mosusu nyonso ya ebongiseli. Atiamaki, na ebongiseli na ye, lokola mokonzi na bango nyonso; ntango mosusu atangá malamú koleka, ayekola malamú koleka, aponamá mpenza mpo na mosala yango. Pe apakolamaki na Molimo Mosantu, mpo bazalaki kobenga ye “mosakoli.” Ya solo, bobele mosakoli mpamba te, azalaki mosakoli ya Baebele. Sikawa botala ye malamú.

⁸⁰ Sedekiya alobaki: “Nkolo asololi na ngai, ‘Salela Ngai maseke mibale ya ebende,’ elembo.” Mosakoli na momesano

apesaka bilembo. “Alobaki, ‘Bosala maseke oyo ya ebende.’ Molimo Mosantu ayebisi ngai, ‘Kamata yango,’ Epakweli oyo epambolaki ngai.” Bokanisa te ete ezali mpo na mbeka, kasi ezali mpo na kokóma na likambo moko. “Molimo Mosantu oyo alobaka minoko ya sika na nzela na ngai, Ye oyo atatolaki ngai, Alobaki, ‘Kamata maseke oyo, pe na nzela na yango, yebisa mokonzi ete akobengana Basulia libanda na mboka mpenza. Pe Nakozongisela ye mabele oyo elongobani kozala ya Yisalaele, lingomba.”

Ndeko, yango eteleme mpenza na mobóko, kaka ndenge ezalaki na Balame awa. Balame azalaki mpenza na mobóko ya likambo kaka ndenge Mose azalaki. Mose . . . Motango malamau ya Nzambe ezali nsambo. Pe Balame alobaki: “Botongela ngai bitumbelo nsambo; mbeka nsambo ya peto, bangombe mibali, pe bampate mibali nsambo.” Yangu ezali kotalisa boyei ya Mwana na Nzambe. Na mobóko ya likambo, azalaki mpenza na elonga lokola moto nyonso kati na bango.

⁸¹ Pe Sedekiya ye oyo, azalaki mpenza na elonga na kotala mobóko ya likambo: “Mpamba te mabele oyo ezali ya biso. Ee, Basulia pe Bafilistia bazali kotondisa mabumu na bango, ná ya bana na bango pe bongo na bongo, banguna na biso, na bilei oyo bana na biso bazali kozanga! Na ntango oyo, Nzambe apesaki biso mabele oyo!”

Ndeko, yango ezali maloba moko malamau. Nakanisi ete akokaki koloba yango polele liboso ya Yisalaele, pe bakokaki kogánga na makasi na bango nyonso. Sikawa, nazali koloba mpo na lelo. Nakanisi bozali kolanda ngai. Kogánga, pe kobelela nyonso oyo!

⁸² Bomikanisela Dawidi, na mokolo ya lomingo oyo eleki? Bomoni? Bino kuna, baoyo bokolandáká na ba-radio, to bipai bozali kolanda na nzela ya telefone; soki bozuaki Liteya ya lomingo eleki te, bosala nionso bozua yango. *Komeka Kosalela Nzambe Mosala Kozanga Kobongisama Mpo Na Kosala Yangu*, ata ozali sembo to malamau ndenge nini, Nzambe akoyamba yango ata moke te. Bomoni?

Sikawa, botala Sedekiya, akanisaki ete azali na elonga.

⁸³ Mikaya alobaki: “Botika natuna Nzambe.” Bongo, na ntongo elandaki ayaki na YANGO ELOBI NKOLO. Akokanisaki emononeli na ye ná Liloba.

⁸⁴ Sikawa soki álobaka na Sedekiya: “Oyebi likambo nini mosakoli ya Biblia alobaki ekokómela moto oyo?”

⁸⁵ “Kasi mpo na ntango oyo te, mpo moto oyo azali moto ya lokumu. Azali komeka.” Bózanga kososola likambo oyo te. “Azali komeka kozongisela lingomba biloko oyo ezali ya lingomba. Azali komeka kozongisela yango libula na yango,” makambo ya Molimo te; soki ezalaki bongo, alingaki koningisa ekólo wana mobimba lokola Eliya asalaki. Kasi, azalaki komeka

kopesa bango biloko ya mokili: “Tozali na libula ya biso moko. Tozali ebongiseli monene. Tozali bato na yango. Bisu nyonso, bino nyonso, bino ba-Protestant, bino nyonso bosengeli kosangana na biso elongo.” Ah-ah.

Tokokoma na likambo yango sima na ntango moke. “Bango nyonso bazali bandeko mibali pe basi, ata ndenge nini.” Ezali bongo te! Ezalá bongo te pe ekozaláká bongo ata moke te, ná Lingomba ya Nzambe ya solosolo. Ekoki kosalema te!

⁸⁶ Botala, amonaki emononeli. Bongo alobaki: “Nzambe asololi na ngai.” Sikawa, botala, moto yango azalaki sembo. Alobaki: “Alobaki, ‘Sala maseke oyo, pe belema liboso ya mokonzi pe kende ngambo yo westi,’” to ngambo nyonso ya etanda ya mboka longwa na esika oyo bango bazalaki. “‘Pusa, pe ekozala YANGO ELOBI NKOLO ete akolonga etumba pe akozonga, elonga mpo na lingomba.’ Akobengana bango libanda!” Epusani mpenza pene, boye te? Likambo yango ezalaki nini?

Mikaya abelemaki wana. Balobaki: “Sikawa yo pesa esakweli na yo.”

⁸⁷ “Kende! Kasi namoni Yisalaele lokola bampate, bapanzami, bazali na mobateli mpate te.” fiuu! Ekesanaki mpenza.

⁸⁸ Sikawa, bino nde bozali liyangani. Sikawa nani alobi solo? Bango mibale, basakoli. Lolenge bobele moko bokoki kokesenisa bango, ezali, kokokanisa yango na Liloba.

Alobaki: “Ozui yango ndenge nini?”

Alobaki: “Namonaki Nzambe afandi likolo na Ngwendé.”
Alobaki: “Namonaki likita mobimba zingazinga na Ye.”

⁸⁹ Sikawa, bobosana te, Sedekiya autaki koloba ete ye pe amonaki Nzambe, na Molimo yango moko. “Namonaki Nzambe. Ayebisaki ngai nasala maseke uta na—uta na ebende. Kende kuna pe bengana libanda mabota yango, mpo esika oyo ezali ya biso. Baoyo mosusu basengeli na yango te.” Balingaki kokoka soki bátikalaka sembo na Nzambe. Balingaki kozua yango, kasi batangwaki mosika na Nzambe.

Ezali bongo nde ebongiseli ezalaka, lingomba. Ezali na makoki na makambo oyo, kasi babotolaki bino yango na mayele mabe, mpo botangwi mosika na Liloba na Nzambe pe na Molimo na Nzambe, epakweli, mpo na kotatola Liloba ya eleko. Bozanga te kozua Liteya oyo.

⁹⁰ Botala sikawa likambo nini esalemaki. Alobaki: “Namonaki Nzambe,” Mikaya nde amonaki, “afandi na Ngwendé na Lola. Likita na Ye esanganaki zingazinga na Ye. Alobaki, ‘Nani tokoki kotinda mpo akende kopengwisa Akaba, mpo maloba ya Eliya ekokisama; mosakoli na Ngai oyo atitolamaki. Nalobaki ete akoya. Pe Eliya azalaki na Liloba na Ngai. Pe likolo pe nsé ekoleka, kasi Liloba na Ngai ekokweya te. Etali ngai te lolenge bato bakomi na makambo ya mikolo oyo, to lolenge bakomi

malamu, to lolenge bakomi na mayele koleka, to ndenge bakomi bato minene, Maloba na Ngai ekokweya ata moke te.’

“Pe molimo moko ya lokuta ebimaki uta na lifelo, ekweyaki na mabolongo, pe elobaki, ‘Soki Okoki kopesa ngai nzela, nakoki kopesa bango epakweli na ngai, kotinda bango kosala elemba to ekamwiseli ndenge na ndenge, bobele mpo námema bango libanda na Liloba. Akoyeba ata moke te ete Yango ezali Liloba na Yo. Akomona Yango mpamba, mpo na lokumu.’” Ndeko, bangonga ebongwani te. Ndeko Neville, ezali solo. Bobosana te, ezali solo. “Nakokita likolo na ye, kosalisa ye makambo moko oyo bamosusu oyo batikali bazali kosala. Nakosala ete ásakola, pe áloba lokuta.” Ekokaki kozala lokuta ndenge nini? Mpo ekesenaki na Liloba.

⁹¹ Bokamata moko na mabatisi ya lokuta oyo, makambo *songolo* ya lokuta, etali ngai te ata ezali koyokana lokola sóló ndenge nini, ata bazali komekola yango ndenge nini, ezali lokuta soki ekeseni na Liloba na Nzambe ya ntango oyo. Yango mpenza.

Okoloba: “Ee, ya biso, ee, tosalaki oyo, pe tosalaka oyo, pe losambo na biso ezalaka *lolenge oyo* pe *wana*.”

Ézala ndenge nini, etali ngai te. Soki ekeseni na Liloba oyo ekomami mpo na ntango oyo, ezali lokuta. Nzambe akozala na likambo moko ya kosala na yango te, ata bazali sembo ndenge nini, ata bayekoli boni, ata bazali na mayele ndenge nini, ata ezali komonana lokola solo ndenge nini, ata ezali komonana na molongó ndenge nini, soki ekeseni na Liloba ya ntango oyo. Tokokota moke na yango na mozindo moke koleka sima na miniti moke, soki ntango ekozala. Soki te, tokozongela yango na mpokwa oyo.

⁹² Botala, azalaki sembo, moto malamau, na ntembe te. Pe alobaki. . . Na bongo, na ndenge mosusu, Mikaya alobaki na ye, polele boye mpenza te na miso na ye, kasi na elobeli mosusu: “Opakolami na molimo moko ya lokuta.” Kolobela episkopo likambo yango elingaki mpenza kozala likambo moko boye, boye te? Kasi asalaki yango.

⁹³ Na bongo episkopo yango abelemaki pe alobaki: “Okozala lisusu na boyokani na bandeko ata moke te,” pe abambolaki ye mbata na elongi. Alobaki: “Oyebi ete ngai nazali moto oyo atatolami. Lingomba na ngai ekomisaki ngai mokonzi na yango, likambo oyo. Kopona ya libota na Nzambe nde ekómisi ngai boye. Ebongiseli na ngai nde ekómisi ngai boye. Pe Nzambe apesaki biso mabele oyo, pe mposa na Ye ezali ete ézala ya biso. Pe nazali na YANGO ELOBI NKOLO.” Abambolaki ye, pe alobaki: “Nzela nini Molimo na Nzambe alekaki, ntango Atikaki ngai?”

⁹⁴ Mikaya alobaki: “Okoyeba yango, moko na mikolo oyo,” ntango Californie ekozinda na nse na mai-na-mbu kuna, pe

makambo nyonso oyo. Bomoni? “Okomona nzela nini Yango ekendaki, ntango okofanda na ba-boloko ya kati mpenza.”

⁹⁵ Sikawa, Akaba, okoloba nini? Alobaki: “Nandimi mosakoli na ngai.” Bongo soki ye álukaka kati na Liloba? Bomoni, alingaki komilakela mabe te. Boyoka ngai! Alingaki komilakela mabe te. Moto moko te alingaka yango.

Pe ndeko na ngai ya ebongi-...ebongiseli, yango nde likambo ná yo. Olingi kokanisa ete ozali na solo, na ntango, oyebi na motema na yo ete, ntango ozali kobatisa na nkombo ya “Tata, Mwana, Molimo Mosantu,” ozali kokosa. Oyebi ete ntango osako-...olobi makambo ozali kosala, pe okamati bilembo ya liboso, pe makambo nyonso wana, ozali na libunga. Ndenge nini elembo ya liboso ekoki kozala minoko na sika, bongo na sima óloba makambo ekese ni na elaka ya Nzambe mpo na ntango oyo? Ekoki kosalema ndenge nini? Oboyi elakeli mabe, boye te? Kasi, *Awa* ekomami, ekozala pe bongo. Wana ezali elembo na nyama, ekozala pene koleka mpo na kopengwisa Baponami, soko nde ekokoka.

⁹⁶ Elembo nyonso, ekamwiseli nyonso, moto apakolami, lisakoli, makambo ndenge na ndenge ekosalema; bilembo ya ndenge na ndenge, bikamwiseli ya ndenge na ndenge, ndenge nini bokoyeba kokesenisa yango? Botala malamú Liloba mpo na ntango oyo. Ezali ndenge wana nde bokozua . . .

⁹⁷ Botala malamú Mose, lolenge oyo akokaki kolobela Balame. Botala malamú Mikaya awa, ndenge nini toyebaki ete azalaki na solo? Liloba, liboso na ye, esakoláká yango na ntina na Akaba.

Pe Liloba, liboso na biso, esakolaki na ntina na bibongiseli ya mikolo oyo, pe elakeli mabe oyo ezali likolo na bango. Pe makambo oyo ekosalema na nzela ya Lingomba na Ye oyo epakolami solo, akozala na Liloba, Mwasi-na-libala Liloba. Bisó oyo. Yango oyo, lelo, bobele ndenge ezaláká na eleko wana.

⁹⁸ Biblia elobi: “Likambo nyonso endimama na monoko ya batatoli mibale to misato.” Nalobelaki Balame, nalobelaki Balame pe Mose. Pe nalobeli sikawa Mikaya na Sedekiya. Sikawa nakobakisa moko lisusu. Boye, bazali monkama na monkama, kasi moko lisusu, mpo na kokokisa batatoli misato. Nazali na molongó mobimba ya bato yango ekomami awa; kasi mpo na kobatela ntango.

⁹⁹ Yilimia, oyo atatomaki, aboyamaki, kasi azalaki mosakoli oyo atatomaki na Nzambe. Bayinaki ye moto yango. Bambaki ye mbuma mo-...oyo etela mingi, pe nyonso wana. Pe alakelaki bango mabe. Bongo makambo ye asalaki, pe amilalisaki wana na ngambo moko, pe nyonso, pe apesaki bilembo kotalisa ete Yisalaale azalaki na libunga.

Mosakoli nyonso, mosakoli ya solo oyo atindamá na mokili, alakélá mabe bibongiseli ya denomination ya lingomba

yango. Ndenge nini yango ekoki kobongwana, na Nzambe oyo abongwanaka te?

¹⁰⁰ Molimo Mosantu azali Mosakoli ya ntango oyo; Ye nde azali kotatola Liloba na Ye, kotalisa Yango polele. Molimo Mosantu azalaki Mosakoli ya ntango na Mose. Molimo Mosantu azalaki Mosakoli ya ntango na Mikaya. Molimo Mosantu, oyo akomaki Liloba, ayaka pe akokisaka Liloba.

¹⁰¹ Sikawa likambo nini esalemaki na ntango ya Mikaya? Akaba abomamaki, pe ba-mbwa baletaki makila na ye, kokokana na Liloba ya Nzambe.

Bino balakisi nyonso ya lokuta, Nzambe alobi bongo, mokolo moko bokobuka oyo bozali kolona, bino bakambi bakufi miso ya bakufi miso! Nasiliki te. Nazali kaka kolobela bino Bosolo. Pe nakokaki koloba yango te, soki awa boye, na eteni ya ndako wana, soki Molimo Mosantu alobaka te ete: “Loba yango ndenge wana.” Nasila koyebisa bino likambo moko ya lokuta, oyo Nzambe atatólá te ete ezali solo? Bolamuka, bandeko na ngai, liboso ntango esila!

¹⁰² Kasi botika náloba boye. Ndenge nini nzube ekoki kolamuka pe kokoma nsende, na ntango ebongisámá libonso mpo na yango? Ndenge nini Baponami bakoki kozanga komona yango? Ezali solo, boponami mpo bómona yango. “Baoyo nyonso Tata apesi Ngai bakoya epai na Ngai,” elobaki Yesu, “kasi moko te kati na bango akoki koya, soki Ye apesaki Ngai yango te liboso na kozalisama na mokili, ntango ba-nkombo na bango ekomamaki na Buku na Bomoi ya Mwana na Mpate,” kati na buku ya lingomba te, kasi na Buku, Buku ya Bomoi ya Mwana na Mpate.

¹⁰³ Botala, Yilimia atelemaki, atatolamaki liboso na bato, ata bongo bayinaki ye.

¹⁰⁴ Na bongo babimaki pe basalaki ekanganeli, asalaki yango, pe atiaki yango na nkingo na ye, pe akendeki liboso na bato. Balobaki: “Oh, tozali libota monene ya Nzambe. Ee, tozali Yisalaele. Tozali sembo mpenza na eyanganelo na biso! Tokendaka losambo mokolo ya Lomingo nyonso, biso, topesaka mbeka, pe topesaka misolo na biso. Ndenge nini Nabukadanesala akoki bongo kokanga biloko na bulee ya Nzambe?” Hah! Masumu na bino nde esalaki yango.

Nzambe alobaki: “Soki bokobatela malako na Ngai, Nakosala yango te. Kasi soki bokobatela yango te, ekokómela bino.” Ezali mpenza solo. Ezali bobele ndenge moko. Bobatela malako na Ye, Liloba na Ye ya ntango, oyo Ye alakaki.

¹⁰⁵ Sikawa botala. Bongo, Yilimia, na mokano na Nzambe, mosakoli oyo atatolamaki, ata ayinamaki... Bango nyonso bayinamaki na mikolo na bango. Basalaki makambo ya ndenge mpenza oyo ekeseneki na denomination ya ntango wana, moto nyonso ayinaki ye, ata bankumu pe bamosusu nyonso. Bongo amitiaki e—ekanganeli na nkingo, pe alobaki: “YANGO ELOBI

NKOLO. Bokokende kuna mpo na mibu ntuku nsambo,” mpo azalaki na lisosoli kouta na Liloba na Nzambe. “Mibu ntuku nsambo!”

¹⁰⁶ Bongo Hanania, Hanania, nabanzi botangaka yango, H-a-n-a-n-i-a. Hanania, mosakoli katikati na bato, ayaki, alongolaki ekanganeli na nkingo ya Yilimia, pe abukaki yango. Pe alobaki, azalaki moto monene kati na bato, bomoni, na ntango oyo azalaki koloba kokesene na Liloba na Nzambe. Pe alobaki: “Sima na mibu mibale bakozonga. YANGO ELOBI NKOLO.”

Basakoli mibale bapakólami. Bokeseni nini ezalaki kati na bango? Moko azalaki koloba Liloba, pe mosusu azalaki na yango te. Yilimia alobaki: “Amen.”

¹⁰⁷ Liboso na bampaka nyonso pe liyangani, Yisalaele mobimba, bomoni, alingaki kotalisa ete akokaki kozala monene lokola Yilimia. “Oyebi ete balingaka yo te, ata bongo. Boye ngai pe nazali mosakoli. Nazali mosakoli koleka yo, mpo yo ozali kosakola lokuta. Olobi na ngai ete libota na Nzambe ekoleka na likambo *boye-na-boye*?”

Yango nde bákoloba lelo, kasi bokozala wana bobele ndenge moko, lokola lingomba. Bolakelami mabe na elakeli mabe. Bino nyonso mangomba, ba-denomination bazali kokangana na mimesano na bango ya bato na esika ya Liloba na Nzambe, bolakelami mabe na Nzambe.

¹⁰⁸ Sikawa botala, ye wana ayei. Hanania alongoli ekanganeli yango na nkingo na ye, elembo ya Nzambe, abuki yango, pe alobi: “YANGO ELOBI NKOLO. Bakozonga sima na mibu mibale.” Bobele mpo na komilakisa: “Ngai nde *Songolo*.” Mpo azuaki esika yango, ye azalaki mosakoli ya ebongiseli.

¹⁰⁹ Yilimia azalaki moto ya lisobe oyo azalaki kobika ye moko. Azalaki ntango nyonso kosakola mabe mpo na bango, mpo bazalaki mabe.

Pe moto oyo azalaki koyebisa bango: “Oh, bozali na lkambo te na ntango nyonso oyo bolongobani. Na ntango nyonso oyo bozali Yisalaele, yango nde nyongo oyo esengeli. Bomoni, bino, biso. . . Nzambe akosala yango te. Nayebi ete likambo moko ya moke esalemaki awa, kasi bolenga-lenga te, bobanga te.”

Ah, ndeko, bazali na bomoi kino lelo. “Bomitungisa te, makambo nyonso ezali malamumu. Makambo nyonso ezali na maboko na biso. Tozali Lingomba.” Bokanisa bongo te. Iyo.

¹¹⁰ Bongo alobaki: “Makambo nyonso ezali malamumu. Bakozonga sima na mibu mibale. Likambo moko moke yango esalemaki. Ezali eloko moko ya sika te. Tozalaka na yango. Ezali kaka Nebukadanesala nde ayei awa, kasi Nzambe na biso akolandela likambo yango nyonso.”

Kasi Liloba elobaki ete bakozala kuna mibu ntuku nsambo; kino libota wana ekolimwa, pe libota mosusu. Mibu ntuku minei

ezali libota moko. “Ekozala pene na ntango ya mabota mibale oyo bokozala kuna.” Pe Yilimia alobaki yango kokokana na Liloba na Nzambe.

¹¹¹ Hanania abukaki yango! Yilimia alobaki: “Malamu. Amen. Kasi, Hanania, tomikanisela likambo oyo, biso mibale tozali basakoli. Tozali batei.”

Pe naye bisi yo boye, ndeko na ngai. Tobosana te ete ezalaki na basakoli liboso na biso, pe basakolaki kotelemela bokonzi, pe basakolaki kotelemela makambo mosusu. Kasi, kobosana te, ntango mosakoli azalaki koloba likambo songolo, asengeli kosakola kokokana na Liloba. Ndakisa Mikaya, pe Mose, pe baoyo mosusu. Esengeli kokokana na Liloba. Soki te, boye bokanisa nini oyo esalamaka.

¹¹² Na sima, Hanania, nkanda na ye ya sembo emataki. “Ngai nde Hanania” (na ntembe te), “mosakoli na Nkolo, pe nalobi, ‘Mibu mibale.’” Na elobeli mosusu: “Oyo Liloba elobi etali ngai te.” Epakweli na ye: “Nalobi, ‘Sima na mibu mibale, bakozonga.’”

¹¹³ Yilimia alongwaki liboso na ye, abimaki pe alobaki: “Nkolo, oyo ye alobi etali ngai te, nazali kokoba kondima pe naye bi ete Liloba elobi bongo. Nakotikala sembo epai na Yo. Nakopengwisama na ye te.”

¹¹⁴ Nzambe alobaki: “Kende koloba na Hanania: ‘Ekanganelo ya sima, Nakosala yango na ebende.’” Pe lokola asalaki yango, alongolamaki na mokili, Hanania, na mobu moko wana.

Wana ezali bandakisa na biso, bango mibale basakoli yango. Boye makambo ebele lisusu koleka ekoki kolobama pe kolobelama na ntango oyo.

¹¹⁵ Kasi botala malamumu. Yesu alobaki, ete, na ntango ya suka oyo, lisusu, milimo yango mibale ekozala lisusu mpenza pene pene. Ezali solo? [Losambo balobi: “Amen.”—N.D.E.] Sikawa botala. Ekozala pene koleka ndenge ezaláká. Oyo nde ntango ya suka. Ah, bana! Nzambe ayokela biso mawa! Kino : “Ekozala kutu mpenza komonana solo kino ekopengwisa Baponami mpenza soki nde ekokoka.” Sikawa ndenge nini boko. . . ndenge nini toyebaki yango na mikolo wana? Ndenge nini bokoyeba yango lelo? Lolenge moko, botikala ná Liloba: “Yesu Klisto motindo moko lobi, lelo, pe libela.”

Sikawa bozala na bokebi na Nsango nyonso oyo. Pe na ntango bokoyoka bande, ata ntango mosusu mokolo moko nakozala nasi nakendá, ntango Nkolo akosilisa na ngai awa na mokili, bokozongela likambo oyo. Boyoka mongongo na ngai, nini nazali koyebisa bino. Soki Akamati ngai liboso ya Boyei na Ye, bomikanisela, nalobeli na bino na Nkombo na Nkolo, na nzela ya Liloba ya Nkolo. Iyo.

116 Botala: “Ekozala mpenza pene kino ekopengwisa ata Baponami soki nde ekokoka,” bakosala bilembo ndenge moko, bikamwiseli ndenge moko, na nzela ya Molimo yango moko. Ezali sóló? [Losambo balobi: “Amen.”—N.D.E.] Bobele ndenge basakoli bazalaki, baoyo touti kolobela bango, basakoli. Sikawa, ekomami pe lisusu. . .

117 Totanga yango, mpo na oyo, soki bolingi, Timote ya Mibale 3. Totika oyo te. Pe nalingi te ko. . .

118 Nazali kotala sáa oyo kuna, pe na—nalingi kotika makambo mingi pembeni, pe nandimi te ete tosengeli kosala yango sikawa. Bomoni? Botala. Bobele. . .Soki natelempi awa, ná ndenge nazokotoka, bomoni, kasi nazali na esengo. Pe nayebi ete oyo ezali solo. Timote ya Mibale 3:8.

119 Polo, moto oyo alobaki: “Soko Mwanje auti na Likolo pe alobeli bino liloba mosusu oyo ekeseni na oyo ngai nalobaki, alakelama mabe,” sikawa, Mwanje moko akitaki. Wana ezali Batesaloniki ya Mibale. . . Ah, bolimbisa ngai.

120 Botala na Timote ya Mibale 3:8. Botala malamumu, Polo azali koloba sikawa. Tobanda pene na. . .Tobanda na molongo ya liboso, pe boyoka sikawa na bokebi mpenza. Bino baoyo bozali na Biblia na bino, botanga elongo na ngai. Bino baoyo bozali na Biblia te, boyoka na bokebi. Yango. . .

Kasi ososola likambo oyo ete, na mokolo na suka. . .

Botia ndelo na nse na yango: “mokolo na suka.” Ezali na ntango wana nde ekosalema.

. . .ntango na mpasi ekoya. (Tozali kati na yango.)

Zambi bato bakozala bamikumisi na bango mpenza, baluki na mosolo, bato na lolendo, bato na ngambo, batuki, bato bazangi kokumisa baboti, bato bazangi matondi, bato bazangi bulee,

121 Botala etóngá oyo tozali na bango lelo, bapolá. Ata kati na mibali kuna na balabala, bilenge mibali, bazali kokitisa suki na elongi na bango, ná malénda lokola basi. Libebi! Bato ya Sodoma!

122 Botangaki na *Reader's Digest* ya mobu oyo, ya sanza oyo? Elobaki: “Bato ya Amerika oyo bakomi katikati na mibu,” nakanisi ezalaki bongo, “katikati na mibú ntuku mibale ná ntuku mibale na mitano, basili kokota na lolenge mibu na bango ya bato mikolo.” Basili kosila! Basili kobeba! Bato ya science nde balobi yango, ete mobali azali kokóma mokolo, mwasi pe, ntango bazali na ebandeli ya mibu ntuku mibale. Nzoto na bango ebebi mpenza pe emipesi na mbindo.

123 Eh, Amerika, mbala boni Nzambe alingaki kozipa yo na mapapu na ye, kasi sikawa ngonga na yo esili kokoka! Ozali kokamba mokili na makambo ya mbindo.

...batuki, bato bazangi kokumisa baboti, bato bazangi matondi, bato bazangi bulee,

Bato bazangi bolingo, . . .

Bolingo ya solo ezali te ata mpo na moto moko epai na mosusu, mobali mpo na mwasi, mwasi mpo na mobali. "Ata bolingo na bato ezali te." Mbindo, koyebana nzoto!

...bato bazangi boboto, batongi, batomboki, bato na yauli, pe bayini na malamau,

Na elobeli mosusu, toloba: "Bino, etóngá ya batuntuki." Moto moko atunaki mokolo mosusu, mpo na koya awa na losambo. Balobelaki ye: "Kokende kuna te. Nyonso kuna ezali bobele makelele mingi pe yikiyiki."

Bomoni, "bayini na baoyo."

Bakosi, bato na nko, bato bavimbi na lolendo, baoyo bakolingaka bisengo na bango mpenza koleka bolingo epai na Nzambe,

Bokoloba: "Ndeko Branham, oyo wana ezali ba-koministe." Molongó elandi elobi nini?

Bato bazali na lolenge ya kosambela, kasi (nini?) nde bazali kowangana nguya na yango: (Liloba, Yesu Klisto motindo moko, lobi, lelo, pe libela, oyo amonisami, elaka ya mokolo). . .

Bobele ndenge moko mpenza lokola Hanania, bobele ndenge moko mpenza lokola Sedekiya, bobele ndenge moko mpenza lokola Balame, kuna, na basakoli mosusu ya lokuta.

Bato bazali na lolenge na kosambela, (bapakolami . . . Bomoni?)

Bato bazali na lolenge, (bapakolami, batei oyo bandimami . . .)

Bato bazali na lolenge na kosambela, nde bazali kowangana (ete Azali motindo moko lobi, lelo, pe . . . Bazali kowangana Liloba na Ye!)

Ndenge nini bawanganaki Yesu na eleko wana? Bawanganaki Nani ntango bawanganaki Yesu? Liloba. Bazalaki basambeli. Bazalaki koteya uta na Biblia na bango, kasi bawanganaki Liloba ya mokolo yango.

Bazali nini lelo oyo? Ndenge moko, bapakolami, bazali koteya Nsango Malamau ya pantekote, kasi bazali kowangana elaka ya mikolo oyo, ya Liloba oyo ezali kotatolama: "Yesu Klisto motindo moko lobi, lelo, pe libela." Bomoni yango? [Losambo balobi: "Amen."—N.D.E.]

Mpo ete bamosusu bazali kati na bango oyo bakotaka na bandako ya bato, pe bakosaka...basi bazangi mayele, oyo batondi na lisumu, bakambami na mposa ndenge na ndenge,

“Mayangani na biso ya kosona bilamba pe makambo na biso ya *boye-na-boye*.” Moto moko ayei wana, ákomeka kolimbola Liloba mabe, pe koloba boye: “Ézali likambo te, ndeko mwasi, mpo na yo kozala na suki mikuse. Bolanda makambo ya zoba wana te. Bomoni? To, soki o—olati *oyo*; ezali *oyo wana* te, ‘ezali oyo ebimaka na motema ya moto nde ekomisaka ye mbindo.’” Bomoni? Pe ozali koyeba ete opakólami na molimo mabe, ya bilulalula, ya mbindo? Etali ngai te, okoki koyemba na korále, na suki mikuse, kasi ozali na molimo mabe. Yango ekeseni na Liloba. Ya sóló. Yango nde Biblia elobi. Pe okoloba: “Ee, nalataka ba-kupe. Esalaka ngai mabe moko te na motema.”

“Ézala nani, soki mwasi alati elamba ya mobali, ezali mbindo na miso na Nzambe.” Nzambe oyo abongwanaka te nde alobi yango.

¹²⁴ Oh, makambo ebele mpenza, tokosilisa yango lolenge nini? Ekosilisa ntango na biso nyonso. Kasi bozali na boyebi ekoki mpo na kososola solo pe lokuta. Ndenge nini nakoki kosala ete basala yango? Pe nakosala ndenge nini? Bokoloba: “Ee, Eloko nini yango ozali kogángá boye?” Nazali motatoli kotelemela bino. Mokolo moko, na Mokolo ya Kosambisama, bokozua esika ya komibomba te.

¹²⁵ Ndenge nini Mikaya akokaki kopekisa likambo yango? Ndenge nini Mose, na kogangáká, amekaki kopekisa yango? Pe Yoshua ná bango bapotaki-potaki na kati ya bato? Ata Lewi abimisaki mopanga na ye pe abomaki kutu bango? Bakobaki na bango bobele bongo.

Esakolamaki ete bakosala yango. Pe bakosala yango, mpo ezali YANGO ELOBI NKOLO bakosala yango. Bokanisi kolobela makambo nyonso wana ekotikaláká kopekisa badenominations na bango mpo bazonga na Liloba? Ezali YANGO ELOBI NKOLO, bakosala yango te! Bakozua nde ngambo ya motelemeli na Klisto? Bongo mpenza. Ezali YANGO ELOBI NKOLO, bakosala bongo! “Boye mpo na nini ozali kolobela yango?” Nasengeli kozala motatoli, bino pe lokola, bandimi nyonso. Botala malamumu.

. . . basi bazangi mayele, baoyo batondi na . . . mposa ndenge na ndenge,

¹²⁶ “Ee, basi mosusu nyonso basalaka yango.” Basakoli ya lokuta! Sikawa boyoka. Nazali kolobela basakoli ya lokuta. Sikawa, eloko nini bakosala na mikolo ya suka?

. . . bakokosa basi bazangi mayele . . . oyo bakambami na mposa ndenge na ndenge,

“Ee, nayebi ete basi mosusu nyonso . . .” Malamumu, bokende liboso.

¹²⁷ Nalobaki nini liboso likambo monene oyo esalema awa na Californie? “Bino bato bozali awa na Los Angeles, mobu nyonso

ntango nazongaka, ezalaka na basi bakata suki pe mibali lokola basi ebele koleka ndenge bazalaki liboso, batei mingi koleka bazali kokota na bibongiseli. Bozali na eloko ya kolongisa yo te! Soki misala na nguya oyo esalemaki na Sodoma pe Gomola esalamaki kati na bino, mbele bakokaki kozala naino kino lelo oyo. Eh, Kapalanauma, yo oyo omipesi nkombo ya banje, Los Angeles!” Bomoni likambo nini ékosalema? Ekozinda kino na nse na mai-ya-mbu. Ntango nini? Nayebi te ntango nini ekosalema, kasi ekosalema. Bino bilenge, soki namoni yango na eleko na ngai te, bino bosenzela. Esili mpo na ye!

Baoyo bandimi koyekola, . . . nde bakoki kokóma ata na boyebi na makambo na solo te.

Sikawa, likambo ya mpasi yango oyo, eteni oyo nde ezali kopesa mpasi. Boyoka yango.

Lokola Yane pe Yambele batemelaki Mose, bongo baoyo bazali koboya makambo na solo; bato na makanisi mapoli, pe bapengwi mpo na kondima oyo epesamelaki babulami mbala moko mpo na libela, yango nde.

“Mpo na Kondima.” “Pe akozongisa Kondima ya ba-tata, to ya bana, epai na ba-tata.”

¹²⁸ “Bapengwi mpo na Kondima.” Ha! Boyebi eloko nini *bapengwi* elingi koloba? Soki bozali na Biblia Scofield, *h* moko ezali wana. Bobele likolo wana, elobi, “botomboki.” Botomboki, nde oyo yango ezali.

¹²⁹ Sikawa, bozela miniti moke. Nalingi kotala likambo moko awa. Nakanisi nakomaki yango malamumu. Nayebi mpenza te, kasi nalingi koloba yango, pe natala yango malamumu liboso na—naloba yango. Sikawa, bozela miniti moke. [Eteni oyo ezangi maloba na bande—N.D.E.] “Bapengwi mpo na Sóló, mpo na Kondima.” “Kondima,” ezali bobele na Kondima moko. Ya sóló. “Mpo na Kondima, bapengwi!”

Sikawa nalingi kotanga Luka 18. Bozela miniti moke. Bozali te na . . . Bokoki kokoma yango; bosengeli kotanga yango te.

Alobaki na bango lisesse moko na ntina ete ekoki na bango kobondela ntango nyonso pe . . . kolemba te.

Alobaki—alobaki ete, Mosambisi azalaki na mboka moko, oyo abangaki Nzambe te pe akanisaka moto te.

Nde na mboka yango moko, mwasi oyo akufeli mobali azalaki, pe ayaki epai na ye pe alobi ete, Longisa ngai na ntina na moyini na ngai.

Na liboso—na liboso aboi, nde na nsima alobi na motema na ye ete, Ata nabangi Nzambe te pe nakanisi moto te,

Nde mpo ete mwasi oyo atungisi ngai, nakolongisa ye, ete alembisa ngai na koya . . . boye te.

Nkolo alobaki ete, Yoka yango elobi mosambisi mabe.

Nzambe akolongisa baponami na Ye...te, baoyo bazali kobianga ye moi na butu epai na ye, pe baoyo azali koyoka bango na motema molai?

Nalobi na bino ete akolongisa bango nokinoki. Kasi wana ekoya Mwana na moto, akokuta kondima awa na nse?

¹³⁰ Bongo motuna yango wana. Botala epai nalingaki kokóma: Na Emoniseli 10 (Tokokoma na yango sima na ntango moke, kolobela Likomi mosusu.), Alobaki: “Na mikolo ya Nsango ya mwanje na nsambo, libombami na Nzambe *esengeli* kosila.” Motuna yango oyo, ezali, soki bolandi molongó ya likanisi yango na ntango oyo, yango *ekosilisama*? “Nakokuta Kondima?” Malaki 4 ekokokisama na ntango oyo: “Kozongisa Kondima ya bana, na Kondima ya ba-tata, ya ebandeli, Liloba”? Bomoni?

¹³¹ “Bapengwi, Yambele pe Yane, lokola batelemelaki.” Sikawa, lisusu, boyoka, Timote ya Mibale 3:8. “Lokola Ya... batelemelaki Mose, ndenge moko pe na mikolo na suka, bapengwi moko oyo bakoya,” sikawa botala esika Elobami awa: “bato bazali na lolenge ya kosambela,” bapakolami. Sikawa, naino, to... Bozongela pe—pe botanga yango ntango bokokóma na ndako, mpo nakoka kosilisa likambo oyo, na ntango oyo, soki nakokoka. “Bapengwi mpo na...” Bapengwi te na—na—na lolenge ya kobika; bazali bato malamú, bato ya mayele.

¹³² Sikawa, botala, ntango Mose akitaki na Ezipito, ná nsango ya YANGO ELOBI NKOLO, pe atamolamaki; abengaki Yisalaele, oyo ezalaki libota, lingomba te. Yisalaele ezalaki libota; bazalaki lingomba ata moke te. Mpamba te, liloba oyo *lingomba* elingi koloba “baoyo babengami libanda na.” Bazalaki libota na Nzambe. Na sima, ntango bapakólamaki na Liloba, pe babengamaki libanda na, bakómaki lingomba na Nzambe. Na sima, bazongaki sima, mpo bandimaki Liloba na Nzambe te, pe bayokaki mosakoli moko ya lokuta. Nákolikya ete likambo yango ekoti na bozindo.

Yisalaele, lokola libota na Nzambe, babimaki na nse na loboko ya Nzambe, bapakólamaki na Liloba...na Nguya ya Nzambe, bamonaki bilembo pe bikamwiseli ya Nzambe. Pe na sima, ntango Nzambe azalaki kotambola elongo na bango, mosakoli moko ya lokuta ayaki, mopakolami, pe ateyaki likambo moko ekesanaki na Liloba na Nzambe ya ebandeli, oyo bayokáká; pe bango nyonso bakufaki na biliki, longola bato misato. Sikawa, bosimba yango.

¹³³ “Pelamoko ezalaki na mikolo na Nowa, epai wapi bato mwambe babikisamaki na nzela na mai, ekozala pe bongo na boyei ya Mwana na moto.” “Pelamoko na mikolo na Lota, ntango bato misato babimaki na Sodoma, ekozala pe bongo, na ntango oyo Mwana na moto akomonisama.” Nazali bobele kotanga

Makomi, Liloba ya Nkolo, oyo: “Likolo pe nsé ekoleka...” Ekozala bato moke!

¹³⁴ Botala awa. Mose akendeki epai na Alona. Mose asengelaki kozala Nzambe. Nzambe alobaki na ye ázala Nzambe, alobaki: “Yo okozala Nzambe, pe ndeko na yo Alona akozala mosakoli na yo. Okotia maloba na monoko na ye soki oyebi koloba malamumu te.” Alobaki: “Nani asalaki ete moto ázala emimi? Nani asalaki ete moto áloba?” Ezalaki Nkolo.

Pe akendeki kuna. Eloko nini asalaki? Asalaki likamwisi moko ya solo pe ya sembo oyo Nzambe alobaki na ye ásala. Nzambe alobelaki ye: “Kende kobwaka lingenda na yo na nse.” Alokotaki yango, pe ekómaki nyoka. Alokotaki yango, pe ezongaki lingenda. Alobaki: “Kende kosala yango liboso na Falo, pe loba, ‘YANGO ELOBI NKOLO.’”

¹³⁵ Pe ntango Falo amonaki yango, toloba: “Ee, oyo kisoloka moko ya mpamba-mpamba.” Alobaki: “Eloko moko ezali wana te. Ezali botangi makanisi to likambo moko boye, boyebi. Tozali na bato na ebongiseli na biso, oyo bakoki kosala likambo yango moko. ‘Yaka awa, Episkopo *Songolo-pakala*. Yo, pe, yaka awa.’ Tozali na bato bakoki kosala likambo moko yango.” Oyo wana ezalaki Satana nde azalaki koloba na nzela ya Falo.

Oyo wana ezalaki Nzambe nde azalaki koloba na nzela ya Mose.

¹³⁶ Kasi botala malamumu yango koya. Yane pe Yambele babimaki liboso na Mose, pe polele liboso na bato, pe basalaki bikamwiseli nyonso oyo Mose akokaki kosala. “Bakopengwisa ata Baponami mpenza soko nde ekokoka.” Ezali solo? Basalaki likambo moko oyo Mose asalaki. Bososoli yango? Sikawa, bobosana te, ezali YANGO ELOBI LIKOMI, ete ekosalema lisusu na mikolo ya suka.

Bokeseni nini ezalaki kati na Mose pe Yambele?

Mose alobaki: “Tika makila ezala kati na mai.”

Pe basakoli ya lokuta oyo balobaki: “Sóló, biso pe tokotia makila na kati ya mai.” Pe esalemaki.

¹³⁷ Bongo Mose alobaki: “Tika ba-sili eya.” Azalaki kozua yango wapi? Mbala moko uta na Nzambe. Bomoni?

Pe asalaki nini? Alobaki: “Ee, na ntembe te, tokoki pe koyeisa ba-sili.” Pe basalaki yango. Bikamwiseli nyonso oyo Mose akokaki kosala, bango pe bakokaki kosala yango!

Bobosana te, bosimba yango na makanisi, tolingi kokóma na yango, sima na ntango moke. Bakoki kosala nyonso oyo baoyo batikali bakoki kosala, kasi bakoki kotikala na Liloba te. Bakoki kotikala na Liloba te.

¹³⁸ Sikawa botala, basalaki yango. Kasi Mose, mosakoli ya solo oyo atindamaki na Nzambe, oyo apesamaki lotomo na Nzambe,

awelanaki na bango soko moke te, alobaki: “Tala, bokoki kosala yango te! Bokokoka te!” Atikaki bango basala, atikaki bango bakoba. Bazali basakoli ya bibongiseli, kasi bakende liboso.

Mose akobaki nzela na ye, ayokaki Nzambe. Nyonso oyo Nzambe alobaki: “Sikawa sala *boye*,” Mose akendeki pe asalaki yango. Asalaki eloko moko ya sika. Ntango basalaki yango, moko na moko na bango balengaki-lengaki to eloko moko bongo, tala bango wana bayaki. Basalaki yango, pe, bobele mpenza ndenge Mose asalaki.

¹³⁹ Sikawa botala. Bato yango bamonanaki. . . Oh, baninga, bozanga likambo oyo te! Bakosi oyo, bamekoli, bamonanamaki sima na oyo ya solo esilaki kosalema liboso. Bomoni? Bayaki mpo na komekola. Bomoni, basengeli kosala bongo. Zabolo akoki kokela eloko moko te; ye azali bobele mobebisi ya oyo ya ebandeli.

Pe lisumu ezali nini? Ezali boyengebeni oyo ebebisami. Ekobo ezali nini? Likambo ya sembo oyo ebebisami. Lokuta ezali nini? Solo oyo etalisami mabe. Kobebisama!

Botala Hanania, bobebisami ya Liloba ya ebandeli. Botala Balame, bobebisami ya Liloba ya ebandeli. Botala Sedekiya, kobebisama ya Liloba ya ebandeli.

Pe Biblia elobaki ete bato oyo bakoya, sima mobebisi. . . to mpo na kobebisa Liloba ya ebandeli oyo etatolami pe etalisami polele ete ezali Sóló.

¹⁴⁰ “Sala mosala na mopalanganisi-nsango-malamu,” oyo ezali kuna na litumu, “sala mosala na yo na mobimba. Mpo ntango ekoya oyo bato bakolinga koyoka Mateya ya sembo te, kasi bakolanda ba-mposa na bango moko, pe bakomilukela balakisi ebele, mpo bateya bango bobele makambo balingi koyoka, na sima, bakoba kosala makambo balingi, pe, ‘Ezali likambo te, tozali na bilembo pe bikamwisi ndenge moko.’ Bakoboya koyoka makambo na Sóló, bakotia matoi mpo na koyoka masese, bindimeli.”

¹⁴¹ Oh, likebisi ya Molimo Mosantu, kobanga ya limemia ekotaka na molimo ya moto ntango atele mi mpo akanisa lolenge makambo ekómi solo pe polele liboso na biso! Bokundola libanga ya litumu awa libanda pe botanga eteni ya lokasa etiamaki kuna na kati, eleki mibu ntuku misato na misato. Botala nini Alobaki kuna na—na Balabala ya Nsambo, na ntongo wana ntango libanga ya litumu etiamaki. Sikawa botala yango malamumu. Botala malamumu, na ebale awa, ntango Mwanje na Nkolo akitaki na lolenge ya Likonzi na Móto, mangomba nkama na nkama, to bato ya mangomba, bazalaki ya kotelema wana zinga-zinga na libongo; likambo oyo Ye alobaki, botala soki ekokisámá te. Botala likambo nini esalamaki.

Ezali mpenza makasi. Nayebi ete ezali komonana makasi, bandeko, na ngambo kuna. Kasi ezali. . . Biblia elobaki, Yesu Ye

moko alobaki: “Ekopengwisa ata Baponami, soko nde ekokoka.” Nzela ya kokima yango ezali te. Bakozala na makoki ya komona Yango ata moke te. Soko nde ekokoka, Baponami mpenza bakopengwisama na yango.

¹⁴² Botala, bato oyo bamonanaki sima na mopakolami ya solo oyo ya Nzambe atindamaki; na nzela ya mosakoli na Ye ya solo, Mose. Pe ntango Mose azalaki kosala likambo moko, bango bazalaki komekola yango.

¹⁴³ Sikawa, ndeko mobali, ndeko mwasi, ngai... Oyo ezali losambo na ngai moko. Nazali na ndingisa ya koteya makambo ngai nalingi, ntango nyonso oyo yango ezali kati na Liloba na Nzambe. Pe nazali kokweyisa bino te, kasi totala yango malamumu kokokana na ntango pe na ntango tozali kobika sikawa.

Mbote na Ndeko Ruddell, na Junior Jackon, ná baoyo bazali kuna libanda, mangomba ya bondeko na biso. Nabosanaki bango, eleki ntango moke. Nakanisi bazali pe kolanda biso na ntongo oyo, na nzela ya singa, mpo esika—esika ya kofanda ezali te kati na losambo.

¹⁴⁴ Bongo, bokanisa naino likambo yango, mpo na ntango moke. Basalaki bikamwiseli moko oyo Mose asalaki. Mose abimisaki ba-sili; bango bamekolaki yango pe babimisaki ba-sili. Bomoni?

Nzambe alobaki: “Mokolo bokolia yango, mokolo yango bokokufa.”

¹⁴⁵ Satana abelemaki pe alobaki: “Solo mpenza, bino bokokufa te. Bokokóma nde na bwanya koleka. Bokozua ebongiseli moko ya malamumu koleka, ya malamumu koleka...” Boyebi. “Boyebi, makambo nyonso ekokoma malamumu koleka mpo na bino, bokozala na Pole koleka.” Bomoni, kaka bobebisi. Esengelaki...

Pe bomikanisela, YANGO ELOBI NKOLO, kokokana na Timote ya Mibale 3:18, ete: “Na mikolo ya suka, Yambele pe Yane bakozala na mokili.” Sikawa, nalingi boyeba ete ezali na mibale na bango, bomoni, bamekoli.

¹⁴⁶ Sikawa tokozonga na Sodoma, sima na ntango moke, bango misato, komona Banje yango misato oyo bakitaki, pe komona komekola, pe bongo na bongo, bomoni, kososola nini ezali solo pe nini ezali libunga. Bomoni? Bomoni?

¹⁴⁷ Botala, basalaki bikamwiseli ndenge moko. Kasi, botala, bamekolaki, sima na Liloba ya solo esilaki kopakolama, na nzela ya moto ya solo oyo Nzambe atindaki; balandaki, na mbala ya mibale.

Nazali komituna soki tokoki kokanisa mpo na miniti moke. Ezalaki ngai kosimba bato na loboko, kala mingi te, pene na mibu ntuku mibale, pe elembo moko ezalaki komonana. Moninga, bilembo ebele ezalaki kobima bisika nyonso, pe moto nyonso... Moko azali na yango na loboko na ye ya mobali;

mosusu azalaki na yango na loboko na ye ya mwasi; oyo mosusu azali koyoka yango na nsolo. Bomoni, lolenge nyonso ya... Pe nazali komituna... Nzambe akotika ngai te naye bina bino, na ngonga oyo, nini ezalaki mpenza solo na likambo yango, kasi mokolo moko bokosola yango. Ezalaki bobele mpo na komonisa bolema na bango polele. Ezalaki malamumu te, na ebandeli. Nakoyebisa bino yango, mokolo moko, soki Nkolo apesi nzela.

¹⁴⁸ Botala, basalaki bikamwiseli ndenge moko, kasi bango te... Botala, basalaki yango te kino bobele Liloba ya ebandeli ésakolamaki, liboso. Yango nde lolenge oyo Satana asalaki na elanga na Edene. Yango nde lolenge asalaka ntango nyonso. Nani asakolaki liboso? Mose. Nani akotaki na mosala liboso, Mose to Balame? Mose. Nani akokati na mosala liboso, Yilimiya to Hanania? Bomoni likambo nalingi koloba? [Losambo balobi: "Amen."—N.D.E.]

¹⁴⁹ Botala, bamekolaki. Bamekoli ya mosuni, bazalaki sembo, kokanisáká ete bazalaki "kosalela Nzambe mosala," lokola Dawidi asalaki, na mposi eleki, ezali komekola ya mosuni. Nazali kozela miniti moke. Nalingi bokanisa na bozindo makambo yango. Soki nalobi yango te, ya solo Molimo Mosantu akomonisa yango, mingi mpenza mpo na Baponami. Bomoni?

¹⁵⁰ Denomination ya Falo elobaki: "Tozali na bato oyo bakoki kosala likambo moko wana," pe basalaki yango. Bomoni? Mpo na nini Falo asalaki boye? Mpo na nini Nzambe apesaki yango nzela? Mpo na nini Nzambe akotinda mosakoli ya solo, oyo apakólami kuna, mpo na kotalisa elembo liboso na Falo, pe na sima kotika bomekoli ya denomination eya wana mpo na komekola yango liboso na bato? Mpo na nini Akotika momekali moko kobima mpo na kosala yango, pe kosala likambo moko wana Molimo na Nzambe ya solo asalaki? Bomoni, Likomi esengeli kokokisama.

¹⁵¹ Botala, Asalaki yango mpo ete Ayeisa motema ya Falo pe bato na Ezipito makasi, mpo na kotalisa polele ete bobele Mose te nde azalaki na Liloba. Bakokaki kosala makambo nyonso bobele ndenge Mose akokaki kosala.

Pe mpo na nini Nzambe atikaki likambo yango ésalema na mikolo na suka? Bongo, likambo ya ndenge moko lokola molimo ya lokuta oyo elobaki na Sedekiya: "Tokosala ndenge nini mpo Akaba akende kuna, mpo makambo oyo ekokisama?" Akosala ndenge nini mpo na komema bato oyo batalelaka mangomba na bango, bákoka kobima na yango mpo likambo oyo ékokisama, likambo oyo Ye asakolaki? Bango, na Eleko oyo ya Lingomba na Laodikia: "Mpo olobaka ete yo 'mozui, pe nazali na bosenga na eloko te. Nafandi lokola mwasi-mokonzi.' Ozali na eloko moko te! Oyebi te ete yo ozali moto na mawa, moto na bolozu, makufimiso? Pe napesi yo toli ete oya kosomba na maboko na Ngai," Alobaki: "mafuta ná wolo." Mpo na nini Asalaki yango?

¹⁵² Mpo na nini Ye atikaki ete bomekoli oyo ésalema na mikolo ya suka oyo, na ntango makambo oyo ezali kokokisama na nzela ya Liloba ya solo ya Nzambe; bongo atiki bamekoli báya pe básala likambo yango moko, pe báwangana Liloba ya solo ya Nzambe? Asalaki yango mpo na Mose. Pe Falo asalaki yango mpo na kotelemela Mose; pe bango: Yane ná Yambele, basalaki yango mpo na kotelemela Mose. Pe Biblia elobaki ete ekosalema lisusu na mikolo ya suka. Tokomi na esika yango. Sikawa, soki ezali kokokisama ya Likomi te, boye yango ezali nini?

¹⁵³ Mose awelanaki na bango mpo na koloba: “Tala! Tala! Bokoki kosala yango te. Ngai moko nde naponamaki mpo na kosala yango. Tala! Botika yango, kaka sikawa?” Atikaki bango bakoba na bango.

Botika bango bakoba na bango. Bomikanisela, Biblia elobi: “Pelamoko bolema na bango emonisamaki polele, ndenge moko pe baoyo ya ntango na suka pe bakomonisama polele,” ntango Mwasi na libala akonetolama pe akokamatama na likolo. Botala.

¹⁵⁴ Mose, Liloba ya solo oyo emonisamaki, alobaki ata likambo moko te, atikaki yango kokoba. Kasi Asalaki yango mpo Akoka koyeisa motema ya Falo makasi, mpo na kopengwisa Falo.

Asalaki likambo yango moko mpo Akoka kopengwisa Akaba. Pe mwa moto yango, atelemaki wana se ye moko, Mikaya moke, alobelaki bango: “YANGO ELOBI NKOLO.” Mosusu pe atelemaki awa, mopakolami moko: “YANGO ELOBI NKOLO.” Pe bakesanaki, moko na mosusu.

¹⁵⁵ Totelemi lelo na YANGO ELOBI NKOLO, ete libatizi na mai na mikolo na suka esengeli kozala na Nkombo na Yesu Klisto. Pe moto mosusu ateleme pe asali bikamwiseli, pe, azali moto ya mo-Bosato.

Botalisa ngai liloba oyo *bosato* kati na Biblia. Bolakisa ngai epai wapi ezali na ba-Nzambe misato. Bolakisa ngai epai wapi makambo ya motindo wana ezalaka. Ezali kati na Liloba na Nzambe te. Likambo lokola kobatiza bato na nkombo ya “Tata, Mwana, Molimo Mosantu,” kosalela bibiangelo wana, ezalá te. Makambo oyo nyonso: “Oh, ezali malamumu, bandeko basi. Ezali malamumu, kozala na mila . . . na suki na yo mikuse. Ezali malamumu, bosengeli na bino te kosala *oyo, oyo wana*, to mosusu *boye*. Oh, wana ezali bolema, makambo ya mpamba-mpamba ya kala.”

Kasi Biblia elobaki! Pe Alakaki: “Na mikolo ya suka, Akotinda Molimo ya Eliya, pe Akobenga bato, bana na Nzambe, bazonga na Kondima ya ebandeli, ya Liloba, ndenge ezalaki na ebandeli.” Liloba yango endimisamaki, Mwana na moto na mikolo ya suka, kaka ndenge ezalaki na Sodoma; lobi, lelo, pe libela. Alakaki ete akosala yango. Ezali elaka ya Nzambe. Ezali YANGO ELOBI NKOLO.

¹⁵⁶ Botala, basalaki likambo yango moko, bobele ndenge Mose asalaki, kino Nzambe alembaki yango.

Sikawa bomikanisela, ezali YANGO ELOBI NKOLO, ekosalema na eleko oyo. Sikawa, botala malamau na mokili mobimba; bokamata eyamba nyonso, bokamata etúká nyonso, bokamata moto nyonso, bokamata lingomba nyonso! Napesi bino mokumba, na Nkombo na Klisto, ya kosala yango, bino batei. Napesi bino mokumba ya kotanga ba-zulunale to kotala malamau bisika nyonso bolingi kokende, pe bómóna soki likambo yango ezali te awa na mokili sika-sikawa te. Bomoni?

Boye, Matai 24:24 ezali mpenza sóló. “Bapakolami, ya lokuta, bakotelema na mikolo ya suka, pe bakozala basakoli ya lokuta, pe bakopengwisa bato ebele.” Botala yango malamau sikawa na bililingi, ndenge ezali komonana sikawa, bomoni: “Bakopengwisa bato ebele.” “Basakoli,” na boike; “ba-Klisto,” baoyo bapakólami, na boike; ebele ya ndenge na ndenge, ba-Methodiste, bomoni, pe ba-Batiste, pe ba-Pantekotiste, pe bongo na bongo. Bomoni?

Kasi ezali bobele na Molimo Klisto moko ya solosolo, pe ezali Liloba oyo elati nzoto ndenge Alakaki kosala yango.

Sikawa, tokokende mwa moke mosika, na mwa Makomi lisusu koleka.

¹⁵⁷ Kino, Nzambe alembaki likambo yango, na bongo esilaki nye. Bolema na bango emonisamaki.

¹⁵⁸ Botala. Bomikanisela, mposo emónànàka mpenza lokola mbuma na lisangu. Bomoni? Bongo, okokaki koloba te, kuna na eleko ya Luther, ete “lititi ezalaki lisangu,” ata ezalaki na Bomo kati na yango. Lititi ezali malamau, Bomo kati ya lititi ezalaki malamau, kasi, bomikanisela, Bomo ekobaki kokende liboso; elongwaki na Elisa kino na Eliya. Bomo ekobaki kokende liboso. Kasi, bomikanisela, ekómi na etape mosusu. Ekoki kotikala na etape wana te. Tokoki kolia mosuni ya kopola ya eleko mosusu te. Tokoki kolia mosuni ya kopola ya ba-Pantekotiste te, ya ba-Methodiste te, to ya ba-Batiste te. Bomoni, ekómi mosuni ya kopola. Tozali na Bilei ya mobesu, Liloba ya ntango oyo, pe bongo na bongo.

¹⁵⁹ Bomikanisela, mposo ezali mpenza lokola mbuma na lisangu. Okoki te . . . Ekokanaki na yango te na kotoya na yango, ekokanaki na yango te na folólo, kasi ekokanaki mpenza na mposo. Ekokanaki te na . . . Yesu Klisto motindo moko lobi, kati na Luther; ekokanaki te yango kati na Wesley; kasi ekokani mpenza ná Pantekote, “kopengwisa Baponami mpenza soko nde ekokoka.” Bomoni? Bileko na bino yango wana.

¹⁶⁰ Kasi bomikanisela, lingomba ya ba-Pantekotiste wana, na mikolo ya suka, ezalaki Laodikiya; pe Klisto atiamaki libanda, Mobímbí, Lisangu, Yango moko. Ntango Amekaki . . . Bomikanisela, ntango Amekaki komimonisa Ye Moko kati na

lingomba, Abwakamaki libanda. Ezalaki kaka lingomba, oyo ezali komibenga; mopakolami.

Kasi *oyo* ezali Liloba, Klisto Ye moko, yango nde Liloba epakólami oyo ekoya mpo na eteni oyo etikali ya Nzoto na Ye, Mwasi na libala. Mopakolami, ya mai moko oyo emwangisamaki na lisangu, ndenge tolobelaki yango, ezali pe komwangisa matiti mabe, bapakolami. Bobele Baponami, to baoyo babongísámá liboso, nde bakozala na makoki ya kokesenisa bango mibale. Sikawa, Baefese 5:1 elobeli bino bongo, pe elobi ndenge ezalaki.

¹⁶¹ Bazali bapakolami. Bato nyonso balobaka: “Nkembo na Nzambe! Tozui bonsomi awa. Aleluya! Biso. . . Oh, aleluya! Tolobaka minoko na sika, pe topumbwaka. Tozali na bonsomi ya basi; kasi bino bozali kotia bango na nse na boumbu na makambo oyo nyonso ya ndenge na ndenge.” Bomoni? Bokende liboso. Ezali na eloko moko te bokokoka kosala. Bokoloba: “Ee, tolobaka minoko na sika. Togángaka. Tobinaka na Molimo. Toteyaka Liloba.” Ya solo mpenza. Likambo ya kotelemela yango ezali te. Bato oyo awa na Biblia basalaki pe bongo.

Yesu alobaki: “Ekopengwisa ata Baponami mpenza soko nde ekokoka, Baponami mpenza.”

¹⁶² Sikawa botala, mposo. . . Kobanda na Mbuma ya ebandeli, Mbuma oyo ekotaki na mabele, Ezalaki ebongiseli te. Ezalaki Mbuma moko, na Yango moko. Kasi ntango ebimaki, ezalaki Mbuma te; ezalaki ebongiseli, bomoni, nkasa, lisangu.

Na sima Elekaki na etape mosusu, oyo ezalaki fololo. Kasi ezalaki lokola na ebandeli te. Ezalaki ebongiseli.

Elekaki kino na mposo, ebele ya nkasa, Pantekote, pene na lolenge yango mpenza. Botala yango. Ezali kozua lolenge ntango nyonso, pene na kokokana na yango mpenza, emonani mpenza lokola Mbuma ya lisangu soki omoni mwa mposo yango kuna.

Kasi na suka Emonisami, ezali ebongiseli te. Ezali lisusu na bamemi te. Ebongiseli ezali bobele momemi. Bamemi lisusu te; nzete esengeli kokufa, mposo esengeli kokufa, biloko mosusu nyonso esengeli kokufa, kasi lisangu ekokoba kobika. Yango nde nzoto ya lisekwa, ekokita mpenza pe ekokamata bango. “Baoyo bazali na suka bakozala liboso, pe baoyo bazali liboso bakozala na suka.” Bomoni, akokamata bango kati na lisekwa. Bozali kolanda yango? [Losambo balobi: “Amen.”—N.D.E.] Malamu. Botala, mbuma ezali. . .

¹⁶³ Mposo emonanaka mpenza lokola mbuma. Pe moto oyo asalaka bilanga ya masangu, to eloko mosusu, akotala pe akoloba: “Nkembo na Nzambe, nazali na elanga ya masangu,” kasi azali naino na mbuma ya lisangu ata moko te. Hmm? Ezali komonana mpenza lokola masangu, kasi ezali mposo.

¹⁶⁴ Sikawa, baninga, bozonga sima elongo na ngai. Wapi esika kolamuka ya liboso esalemaki, sima na (liwa) mikolo oyo ntango

mbuma ya lisangu esengelaki kokweya na mabele, Nzoto, Mwasi na libala ya Klisto? Klisto abongisaki Mwasi na Ye ya libala, Lingomba na Ye, ezali sóló? Abongísá Yango ata moke te; Atiaki bobele ba-ntoma, pe basakoli, pe bongo na bongo, kati na Lingomba, mpo babatela Yango peto. Kasi na Nicée, na Roma, sima na mibu nkama misato na motoba, babongisaki yango pe bakómisaki yango ebongiseli. Ezali sóló? Pe ekufaki. Nyonso oyo eboyaki koyokana na lingomba yango ebomamaki. Pe etikalaki bongo na mabele, mibu nkama na nkama.

Kasi, sima na ntango moke, etelemaki na ntango ya Luther. Mwa lokasa ya liboso ya lisangu ebimaki. Ya mibale, ebimaki kouta na wana. Bakobaki bongo, bazalaki na Zwingli pe bongo na bongo, ná bibongiseli mosusu pe bongo na bongo. Bongo, sima na mwa ntango, Ba-Angilikani bayaki.

Bongo na sima eloko nini esalemaki? Tala Wesley ayaki ná kolamuka ya sika, fololo, oyo emonanaki mwa moke koleka lokola Lisangu. Na sima eloko nini ekómelaki yango? Emibongisaki, ekaukaki pe ekufaki.

Bomoi ekobaki kino na mposo, pe mposo ebimaki, pene na kobonga be mpenza lokola Lisangu. Kasi, sukasuka, bolema na yango emonismaki polele na mibu mwambe to zomi oyo ya suka, koleka mpenza na mibu misato oyo ya suka. Sikawa ezali kosala nini? Ezali kokabwana na Lisangu.

¹⁶⁵ Sikawa, mpo na nini ebongiseli moko te ebimi kati na mibu ntuku mibale ya suka ya kolamuka monene oyo; ezali basakoli bapakólami, balakisi bapakólami, bongo na bongo, kasi mpo na nini ezali te? Sima na Mbuma eloko mosusu ezali te. Bomoni, Ezongi, ná ebongiseli te. Hó lá lá, mokufi miso akoki komona yango. Ekoki komibongisa te; Etelemeli likambo yango na makasi mpenza. Ezali mbuma ya Lisangu, Yango moko. Mwana na moto akomonisama polele. Mbuma ya Lisangu ekozonga lisusu na Yango moko, Mwana na moto na mikolo ya suka.

“Pe bomekoli na Yango, ya lokuta, ekoya na mikolo ya suka, oyo ekopengwisa ata Baponami, soko ekokoka.” Botala bamposo na bango ya bibongiseli ndenge ezali kolongwa sikawa.

¹⁶⁶ Ezali kotika Lisangu éyebana, epai na Baponami, baoyo bazali eteni na Yango. Botala ndenge etalisami malamau awa sikawa. Bobele ba. . . Botala, bapakolami bazali na makoki; Baponami ya solo, baoyo babongisámá liboso, Baefese 5:1, to 1:5, nde, bakotiana na mosala, bakoponama. Ezali bobele bango nde bakopengwisama te.

Botala, basakoli bapakólami bakozala ya lokuta, pe kuna kati na bango, bapakolami ya solo bakozala. Bokokesenisa bango ndenge nini? Na Liloba. Ndenge tozali na yango na bililingi. Bomoni yango? Boloba: “Amen.” [Losambo balobi: “Amen.”—N.D.E.] Bomoni?

167 Botala, bapokolami, bobele Liloba nde ekokesenisa bango, bilembo te. Oh, te. Bakosala bilembo ndenge moko, kasi Liloba nde ekokesenisa bango. Ya solo. Bango nyonso basakolaki. Bango nyonso basalaki *oyo boye* na *oyo wana*, pe *oyo mosusu*, ya solo, se ndenge moko. Yesu alobaki bakosala likambo ndenge moko. Kasi Liloba nde ekesenisaki bango, botala, bilembo te.

168 Bomonaki yango? Yesu alobaki awa, na Matai 24. Alobaki te: “Ba-Yesu ya lokuta bakobima na mikolo ya suka.” Oh, te, bakondima yango ata moke te. Te. Bokamata Pantekotiste oyo azali mpenza Pantekotiste, ye moko, ázali “Yesu”? Bomoni? Bokamata Metodiste ya lokuta, to Batiste, to moto moko boye, to moko na bibongiseli, áloba: “Tozali Ba-Yesu”? Bayebi malamukoleka oyo wana. Bakosala yango te. Kasi Biblia elobaki bakozala “ba-Klisto ya lokuta”, ba-Yesu te, kasi, “ba-Klisto ya lokuta.” Bakondima te, koloba: “Ngai nazali Yesu.” Ah, te.

169 Kasi bazali “ba-Klisto ya lokuta,” pe bayebi yango te, mpo bazali na bokeseni na Liloba. Pe Nzambe akotatola yango ndenge moko. Sikawa, nakomema likambo yango mpo na kosukisa ntembe sikawa, mpamba te bino bomonaki makambo ndenge moko kosalema na bato oyo ndenge esalamaki na sóló mpenza. Pe Yesu alobaki bongo.

170 Sikawa, ndenge nalobaki, bino baoyo bozali kolanda na ba-telephone kuna na ekolo, na—nazali kokweyisa bino te, kasi oyo ezali losambo na ngai pe—pe etonga na ngai oyo Molimo Mosantu atie ngai likolo na yango, pe nasengeli koyebisa bango Sóló. Ngonga ezali koleka.

171 Sikawa, bakondima yango te, kasi, “ba-Klisto ya lokuta,” bapokolami, ya lokuta, bakozala pene ná elembo nyonso pe likomi nyonso ya Liloba. “Bandimaka libatishi ya Molimo Mosantu?” Bongo mpenza. “Bandimelaka nyonso *oyo*?” Iyo. “Bandimelaka minoko ya sika?” Iyo. “Bandimaka ete bilembo pe bikamwiseli ebilaka, bilembo ekobila bango?” Iyo. Wana ezali ba-Metodiste te, wana ezali ba-Batiste te. Te, te. Wana ezali ba-Pantekotiste. Bomoni, oyo ezali ntango ya suka.

Sikawa, eleko ya lingomba ya liboso emonaká yango soko moke te. Eleko ya lingomba ya ba-Metodiste emonaki yango soko moke te; eleko ya lingomba ya ba-Batiste, bamonaki yango soko moke te; eleko ya lingomba ya ba-Presbiterien, bamonaki yango soko moke te. Kasi, ba-Pantekotiste, nde bazali mpenza pene na Eloko yango mpenza! Esika wana nde, Lisangu. . . mposo ekomi lokola Lisangu. Bakomona yango soko moke te. Bomoni? Bakomona te. Kasi ezali mikolo ya suka, mokolo oyo. Iyo, misie.

172 Botala, bobele ndenge ezalaki na ebandeli, ekozala pe bongo na suka. Lokola Ewa alimbolaki mabe Liloba moko, Satana nde asalelaki Ewa yango, pe ye andimaki yango. Mwasi, mobali te; lingomba, Ye te. Bomoni? Lingomba nde ezalaki na liloba ya lokuta. Bomoni? Adama te; Ewa. Klisto te; lingomba, mwasi na

libala, oyo apakolami, oyo asengelaki kozala, oyo amibengaka Mwasi na libala, bomoni, azali na liloba ya lokuta.

Bókokoka komona yango te? Ee, ezingami elongo lokola singa ya sapato, lokola makiki ya miso na bino. Ee, bisika nyonso okotanga, na Biblia, Ékosangisa yango mpenza elongo. Ewa, Adama te; Ewa andimaki yango, Adama te. Mwasi na libala lelo, oyo ya nkombo, andimaki yango; Klisto te. Mwasi na libala azali na lolenge nyonso, mwasi na libala ya nkombo; bilembo ndenge moko; bikamwiseli ndenge moko, makambo nyonso ndenge moko; kasi Oyo ya solo te. “Kopengwisa Baponami soko nde ekokoka.”

Sikawa na lombangu, soki tokoki kosilisa sima na miniti zomi na mitano, tokozala na ngonga malamumu. Bolanda na bokebi mpenza sikawa, mpo eso—esosolama mabe te, epai na bino.

¹⁷³ Sikawa, te, bakondima te kobengama “Yesu ya lokuta.” Bakondima te kobengama, “Yesu.” Soko moke te. Ezali mpenza polele. Moto nyonso akoyeba yango. Moto nyonso akoyeba ete bazalaki Yesu te. Etali ngai te, ata bazali na mafuta na mokongo na bango, pe ná makila na maboko pe na miso na bango, bayebi kaka ete ezali. . . Moto nyonso oyo azalali na bososoli malamumu, akoyeba ete ezalaki Yesu te. Bomoni? Bakondima yango te. Kasi bazali komibenga “bapakolami.” Pe bazali kosala bilembo pe bikamwiseli, “pene mpo na kopengwisa Baponami.” “Kasi ba-Klisto ya lokuta, bapakolami, bakobima, pe bakopengwisa Baponami soko nde ekokoka.”

¹⁷⁴ Sikawa, bólanda na bokebi nyonso. Bózanga maloba oyo te, mpo ebongi mpenza koyoka yango.

Azali bobele kokangisa ruban na mikro mpo na kopekisa yango koningana-ningana. Nabandaki kobima motoki; pe yango etangaki likolo na ruban yango, bomoni.

¹⁷⁵ Na bongo, ekozala pe bobele lokola Yango, Biblia, elobaki ete ekozala bongo. Bomoni?

¹⁷⁶ Botala, ba-Yesu ya lokuta te. “Ba-Klisto ya lokuta!” Bandimaka ete bazali bapakolami, kasi bayebi bazali Yesu te. Bomoni, ezali polele mpenza. Soki moto akei koloba, lelo: “Botala bilembo ya potá na maboko na ngai. Botala makiki na ngai. Ngai nazali Yesu.” Ee, wana, toyebi ezali lokuta. Pe, bomikanisela, Yesu alobá ata moke te ete bato wana nde bakoya. Alobaki “ba-klisto ya lokuta” bakoya. “Ba-Klisto,” na boike, ba-denomination, pe bongo na bongo, *bapakolami*; *bapakólámí* na molimo ya denomination, kasi ya Liloba te. Bozali kolanda yango? Ba-Yesu ya lokuta te. “Ba-Klisto ya Lokuta,” bapakolami, ya lokuta. Bomoni? Oh, ezali polele mpenza! Ndenge to. . . Na ntembe te, bokozanga yango te!

¹⁷⁷ Sikawa, bomikanisela, nalobaka na bino ntango nyonso ete ezali na lolenge misato ya bato. Ezali na mabota ya bato misato; Hama, Semi, pe Yafete, mabota misato. Lolenge misato,

pe nalobaki, ezali bandimi, bandimi ya nkombo, pe bazangi-kondima. Ezalaka bongo ntango nyonso, pe ekozala bongo ntango nyonso. Bomoni? Ezalaki na Mose, mondimi; ezalaki na Yane pe Yambele; bazangi kondima. Bomoni? Ezalaki na Balame; Mose. . . Ezalaka ntango nyonso na lolenge misato ya bato, lolenge misato; mondimi, mondimi ya nkombo, pe mozangi-kondima.

¹⁷⁸ Sikawa bomikanisela, mozangi kondima, lingomba ya denomination, andimaka bilembo ata moke te; bazalaka malili, na lolenge ya libanda, bazangi bomoto, lingomba kati na mokili, denomination. Kasi mondimi ya nkombo azali mposho wana. Wana nde moto oyo amekaka kondima. Pe na sima ezali na mondimi ya solo, oyo azali mpenza sóló. Sika, botala bango malamumu wana ezali bango komimonisa sikawa, kaka mpo na ntango moke.

¹⁷⁹ Pe botala ndenge bazangi-kondima oyo bazalaka nzúzu, to bandimi oyo ya nkombo ná bazangi-kondima. Oh la la! Bazalaka nzúzu, botala, lokola Satana oyo atelemaki wana Liboso na Liloba ya solo, pe alobaki: “Ekomami!” Ezali sóló?

Mpo na nini Satana asalaki yango? Ezali mpo azangaki koyeba Liloba mpo na. . . Ayebaki ete Liloba ezalaki mpo na ntango wana, kasi abetaki ntembe ete Moto moke ya komikitisa oyo nde azalaki Liloba yango. “Soki ozali Mwana na Nzambe. Nayebi ete Mwana na Nzambe akoya, mpo Elobamaki ete Akosala yango. Pe ekomami, ‘Akolaka banje na Ye na ntina na Yo.’ Bomoni? Talisa ngai yango polele! Sala ekamwiseli! Tika ngai namona Yo kosala yango.” Bomoni? Bomoni?

Bomoni, mozangi-kondima, mondimi ya nkombo, momekali. Botala Yuda mpenza katikati na bango, na ngonga moko yango, mondimi ya nkombo! Bomoni? Botala, Liloba ya solo ezalaki pe wana.

¹⁸⁰ Ndenge bazalaka nzúzu! “Sikawa, bolanda bozoba wana te. Eloko moko ezali na Yango te. Bokende kuna te. Ezali bobele makelele ya mpamba. Eloko moko ezali na Yango te. Nyonso wana ezali bobele masapo. Ezali na makanisi na bino nde.” Bomoni, bomoni likambo nini nalingi koloba? Botelema ngwi Liboso na Liloba pe boloba yango.

¹⁸¹ Satana amikotisaki wana. Ndenge Biblia elobá awa na Yuda: “Ata Mokozzi na banje, ezalaki ye kotiana ntembe na Satana, alobaki, ‘Nkolo apamela yo.’” Kotelemela Liloba Yango moko!

Pe tala motelemeli-na-Klisto, mopakolami, atelemi bobele awa mpo na kotelemela Liloba ya solosolo ya mokolo, Yesu Klisto, pe alobaki: “Ekomami.”

¹⁸² Botala, na mikolo ya suka. “Ekozala mpenza pene ete epengwisa ata Baponami, soko nde ekokoka.” Oh la la! Ntina oyo Baponami bakopengwisama te, boyebi mpo na nini? Ezali mpo bazali Liloba. Bomoni? Kaka ndenge Bomoi oyo ezali kati

na mosisa, nalobaki yango kala mingi te, Ekoki komiwangana Yango moko te. Bomoni, Ezali Liloba pe na eleko ya Liloba. Ezali sóló.

¹⁸³ Kaka ndenge Yilimia, ayebaki. Ata Hanania alobaki nini, ye ayebaki wapi atelemaki. Ezali mpenza lokola Mose asalaki, pe—pe bamosusu na bango. Ezali, ayebaki, ata mosakoli ya lokuta alobaki nini, Liloba na Nzambe ezalaki wana. Ekomamaki.

Yango nde ntina oyo Mikaya akokaki koloba: “Malamu, bozela pe bokomona.”

Akaba alobaki: “Nandimaka basakoli na ngai. Ebongiseli na ngai ezali sóló. Ntango nakozonga na kimia. . . Bokotisa moto yango kuna na boloko. Nakotala likambo na ye! Bopesa ye bobele lipa ya minyoko. Bobwaka ye libanda, bozala bosangani ya bondeko na ye ata moke te. Ntango nakozonga na kimia, tokotala likambo ya moto yango.”

¹⁸⁴ Mikaya alobaki: “Soki ozongi mpenza, Nkolo alobaki na ngai te.” Ayebaki azalaki na YANGO ELOBI NKOLO, pe emononeli na ye ezalaki kotambola mpenza ná YANGO ELOBI NKOLO; mpo na eleko mosusu te, kasi mpo na eleko wana. Amen! Aleluya! Eleko!

¹⁸⁵ Nzúnzu, kotelema pe kowelana ná Mokonzi ya banje! Elobamaki, ete: “Bilema batambolaka na sapato ya nsété epai banje bazali kobanga kotambola.” Ezali sóló.

¹⁸⁶ Ntina oyo Baponami, ndenge Yesu alobaki, bakopengwisama te ezali ete bazali Liloba yango. Bakoki kozala eloko mosusu te. Bakoki koyoka eloko mosusu te. Bayebi eloko mosusu te. Ezali sóló.

Bomikanisela, Mose atungisamaki te ná bomekoli na bango nyonso wana. Boye te? Mose alobaki: “Sikawa, Falo, zela miniti moke. Oyebi nini? Nkolo alobaki na ngai ete násala boye, kasi, nkembo na Nzambe, namoni ete bato na yo bakoki kosala likambo yango moko. Bongo, nakoyebisa yo eloko nakosala, nakosangana elongo na bino”? Ha! Wana eyokani lokola mosakoli ya Nzambe te. Te, ata moke te! Atelemaki mpenza ngwi na ndenge oyo akokaki kotelema. Ayebaki, malamu mpenza, ete Nzambe akotala likambo yango ata ndenge nini, mpo Alakaki yango. “Nakozala na yo elongo. Nakotika yo te.”

¹⁸⁷ Ayebaki, boye asanganaki na bango te. Oh, te. Atikalaki elongo ná bango. Alingaki ba-denomination na bango ata moko te. Atikalaki bobele ná Nzambe. Atungisamaki na makambo nyonso oyo bango bakokaki kosala te. Ntango bazalaki kosala likambo moko. . . Ye abimisaki ba-sili; bango babimisaki ba-sili. Ye abimisaki makila; bango babimisaki makila. Biloko nyonso ye abimisaki; bazalaki komekola ye na lolenge nyonso, kolandeláká nyonso. Atikalaki bobele kimia. Ayebaki makambo malamumpenza. Nzambe azalaki kosala mosala.

Bososoli sikawa? [Losambo balobi: “Amen.”—N.D.E.] Bokamata mibale likolo na mibale, pe ekopesa minei? [“Amen.”] Bokolinga te ete makambo yango esala bino moto mpasi. Boye, boye bo—bósosola, bomoni.

¹⁸⁸ Mpo na nini? Bakopengwisama na yango te, mondimi ya solo mpenza, bazali Momboto oyo ebongisámá liboso oyo esengeli kotelema ngwi na eleko yango.

¹⁸⁹ Bongo, Yesu alobaki, lisusu, boye: “Mingi bakoya na mokolo yango, na Nkombo na Ngai, pe bakoloba, ‘Nkolo, nabenganaki milimo mabe na Nkombo na Yo te?’” Yesu alobaki: “Na mikolo ya suka, wana ntango ekosila pe lisekwa monene ekoya, bongo bato mingi bakoya kofanda kati na Bokonzi.” Bokonzi na Nzambe ezali kati na bino.

Mingi, matiti mabe ekoya pe ekofanda esika moko na Lisangu, ekoloba: “Sikawa, zela naino moke Nkolo! Nalobaki minoko na sika. Nagángaki. Nabinaki na Molimo. Nabenganaki milimo mabe. Nalobaki minoko na sika. Nasalaki makambo oyo nyonso.”

Ye akoloba nini? Botala. “Bino basali masumu na nko, nayebi bino soko moke te.”

¹⁹⁰ *Lisumu na nko* ezali nini? Botuna moto nyonso. Ezali “eloko oyebi ete osengeli kosala, kasi oboi kosala yango.” Bayebi Liloba yango. Bayokaka Yango. Bozali koyoka bande oyo. Bozali koyoka Nsango oyo. Bomoni Nkolo Nzambe koloba yango; bomoni Ye kokokisa yango, kotalisa ete ezali solo. Pe boyebi ete Yango ezali mpenza polele lokola moi ezali kongenga libanda, kasi bino baoyo bókokangama na denomination na bino, kokangama na makambo ya lokuta wana; bino basali masumu na nko!

“Oh, iyo, nasalaki ba-kampanye minene. Nasalaki *oyo*. Nasalaki *oyo wana*.”

Alobaki: “Bolongwa mosika na Ngai, bino basali ya masumu na nko, nayebi biono ata moke te.”

¹⁹¹ “Ee, Molimo Mosantu akitaki likolo na ngai.” Natié ntembe na yango ata moke te. “Nalobaki minoko na sika. Nayembaki na Molimo. Nasalaki . . .” Natié ntembe na yango ata moke te. Ntembe mpo na yango ezali te. Oh, ndeko mobali, ndeko mwasi, makambo ya ndenge nini boye!

Oyo ezali ntango moko ya kolenga. Tokómi wapi? Liloba oyo ezali kozua Bomoi sikawa. Botala.

¹⁹² Iyo, Alobaki bakosala yango. Botala: “Bino basali masumu na nko.” Nakomaki Likomi moko awa. Nayebi te esika oyo ezalaki wapi. Nazui ntango mingi koleka. Náluka yango, bozela moke, mpo natala soki ezalaki nini. Nazali na—nazali na Matai 7:21. Na—Nayebi te soki ezali wapi. Ngai, mbala mosusu, nakomaka eloko moko pembeni na yango te, ee, na—nateyaka

bongo, na—nabosani likambo nazalaki kolobela na Likomi yango. Matai 7:21.

Moto na moto oyo akolobaka na ngai, Nkolo! Nkolo! akoingela kati na bokonzi na likolo te kasi ye oyo akosalaka mokano na Tata na ngai oyo azali na likolo.

Mingi bakolobaka epai na ngai na mokolo yango, Nkolo! Nkolo! biso tosakolaki te . . .

Basakoli, bapakolami! Ya solo? “Tozalaki mosakoli te? Topakólamaki te, mopakolami? Nasakolaki na Nkombo na Yo te? Pe na Nkombo na Yo nabenganaki milimo mabe te?” Ndenge nini okoki kosala yango, pe koboya kobatisama na Nkombo na Yesu? Bomoni? Oh la la! Bomoni ndenge ekoki kopengwisa? Kino na esika yango mpenza, na sima, bazongi sima. Bazali kokóma kino na Liloba, pe na sima bazongi sima. Sikawa, botala malamumu likambo oyo. Tomonisa yango polele, mwa miniti moke.

Mingi bakoloba epai na ngai . . . Nkolo! Nkolo, biso tosakolaki te, tozalaki basakoli? . . .

Iyo, nalobelaki yango na Matai 24:24.

. . . pe na Nkombo na Yo . . . tobenganaki milimo mabe te? pe na Nkombo na Yo tosalaki ebele ya bika . . . ebele ya misala?

Nakotatola liboso na bango ete, Nayebi bino soko moke te! Bolongwa na ngai, bino basali masumu na nko.

“Ntango Yango etiamaki mpenza liboso na bino pe bomonaki Yango, pe bomonaki Yango kosala, bomonaki ete Ezalaki Liloba; kasi mpo na bolingo ya denomination na bino, bokangamaki na yango. Nayebi bino soko moke te. Etali ngai te, ata bobéngánáki milimo mabe boni, ata bosáláki *boye* na *boye* mbala boni; nayebaki eloko moko te na ntina na bino.”

Balame alobaki: “Nasakolaki likambo ya solo, na Nkombo na Yo. Ekokisamaki.”

¹⁹³ “Yango ezali mpenza solo, kasi, ntango ekómaki likambo ya Liloba, oboyaki Yango.”

Oh, ndeko mobali, omoni epai kopengwisama ezali? Ezali mpenza te “mosakoli”; kasi ezali Liloba, Liloba ya solo, Liloba oyo etatolami pe emonisami polele. “Bino basali masumu na nko!”

¹⁹⁴ Komeka, Satana na bileko nyonso aluká komekola Liloba ya solo. Toyebi yango, boye te?

¹⁹⁵ Botala, akopusana kino na ndelo pe akotika. Boyoka awa, Alobaki, kati na Baebele mokapo ya 6 (Sika, totangaki yango eleki mwa ngonga, nalobelaki bino ete, “tokozongela yango,” pe tokosala yango na miniti mibale to misato oyo ekolanda). Alobaki:

. . . nde *nzube* pe nséndé . . . oyo *ekoki* na kobwakama;
suka na yango kozika na móto. (Ndelo!)

. . . bino baoyo *bosili koyoka elengi* . . . *ya likabo na likolo* . . .

“Koyoka elengi,” na elobeli mosusu, bomonaki Yango! Bokoki te [Ndeko Branham aningisi mbebu na ye nyonso mibale—N.D.E.] koyoka elengi na Yango na monoko na yo. Kasi bomonaki Yango, pe boyebaki ete Ezalaki Sóló. Boyebaki ete Ezalaki Sóló. “Koyoka elengi ya likabo na Likolo.”

. . . pe *kosangana na Molimo Mosantu*, ntango Ekitaki likolo na bino,

. . . *koyoka elengi ya Liloba na Nzambe* . . .

“Koyoka elengi,” bomonaki ete Ezalaki sóló. “Pe Molimo Mosantu ekitaki likolo na bino,” matiti mabe kati na elanga.

. . . pe na sima *bapengwa* . . .

“Na kowangana Klisto mpenza oyo abulisaki bino, pe abengaki bino, pe atiaki epakweli yango likolo na bino.”

. . . *mbeka mpo na lisumu ezali lisusu te*, mpo na yango.

Elimbisamaka te! “Ekoki kosalema te mpo na bango ete bakóma na boyebi na Sóló.”

“*Zambi mpo na bango basili* . . . *kosangana na Molimo Mosantu*,

Ekitaki likolo na matiti mabe, bomoni: “Nabandaki elongo na Yesu, pe, ‘Nkolo, nakokende kino na suka,’” kasi ntango obelemi na Liloba, ozongi sima. “Basangani na Molimo Mosantu, pe bayoki ata elengi, to bamoni Liloba Yango moko komonisama.” Pe na sima bapesi Yango mokongo: “Ekoki kosalema te na ndenge nyonso mpo na bango ete bátikala komona Yango to babelema na Yango.”

Wana ezali YANGO ELOBI LIKOMI. Sikawa, bino . . . “Likolo pe nsé ekoleka, kasi Yango ekoleka te.” Bomoni yango? “Ekosalema te na ndenge nyonso.” Biblia elobi bongo, pe Molimo azali kotatola yango.

¹⁹⁶ Botala, botika nápesa bino ndakisa moke. Bótala bato babimaki na ntango na esakweli ya Mose, babimaki na ebongiseli yango, pe babimaki na makambo nyonso, na nse na esakweli, bamonaki misala minene pe bikamwiseli, pe makambo ya motindo wana, pe bakómaki kino na mondelo, mpo na kokota.

Sikawa, Lee, yango oyo, likambo na yo ya, “nkombo na Buku.” Omoni? Likambo ekómi polele mpo na yo. Pe bino baoyo bozali awa te, kasi kuna na—esika bozali kolanda na nzela ya singa, ezali Docteur Lee Vayle oyo afandi awa. Azali kobongisa grammaire na buku oyo ya Bileko Nsambo ya Lingomba. Pe mindondo ebimaki, to motuna, na ntina na “nkombo oyo

elongolamaki na Buku na Bomoï ya Mwana na Mpate.” Bomoni, etungisaka batei mingi. Kasi bozela kino bokozua buku yango, bokososola yango bobele soki bozali na Pole moko kati na bino. Bomoni?

¹⁹⁷ Botala, sikawa, bokobongola moto na bino pe bokoboya ata kotala Yango soki bolingi komona Yango. Ndenge mama na ngai amesánáká koloba: “Bokoki kozua makila kati na mbomá te, mpo makila ezalaka kati na yango te.”

¹⁹⁸ Botala, Pole esengeli koya; ezali kati na molili te. Pole eyaka epai na molili, kasi molili emonaka Yango te. Botala sikawa bapokolami na mokolo oyo.

Ndenge Mose abimisaki bana yango ya Yisalaele; pe bayokaki pe bakotaki na mobulu ná ekólo monene wana kuna. Sikawa, Yisalaele ezalaki interdenaminationel. Bazalaki na mboka te, na ekólo te. Bazalaki kokende na mboka moko.

Biso tozali na lingomba te. Tozali te... Tozali—tozali kokende na Lingomba moko, Lingomba ya baoyo Babotami liboso, Lingomba oyo ezali na Nkembo; lingomba oyo ezali na mokili te, na nzela ya moto. Lingomba oyo ezali na Nkembo, baoyo babengami bábima libanda na, baoyo babongisámá liboso mpo na Bomoï ya Seko, bomoni, bazali kokende na Mboka na bango.

Pe ntango bakómaki na esika ya kokatisa, batiaki ntembe na Liloba, pe bazongaki. Sima, Yoshua pe Kalebe ná bamosusu, bakatisaki na ngambo pe bazongaki na ebólo ya mbuma na miwiti, mpo na kotalisa bango ete mboka yango ezalaki kuna, elaka ya Liloba na Nzambe: “Ezali mboka malamú, ya mabèle pe ya mafuta na nzoi.” Pe bazongaki na yango, na ngambo oyo, mpo na kotalisa bango. Pe bamekaki yango, pe balobaki: “Oh, oh, kasi, tokokoka kosala yango te.”

Eloko nini esalemaki? Basilaki nye kati na lisobe. Batikalaki wana pe bamisalelaki ebongiseli, pe bakufaki, moko moko na bango. Kasi, baoyo bakatisaki na ngambo pe bazongaki na eloko yango, Yoshua na Kalebe; Mose ye anetolamaki. Etaliseli ya Lingomba oyo ezali kozela; pe ya lisekwa ya Kondimana na Kala, Kondimana na Sika; pe Nzoto oyo enetolami. Bomoni misato yango wana? Bosengeli kobatela misato yango na molongó, bomoni, boye, mondimi pe mozangi-kondima. Bomoni?

¹⁹⁹ Botala, ndenge elobamaki “na ndenge nyonso.” Bomikanisela, Nzambe atikálá kolimbisa lisumu wana soko moke te. Sikawa bakokota ndenge nini? Soki ezali nzube na ebandeli, ezali nzube na suka. Bobele baoyo babongisámá liboso nde bakomona Yango.

²⁰⁰ Bolanda na bokebi mpenza sikawa. Pelamoko na mikolo ya Santu Martin, bobele liboso ya Eleko ya Molili; mwa moto moko ya bulee. Boni basila kotanga makomi ya Santu Martin? Mingi kati na bino. Tokendaki koluka makomi ya Santu Martin; sángo

yango alobaki: “Kasi ye atangamá lokola mosantu te.” Ya solo mpenza; atangamá na bango te, kasi atangamaki mosantu na Nzambe. Molimo Mosantu ayebisaki biso totia ye kuna na eleko wana ya misato ya lingomba wana. Bomoni?

²⁰¹ Botala lolenge kani ya moto ya bulee ye azalaki; abengamaki, abongisámáki liboso. Baboti na ye, bapagano. Tata na ye, soda. Asengelaki kolanda nzela na ye, ete ákóma soda. Pe ntango asalaki yango, azalaki ntango nyonso kondima ete Nzambe moko azalaka na esika moko boye; moto ya zamba, pe akokaki komona Nzambe. Mokolo moko, azalaki koleka pene na engumba moko, pe mobange moko motelengani alalaki wana, azalaki kokufa, kosengáká ete moto. . .Azalaki koyoka malili na butu wana. “Oh,” elobaki ye, “bopesa ngai eloko moko mpo námizipa; nakokufa na butu ya lelo.”

²⁰² Moto moko te alingaki kosala yango. Pe Martin atelemaki pembeni pe atalaki ye malamú ntango moke. Moto moko te alingaki kosala yango. Ye azalaki bobele na monkoto moko. Akokufa na malili ye moko, azalaki na mosala, soki a—apesi ye monkoto yango. Bongo akanisaki: “Biso mibale tozali na libaku ya kobika soki nakaboli yango ná ye.” Na bongo, akamataki monkoto na ye moko, pe apasolaki yango na biteni mibale na mopanga na ye, pe azingaki mobange motelengani yango ná yango. Azingaki ye na monkoto na ye moko.

Bato nyonso balobaki: “Botala sinzili moko ya ndenge. Botala soda moko ya ndenge, amizingi na eteni ya monkoto!”

²⁰³ Na butu elandaki, ntango asilisaki mosala pe alalaki na mbeto na ye, eloko moko elamusaki ye. Atalaki, moto moko atelemaki wana na ndako, pe tala Yesu Klisto atelemaki wana, azingami na eteni ya monkoto ya kala oyo ye azingaki ye. Ayebaki ntango wana ete “Nyonso ekosala bino yango epai na baoyo ya Ngai ya mike, bosaleli Ngai yango, na mopakolami na Ngai,” alali wana.

Azalaki mosali monene ya Nzambe. Lingomba batiolaki ye, banyokolaki ye, babwakaki ye libanda, pe nyonso wana, kasi azalaki mosakoli ya Nzambe. Makambo alobaki ekokisamaki. Bato mingi bandimelaki pe ye, na eleko yango.

²⁰⁴ Nalingi kotalisa bino lolenge nini zabolo azalaka mopengwisi. Mokolo moko afandaki na kati na biró na ye. Mbala moko, mwanje moko na nguya ayelaki ye, ná motolé na motó na ye, ná sapáto ya wolo, ná málénda zinga-zinga na bilamba na ye ya wolo, pe alobaki: “Martin, oyebi ngai?” Alobaki: “Ngai nazali Nkolo pe Mobikisi na yo. Ngai nde nabikisaki yo. Kumbamela ngai, Martin.” Kasi mosakoli yango, lokola ayebaki ete likambo moko ya ndéngé ezalaki wana, akobaki kotala ye. Alobaki: “Martin, nazali Mobikisi na yo, Yesu Klisto. Kumbamela ngai! Ozoyeba ngai te, Martin?”

205 Martin akobaki kotala ye, wana Makomi ezalaki kolekaleka na motó na ye. Alobaki: “Satana, longwa mosika na ngai.” Alobaki: “Ozali na motólé na motó na yo. Pe Liloba na Nzambe elobi ete ‘basantu na Ye nde bakolatisa Ye motólé’ na suka ya ekeke.”

Wana elingaki kozala mpambó mpo na ba-Pantekotiste, boye te? Bótalelaka Liloba wana, ndeko mobali. Wana de esika elonga ezali.

206 Mokolo moko, lisusu, na ndako ya basángó, bazalaki na mobange mosantu moko kuna, etonga ya basángó ya bilenge. Moko na bango azalaki moto ya kosilika nokinoki. Botala likambo oyo, ezali lisesse moko malamú— moko malamú lelo oyo. Ye alingaki kozala moto monene, likolo na baoyo mosusu batikali. Alingaki komilakisa, na bokonzi, moto monene koleka, moto malamú koleka, moto ya lokumu, bomoni, pe moto monene mpenza. Esengelaki ye ázala oyo aleki. Ntango nyonso, alingaki ete bandeko mosusu te. . . Boyebi, esengelaki ye ázala ndenge mosusu. Bomoni? Ye, ata na likambo nini, azalaki na lolendo mingi. Azalaki komimona bobele ye moko nde akoki. Moto moko te akokaki kosimba ye. Sikawa botala likambo nini esalemaki. Esengelaki ye ázala na eloko moko monene. Esengelaki ámikokanisa na—na bato minene. Bozali kolanda ngai? Bomoni? Bongo, alobaki, asakolaki. Alobaki: “Nkolo akómisi ngai pe mosakoli. Nazali mosakoli.”

Sikawa, mosakoli moko oyo ayebanaki azalaki na mboka, pe ezalaki Santu Martin; ye abotamaki mosakoli.

207 Kasi mwana oyo alobaki, elenge mobali oyo alobaki, ye elenge sánzó ya mibu pene na ntuku mibale na mitano. Alobaki: “Nkolo akómisi ngai mosakoli, pe nakolakisa bino yango polele.” Alobaki: “Na butu ya lelo Nkolo akopesa ngai robe moko ya monene, ya kitoko, akolatisa ngai yango, robe ya pembe, pe nakotelema katikati na bino. Boye bino nyonso bokoya epai na ngai, bomoni, pe bokozua mitindo kouta na ngai.”

208 Bongo bokokanisa likambo yango lelo, bomoni: “Nakozala mokonzi ya ebongiseli. Nakotala makambo na bino, bino basánzó nionso oyo botikali.”

Pe na ntembe te: “Na butu wana, polé moko ekotaki na kati ya ndako,” ndenge makomi ya Santu Martin elobi. Botanga yango. Pe ezali likambo ya solo. Ezali histoire. Pe polé eyaki, pe bango nyonso bazalaki kotala, pe tala mbala moko. . . Alataki robe ya pembe, atelemaki katikati na bango. Alobaki: “Bomoni likambo oyo nayebisaki bino?” Kasi ekeseni na Liloba.

209 Pe ntango akendeki kokutana na mpaka ya eteyelo yango, ye azalaki kotambola, komata kokita mwa nmoke, pe alobaki: “Mwana, likambo yango ezali koyokana malamú te.” Alobaki: “Nzela ezali bobele moko.” Yango oyo! “Nzela mpo na biso koyeba ezali bobele moko. Emonanaki lokola likambo ya

kokamwa.” Moninga, ba-Pantekotiste bakokaki komela yango mobimba, misisa, mondolu, singa ya ndobo, ndobo, pe nyonso mosusu! Alobaki: “Likamwisi yango ekoki komonana malamumu, kasi ezali kolongobana na Liloba te. Sikawa, tozali na moto moko, mosakoli oyo apakólami, nkombo na ye Martin. Yaka, kende kokutana na ye.”

Moto yango alobaki: “Te, te! Martin azali na eloko moko na likambo oyo te.”

²¹⁰ Pe alobaki: “Okokende, ata bongo.” Pe bakangaki ye na loboko, mpo na komema ye liboso ya Martin, pe robe yango elimwaki.

²¹¹ Bomoni: “Kopengwisa ata Baponami, soko nde ekokoka.” Bomoni, bayebi bango. Yesu alobaki: “Bampate na Ngai bayebi Liloba na Ngai.”

“Oh,” bokoloba: “bayokaka *Mongongo* na Ngai.”

Yango ezali Liloba na Ye. “Moto akobika bobele na mapa te kasi na Maloba nyonso.” Bomoni? Baoyo babongisámá liboso bayebi yango. “Liloba ya mopaya, to mongongo ya mopaya, bakolanda yango te.”

Ezalaki bongo na bato oyo tolobelaki kuna; baboyaki kolanda. Bayebaki ete Martin azalaki wana, mosakoli ya eleko yango, atalisamaki polele na Nzambe na nzela ya Liloba, ayebaki Liloba. Pe moto yango akokaki kotelema liboso na Yango te.

²¹² Alobaki lisusu: “Esika Ebembe ezali,” to Liloba, “wana, na eleko yango, bampongo bakosangana.” Bongo, yango ezali na Mat- . . . Bolingi kokoma yango, ezali na Matai 24:28. Mwa moke liboso, Matai 24:24; milongo minei na nse na yango, bomoni, soki bolingi kotanga yango. “Esika Ebembe ezali,” ezali nde Mana, ezali nde Liloba, “wana nde bampongo bakosangana.”

²¹³ Sikawa esengeli nasala noki. Natombolaki miso kuna pe namonaki ngonga nini . . . Ekomi—ekomi miniti nsambo to mwambe sima na midi. Nakosala nokinoki, to tokoki kosilisa yango na mpokwa, ndenge bokolinga esalema. Na ntongo oyo to na mpokwa? Huh? Bato boni bakozonga epai na bango lelo na sima ya losambo, botombola maboko, bomoni. Oh la la, ekoleka malamumu tokoba!

Nasengi bolimbisi mpo na koumisa bato bazali kolanda biso na nzela ya telefone, ndenge wana, kasi nakosala noki. Ezali na motuya mingi koleka misolo na bino. Nandimi ete ezali bongo, mpo na ngai, bomoni. Misolo na bino ekosila. Oyo ekosila te; Ezali Liloba. Bomoni?

²¹⁴ “Esika Ebembe ezali, wana nde bampongo bakosangana.” Esika Ebembe, esika mo—mo—moboma ezali, wana nde bampongo bakosangana. Esika Mosuni ya mobesu ezali, Liloba ya ntango, wana nde bampongo bakoyangana.

Kasi soki epoli, na ntango wana nde bingondó bakosangana likolo na yango. Iyo. Bomoni likambo nalingi koloba? Ntango babomi eloko moko, bampongo bakoya wana; kasi na sima na yango kouwela wana pe kopola, wana nde bingondó bakoya. Mpongo akozala na ntina na yango ata moke te. Bomoni?

Yesu alobaki: “Esika Ebembe ezali,” esika Mana ekweyaki, na butu oyo Mana ya sika ezali kokweya, “wana nde bampongo bakosangana mpo na Yango.” Wana nde Mana ya mokolo. Bomoni? Botala.

²¹⁵ Kasi sima na yango kopola, pe nkusú ekoti na kati, na ntango wana nde bingondó bakoya. Bakoki koyoka nsolo na yango te kino épola. Ekokamwisa te ete Yesu atelemaki wana pe alobaki: “Yelusaleme, yo mobomi ya basakoli nyonso na mabanga!” Botala likita na bomei wana, bomoni: “Yelusaleme, Yelusaleme, mbala boni Nalingaki. . .” Ye azalaki Nani? “Mbala boni Nalingaki kosangisa bino lokola soso asangisaka bana na ye na nse ya mapapu na ye, bino nde bobomaki na mabanga basakoli nyonso oyo natindelaki bino,” lingomba monene wana, Yelusaleme.

²¹⁶ Yelusaleme ya mokili oyo awa te, “kasi biso tozali bato yaa Yelusaleme ya Likolo,” esika Liloba euti, uta kobongisámá liboso, bomoni. Yelusaleme ya kala te oyo ekobeba; kasi Yelusaleme ya sika oyo ekobeba te. Ezali Yelusaleme ya kala te, oyo etongamaki na bato; kasi ezali Yelusaleme ya Sika oyo etongami na Nzambe, bomoni, Liloba uta likolo, ezali sikawa komonisama. “Na ndako ya Tata na Ngai, bifandelo bizali mingi. Nakokende kobongisela bino yango,” Mozalisi azali kosala bantzela ya wolo, pe bongo na bongo. Yango nde Oyo ekufaka te.

²¹⁷ “Yelusaleme, Yelusaleme, mbala boni Nalingaki,” uta ebandeli ya ntango; Moto ya misato te, moto mosusu te, kasi: “Nalingaki koyanganisa yo lokola soso ayanganisaka bana na ye, kasi olingaki te. Kasi sikawa ngonga na yo esili kokoka.” Bomoni?

“Esika Ebembe ezali, bampongo bakosangana.” Kasi sima na ebembe kopola, na ntango wana nde bingondo basanganaka. Bomoni?

²¹⁸ Botala. Mose, atikálá kopesa bana Nzambe te. . . Mose azalaki mpongo, pe atikálá kopesa bana na Nzambe biloko Nowa atikaki te. Bomoni? Azalaki na Liloba na Nzambe ya mobesu. “Nkolo Nzambe akutanaki na ngai kati na biliki, pe akokisaki Liloba na Ye, pe atindaki ngai awa mpo na kobimisa bino libanda na.” Na sima nde bamekoli bayaki zingazinga, mpo na komekola yango. Bomoni? Kasi ye azalaki na Liloba ya ntango.

Zambi, Nzambe alobaki na Abraham, ye oyo azalaki na elaka: “Libota na yo bakofanda na mokili mosusu, mibu nkama minei, Nakokende kotala bango pe kobimisa bango na loboko ya nguya.”

²¹⁹ Mose alobaki: “Sikawa, Yawe Nzambe akosolola na ngai pe akotalisa ngai, pe alobaki na ngai nini nakosala, bongo nakoyebisa bino.” Alobaki: ““NAZALI” atindi ngai.”

“NAZALI!” Ezali te “Nazalaki, to nakozala.” “NAZALI,” eleko ya sikawa, Liloba sikawa. Ezali te Liloba oyo ezalaki, Liloba oyo ekoya; Liloba oyo ezali sikawa. Bomoni? Bososoli yango? “NAZALI!” “NAZALI” ezali Liloba. “Na ebandeli Liloba azalaki, pe Liloba azalaki elongo na Nzambe.” Ezali sóló? “NAZALI.” “Nzambe atindi ngai lokola mosakoli na Ye, mpo na kotatola ete oyo ezali solo. Ngai nazali eyano na Liloba oyo, alobaki na ngai ete nakita awa pe nasala likambo oyo.”

²²⁰ Pe ntango asalaki yango, Falo alobaki: “Ee, tozali na bilenge mibali ebele kati na etonga na biso oyo bakoki pe kosala yango,” bamekoli.

Yesu alobaki: “Bongo, yango ekosalema lisusu na mikolo ya suka,” bomoni, bakoloba likambo yango ndenge moko. Botala nani ayaki liboso. Botala nani atikalaki na Liloba. Ezali bongo. Nde ndenge wana eyebenaka.

²²¹ Boye, bomoni, tomoni, Mose atikálá kopesa bango biloko ya ntango ya Nowa ata moke te: “Tokotonga masuwa sikawa, mpo yango ezali Liloba, boyebi. Mokolo moko Nowa atongaki masuwa.” Te, bingondó nde bazalaki kolia yango. Te. Te.

²²² Oyo nde Liloba elakamaki. Botala, mpo na nsango na ye oyo azuaki uta na Nzambe, azalaki na Liloba ya Nzambe ya solosolo oyo ebongisámá liboso mpo na ntango wana.

Yesu pe apesaki bango biloko Mose atikaki te. Mose azalaki na Liloba mpo na ntango wana, kasi Mose azalaki mosakoli. Awa ezali Nzambe Ye moko, bomoni, Atikálá kopesa bango ata moke te biloko oyo Mose—Mose atikaki.

Kasi botala naino bingondó kuna na ebongiseli yango, bazalaki kodunda yango. “Toyebi! Tozali na Mose! Tozali na ntina ya kozala na Yo te.”

²²³ Alobaki: “Soko boyebáká Mose, bolingaki koyeba Ngai, mpamba te Mose alobaki na ntina na Ngai.” Bomoni?

“Esika Ebembe ezali, wana nde bampongo bakosangana.” Bampongo! Moboma ya mobesu ya Liloba, Liloba oyo etalisami pe etondi na mafuta, pe emonisamaki polele pe epesami lokola Bilei mpo na bana.

Kasi, ebembe ya kalakala oyo elali wana mibu nkama na nkama, ekozala na yango wana.

Ndenge moko sikawa! Luther azalaki na nsango ya kobongola mitema; kasi, bino etóngá ya banzéngó ya ba-Lutherien! Ba-Batiste bazalaki na nsango; kasi bino banzéngó ya ba-Batiste! Bomoni? Bato ya Pantekote bazalaki na nsango; nákokóma na likambo yango sikawa: banzéngó ya ba-Pantekotiste!

“Kasi esika Ebembe ezali, wana nde bampongo bakosangana.”

²²⁴ Bomikanisela, bokokaki koleisa mo-Luterien, na mikolo oyo wana (sikawa ekoki kosalema), bipola ya Katoliko te. Te, misie. Azalaki na mosuni ya mobesu. Wana ezalaki eleko ya lingomba wana.

Bokokaki koleisa ba-Metodiste, nsango ya ba-Luterien te. Oh, te, bazalaki na mposa ya bipola wana te. Esilá kopola. Bomoni, Bomoi esilaki kotika yango pe ekotaki na eloko mosusu. Yango nde mobimbi ya kala oyo esilá kokufa, kuna. Bomoi ezali kokoba.

Bokoki pe te koleisa Mwasi na libala ya Yesu Klisto Bopantekotizme. Te, ata moke te! Bibongiseli oyo etondi nkusú; ekoki kosalema te! Te, te!

Mpamba te elaka ezali: “Liboso mokolo monene pe ya nsomo éya, Nakotindela bino mosakoli Eliya. Akozongisa lisusu mitema na bana epai na Kondima ya batata.” “Bilaka oyo nyonso epesamaki na Biblia, Nakosala yango, pe wana nde bampongo bakosangana.” “Nyonso oyo Tata apesaki Ngai, ekoya epai na Ngai.” Bomoni?

²²⁵ Yesu amekaki yango ata moke te. Kasi ntango Yesu ayaki, Akutaki ebele ya bingondó yango: “Tozali na Mose pe mibeko.” Bomoni? Ee, yango ezalaki bilei malamumu kalakala, ntango ebomamaki pe epesamelaki bango. Bomoni, ezalaki malamumu na ntango wana.

Kasi oyo nde likambo oyo esakolamaki na Mose, ye moko, nde abomaki mbeka, alobaki: “Yawe Nzambe na yo akotemisela yo Mosakoli longwa na kati na yo, longwa na bandeko na yo moko. Ekosalema ete, soko pe moto nani akokangana na Mosakoli yango te pe na oyo Ye alobi, akolongolama kati na libota.” Pe esalemaki.

²²⁶ Botala, lolenge oyo bisakweli pene na nkama motoba ya Kondimana ya Kala ekokisamaki ntango wana, mpo na Yesu Klisto. “Batoboli maboko na Ngai pe makaka na Ngai.” Pene na, nabosani motango boni ekokisamaki na ngonga nsambo to mwambe ya suka ya bomoi na Ye, basakoli yango nyonso balobaki, na ndenge ebongi be.

²²⁷ Soki lelo nasakoli ete likambo moko ekosalema sima na mobu moko longwa sikawa, ntango mosusu nazali—nazali na konzo ntuku mibale likolo na monkama mpo likambo yango ekokisama, soki ezali solo to lokuta. Pe soki nasakoli ete likambo yango ekosalema, pe nalobi ntango nini te, nakozala na konzo moke likolo na monkama. Soki nasakoli ntango nini ekosalema, ekokoma moke koleka. Soki nasakoli esika nini ekosalema, ekokoma moke lisusu koleka. Soki nasakoli . . . moto nani likambo yango ekokokisamela ye, na ntango wana nakozala

na konzo pene na mokama likolo na ba-nkoto mpo likambo yango ekokisama, soki ezali solo te.

Pe Liloba nyonso, aleluya, oyo ekomamaki na ntina na Masiya yango, ekokisamaki moko moko. Kino mokolo moko, na kotangáká Makomi, Atelemaki na katikati ya maloba, pe alobaki: “Molimo na Nzambe ezali likolo na Ngai mpo na koteya Nsango Malamu, pe kokangola ba . . .” Atelemaki mpenza wana na katikati ya maloba yango, mpo ete eteni mosusu wana ezali mpo na Boyei na Ye ya mibale. Amen! “Likolo pe nsé ekoleka; nde Maloba na Ngai makoleka te.” Bomoni?

²²⁸ Azalaki Liloba na ntango wana, oyo ezalaki koleisa bango ntango wana. Mose ayebisaki bango Sóló; kasi, bomoni, bakómisaka yango ntango nyonso ebongiseli, mpo ete bingondó ba . . .

Ezalaka na ndambo na Yango etikalaka, soki bampongo basilisi kolia pe bazongi mboka. Na ntango wana bango bazali kozela komona eloko mosusu. “Liloba,” balobaka, “awa nde Esengeli koya. Lobi eleki toliaki mboloko; tokolia mpate lobi.” Bomoni likambo nini nalingi koloba? “Ebembe ya kala ya mboloko ezali kuna, bazali kosepela, kasi biso, tokolia mpate lelo. Ezali wapi?” Bomoni likambo nini nalingi koloba? Bilei ya Banje! Bato bazalaki kolia mana mokolo moko, soki bamekaki kobomba yango mpo na mokolo oyo elandaki, ezalaki kopola. Bozali komona bitaliseli nyonso oyo te, ndenge ebongi be? Ezali ndenge moko sikawa!

²²⁹ Botala, bingondó ya ntango na Yesu bazalaki pe kobengana milimo mabe; bapakolami likolo na ebembe ya kala. Ezali sóló! Bazalaki kobengana milimo mabe. Yesu alobaki bongo.

Pe bomikanisela, bazalaki na basakoli na mikolo wana. Kaifa, nganganzambe mokonzi, asakolaki. Bato boni bayebi yango? Kaifa asakolaki. Botala esika ya matiti mabe kati na elanga; ezali komwangisama na epakweli yango moko. Mpo na nani Biblia elobi ete asakolaki? “Mpo azalaki nganganzambe mokonzi na mobu yango.” Molei ya bipoli, matiti mabe ná nsende, efandi katikati na Masangu; kasi Molimo ezalaki likolo na ye, Molimo Mosantu ya Nzambe ya solosolo. Molimo Mosantu ya Nzambe ezalaki likolo na ye, mpo na koteya, kosakola, pe koloba yango liboso ekokisama; pe aboyaki pe abakaki na ekulusu Liloba mpenza oyo etatolami ya ntango yango.

Oh, mawa mingi, ndeko mobali! Ntango molai boni tozali na yango mpo na koloba makambo oyo, bomoni, ntango boni lisusu ya kolekisa na Makomi? Nakosala noki. Natikali na nkasa pene na zomi awa, ya Makomi, mpo na kotalisa makambo oyo nyonso polele. “Mói, likolo na bayengebeni pe bato mabe, ndenge moko.”

²³⁰ Yesu alobaki, mpo na kondimisa likambo oyo: “Soko Ngai nazali kobengana milimo mabe na mosapi na Nzambe, bana na

bino bakobengana yango na nini?” Bongo, bazalaki kobengana milimo mabe. Bazalaki kosakola. Ezali sóló? Kasi bayebaki te ete Ye azalaki Liloba ya ntango, (mpo na nini?) mpo Azalaki moto ya lisanga na bango te.

Sikawa bokamata Matai 24:24: “Ba-Klisto ya lokuta,” bapakolami, “bakotelema, pe ekozala na basakoli ya lokuta, oyo bakosakola yango,” bomoni, “pe bakopengwisa Baponami mpenza soko nde ekokoka.” Bososoli yango sikawa?

²³¹ Botala, bana. “Na nani bana . . . Soki Ngai nazali kobengana milimo mabe na Liloba na Nzambe,” oyo, Ye azalaki Liloba na Nzambe, “na nani bana na bino ya bibongiseli bakobengana yango?” Sikawa, pe bobele Nzambe nde akoki kobengana molimo mabe, toyebi yango, bobele Nzambe. Mpo ete, moto ya makasi asengeli kozala na makasi koleka ye oyo azali na ndako na ye. Bazalaki na nguya ya kosala yango.

Boyebi, kuna na Emoniseli, elobami ete ako . . . ete motelemeli ya Klisto oyo atelemaki na mikolo ya suka: “Asalaki bilembo pe bikamwiseli, na lolenge ete apengwisaki ata bafandi na mokili, pe apengwisaki moko na moko na bango, Baklisto pe bato nyonso, baoyo nkombo na bango ekomamaki te kati na Buku na Bomoi ya Mwana na Mpate,” eyano mpo na Matai 24:24, “baoyo nkombo na bango ekomamaki te kati na Buku na Bomoi ya Mwana na Mpate longwa kozalisama na mokili.”

Bomoi yango oyo ezalaki kati na mosisa ya—ya nzete ya malala wana ya solosolo, oyo emataki kati na bandimo wana nyonso pe nyonso mosusu, elekaki pe ebotaki mbuma na nsóngé ya nzete, likolo ya bitape pe bíbamba nyonso ya denomination. Bososoli yango? Nakosala noki. Moto ya makasi . . .

²³² Bomikanisela sikawa Dawidi, azalaki alimá, sembo, azalaki komeka kosalela Nzambe mosala, kasi abongisamaki te mpo na kosala yango.

“Bango,” bapakolami; kasi Yesu alobaki: “Bazali kolakisa Mateya oyo ezali ndimbola (ya Makomi) ya moto,” bomoni, ezali Liloba na Nzambe te, ezali te Liloba na Ye oyo etatolami; bazali koteya Klisto ya lisolo, bomoni, eloko moko ezaláká.

Pe Biblia elobaki: “Azali.” “NAZALI,” ezali te “Nazalaki to Nakozala”. “NAZALI, be sasaipi.” Azali Liloba wana oyo ezali kobika awa.

Azalaki, na ebandeli, Azalaki na kati na . . . Azalaki kati na bi—bitanga; Azalaki kati na folólo; Azalaki kati na mposo; kasi sikawa Azali kati na Mbuma.

²³³ Sikawa, okozonga na sima mpo na komeka kobikela yango lisusu? Bongo ekozala ndenge nini soki Bomoi yango ekiti lisusu, okanisi Bomoi yango (oyo etikali) ekoloba, ete ézonga na mposo wana ya kala oyo esili kokauka, ézonga pe ébika lisusu kati na yango? Esalemaka ata moke te. “Zambi nzela ezali te mpo

na baoyo bangengelamaki mói,” pe bakobaki kotambola elongo na Liloba te, wana Yango ezalaki kokokisama, “basili kokufa, esili mpo na bango; pe nzúbe pe nséndé oyo ebelemi mpo na kobuakama, suka na yango kozika na móto.” Ezali sóló?

Sikawa, nakosala mpenza nokinoki.

²³⁴ Sikawa, botala Makomi. Bazali koteya Nzambe ya masolo, bomoni, kaka ndenge bazali komeka kobika na lolenge eleká, ndakisa: “Ee, Wesley alobaki *boye na boye*. To, *Songolo* alobaki *boye na boye*.” Bozali koboya Liloba ya elaka ya mokolo, Mana ya mokolo oyo etalisami polele mpenza. Bazali komeka kotia ba-vinyo na bango ya kala ya ba-Lutherien, ba-Batiste, ba-Pantekotiste na kati ya milangi na biso ya sika. Ekosimba te. Pe Vinyo na biso ya sika, na kati ya milangi na bango ya kala, ekosimba te. Soki bameki kotia Vinyo ya sika oyo kati na denomination yango, bolema na bango ekomonisama polele. Bakoki kosala yango te. Ekopasola yango.

²³⁵ “Sikawa, ndeko mobali, namoni Liloba na Nzambe, ebongi be mpenza na Liloba!”

“Sikawa, tala awa, dokotolo, soki . . . To—tokoki kozala na Yango te.” Ned, nakanisi ete obikeli likambo yango kala mingi te. “Biso, tokoki mpenza kozala na Yango awa te. Na—nakosepela kutu ete bokoba bobele na nzela na bino.” Boyebi. Bomoni, ekosimba te. Ekopasuka.

“Batiaka eteni ya elamba ya sika na elamba ya kala te, mpo ete okopasola yango nyonso.” Bomoni? Yesu alobaki yango te? Bokoki kotia Vinyo ya sika na ba-mbeki ya kala te. Ekopasola yango mobimba. Vinyo ya sika ezali na Bomoi kati na yango. Malamu.

²³⁶ Botala eloko moko awa, na lombangu sikawa, wana ezali biso kosilisa . . . liteya na biso. Botala Emoniseli 16:13 kino 14, soki bolingi kokoma yango. Ntango mosusu nakozanga ntango ya kokota na yango. Nalingi boyeba yango malamumu pe bomona yango. Sikawa botala, oyo ezali koyulama ya kelelo katikati na Mbeki ya Motoba pe oyo ya Nsambo.

²³⁷ Sikawa toko . . . tokosilisa na mwa minuti moke, soki bokoki kokanga motema lisusu kaka mpo na mwa miniti. Tozali kosilisa sikawa.

²³⁸ Botala Emoniseli 16:13 kino 14, kati na Mbeki ya Motoba pe oyo ya Nsambo: “Milimo na mbindo misato lokola magbololo” (bomoni yango?) “ebimaki na monoko ya moto moko.” Sikawa botala, nokinoki. Bobelelemi? Boloba: “Amen.” [Losambo balobi: “Amen.”—N.D.E.] Bosato ya milimo!

²³⁹ Sikawa yo ndeko mobali ya denomination, fanda kimia kaka miniti moke. Botelema te mpo na kobima libanda, bino bozali kolanda kuna na sima, na ba-radio, na nzela ya telefone.

Bókanga ba-manietofone na bino te. Bófanda kimia kaka mpo na miniti moke, pe boyoka. Bobotami na Nzambe, bokosala yango.

²⁴⁰ Bosato ya magbolodo! Ligbolodo ezali nyama oyo etalaka ntango nyonso na sima. Etalaka esika ezali kokende ata moke te; etalaka esika euti. Bomoni? Bomoni yango te? Mateya ya bosato bosantu ebotamaki wapi? Bomikanisela, “milimo ya mbindo misato,” milimo ya moto moko moko. Bozososola yango? [Losambo balobi: “Amen.”—N.D.E.]

²⁴¹ Botala, batalaka na sima na Likita ya Nicée epai mateya ya bosato bosantu ebotamaki, na Biblia te. Likambo ya boye ezalaka te. Batalaka na sima na Likita ya Nicée kuna na Nicée, na Roma, esika bosato bosantu ebotamaki.

Botala esika oyo bautaki. Botala. Pe bosato ya magbolodo eutaki na bosato bosantu ya kala, ebotaki bosato bosantu ya sika, mama na bango. Yango eutaki wapi? Bosato, “dalagona,” bomoni, “nyama na yauli,” pe “mosakoli ya lokuta.” Bosato, ya sika. Mpo ete, ntango nini magbolodo oyo ebimaki? Esalamaki ntango nini? Botala, bazalaki wana ntango nyonso, kasi emonisamaki te kino na katikati ya Mbeki ya Motoba pe ya Nsambo, bobele liboso Bilembo efungolama (Hmm?) mpo na komonisa yango.

“Zambi na Nsango ya mwanje na nsambo, mabombami na Nzambe ekoyebana,” makambo nyonso wana ya ba-trinitaire, ba-libatizi ya lokuta, pe nyonso wana esengelaki komonisama polele. Nzambe asunga biso mpo tomona oyo Sóló ezali! Pe tokanisa te ezali moto moko oyo azali komeka koloba likambo moko mpo na . . .

²⁴² Nayoki molimo wana kotelemela Yango, bomoni. Nazali koloba na ngai moko te, ndeko mobali. Nazali koloba uta na Mwanje na Nkolo oyo azali kati na molako. Ezali mpenza ya solo.

²⁴³ Botala, bosato! “Dalagona,” bato boni bayebi soko dalagona ezalaki nini? Ezalaki Roma. “Pe dalagona atelemaki liboso na mwasi mpo na kolia mwana na ye bobele ntango akobotama.” Ezali solo? Kati na Biblia, “nyama” elingi koloba nini? Nguya. Malamu mpenza. “Mosakoli ya lokuta, mosakoli moko ya lokuta,” mopakolami moko, ya lokuta. Bomoni?

²⁴⁴ Abandaki wapi? Oyo ezali “mosakoli ya lokuta,” na bomoko. “Mosakoli ya lokuta,” pápà ya liboso; pe uta na ye nde ebimaki “mwa—mwasi na pite pe mama na basi na,” likambo yango nyonso.

Bosato moko ya lokuta ebimaki; na mikolo ya liboso te, ekokaki komonisama polele na mikolo ya liboso, ekobaki kosala mosala kati na yango. Kasi ntango Bilembo Nsambo eyaki, pe efungolaki mabombami yango pe emonisaki yango; na ntango wana nde “magbolodo, milimo ya mbindo misato lokola

magbolodo, ebimaki mpo na komimonisa,” mateya ya bosato mpo na kotelemela Solo. Bomoni? Hah!

Bomoni esika euti? Bomoni esika nini ezali kozonga? Na Likita ya Mangomba. Bango nyonso bazali bandeko, ata bongo; milimo moko, eloko moko.

Pe botala malamau. Kopengwisama mpenza, kosaláká bikamwiseli! Pe oyo ezali milimo mabe oyo ezali kokende epai na banzambe nyonso ya mokili, kosaláká bikamwiseli, mpo na kopengwisa bango na ntango ya suka, pe bakolonga na kosala yango. Nzambe alobaki nini na ntina ya molimo mabe wana?

Alobaki: “Nakokita kuna pe nakokota na monoko ya basakoli yango pe nakosala ete bango básakola lokuta, mpo na komema Akaba ete ákende kuna mpo ábomama.”

²⁴⁵ Nzambe alobaki: “Kende. Okolonga. Okosala ete bandima yango. Bazali na bango kati na Liloba yango te, mpo na kobanda.” Bomoni? “Kende, mpo okondimisa ye yango. Yo okozala ye oyo akosala yango, ntango okokota kati na basakoli ya lokuta wana, mpo azali kotalela bobele bango. Pe ayebi ata eloko moko te na Liloba, akomeka pe koyekola Yango te. Akoki kosala yango te, mpo azali nséndé, mpo na kobanda.” Bomoni? Bomoni? “Okolonga.”

²⁴⁶ Botala awa mangbololo oyo ya lokuta, bazali kotala sima: “Ee, boyebi likambo nini balobaki kuna na Nicée?”

Etali ngai te, likambo balobelaki, kuna na Nicée. Ngai nazali koloba likambo balobaki awa na Ngwende na Nzambe; oyo ekozala, oyo ezalaki te; oyo ekozala, mpo Ye azali nde “NAZALI.” Bomoni?

“Ya lokuta.” Botala yango. Hah! Botala esika nini bauti.

²⁴⁷ Sikawa (boyoka na bokebi mpenza), tomoni polele, sima na Bilembo Nsambo kofungwama. Yango ezalaki mpo na komonisa libombami wana. Bosato yango ezali nini? Bomoni? Etikálá kobengama bosato wapi? Bomoni? Esika nini kati na Biblia elobeli oyo bosato elobami ata? Esika nini ekoki kozala na ba-Nzambe misato, ete tosambelaka ba-Nzambe misato, pe kozala bapagano te?

Ndenge nini bakoki kokabwana, na ntango oyo Ye alobaki: “Ngai na Tata na Ngai tozali Moko”? “Soko bokondima te ete Ngai Nazali Ye, bokokufa na masumu na bino, bomoni, kozanga kondima na bino.” Lisumu ezali kozanga kondima. “Bokokufa na kozanga kondima na bino.”

Oh, bino bolobi Ngai nazali nani, bolobi Ngai nauti wapi,

Oh, boyebi Tata na Ngai, to boyebi Nkombo na Ye?

NAZALI Fololo ya Sharon, Monzoto Engengaka na Ntongo.

Bokoki koyebisa ngai Nani Ye azali?

NAZALI oyo asololaki na Mose na nzete
epelaka Móto,

NAZALI Nzambe na Abraham, Monzoto
Engengaka na Ntongo.

NAZALI Folólo ya Sharon, oh: bolobi Ngai
nauti wapi;

Oh, boyebi Tata na Ngai, to boyebi Nkombo na
Ye? (Amen!)

NAZALI Alifa, Omega, Ebandeli pe Suka;

NAZALI bozalisi mobimba, pe Nkombo na Ye
ezali Yesu.

²⁴⁸ Ezali sóló. Bosato ezali te! Te, mesie. Wana ezali likambo
ya lokuta.

Bilembo Nsambo, kofungola mabombami oyo “esengelaki
kosila,” elakisi yango polele. Elembo efungwani, emonisi, elakisi
polele, emonisi polele ba-Solo oyo ebombamaki, oyo Bilembo
ebombaki mibu oyo nyonso, na nzela na mangomba pe ba-
denomination oyo.

“Mwasi monene na pite,” ya Emoniseli zomi na nsa-...
Azalaki nani? Kasi azali “MAMA NA BASI YA NDUMBA,” pe.
Bomoni?

²⁴⁹ “Sikawa, obengaki bango ‘bingondó.’” bokoloba: “Ndeko
Branham.” Ezali solo.

Kasi, bomikanisela, engondó ezali ndeke. Epakólami pe mpo
na kopimbwa. “Milimo mibale yango, ekozala mpenza pene
ete ekopengwisa Baponami...” Engondó ezalaka pe monene
lokola mpo—lokola mpongo. Akoki kopimbwa lokola mpongo;
pe epakólami mpo na kopimbwa, to mpo na koteya, to mpo
na kosakola, botala, ndenge moko ná mpongo. Kasi akokoka
kolanda mpongo na bosándá ya likolo te. Te, te. Soki ameki
kolanda mpongo, bolema na ye ekomonisama polele. Iyo, mesie.
Akokoka kolanda mpongo te.

Oh, akoki koloba: “Nandimi ete Yesu Klisto azali Mwana
na Nzambe. Nandimi Nzambe Tata, Oyo-na-nguya-nyonso,
Mozalisi ya likolo pe na nsé; Yesu Klisto Mwana na Ye,” pe bongo
na bongo. Oh, ya solo, bakoki kosala yango. Kasi boni mpo na Ye
kozala motindo moko lobi, lelo, pe libela? Bomoni?

²⁵⁰ Mpongo azali ndeke moko oyo asalema ndenge mosusu. Ezali
na eloko moko te lokola ye, awa na mokili. Bomoni? A—a...
Soki nzengó ameki kolanda ye, to ndeke mosusu, akopanzana.
Bolema na ye ekomonisama polele, ya solo mpenza. Akopasuka,
ntango akomeka kotia Vinyo ya sika kati na molangi ya kala.
Bomoni, akopasuka. Akopanzana. Asalémá bongo te, azali te...
Nzoto na ye esalema té na lolenge ékoka kopika kuna na
likolo. Ntango akómi na misándá minene kuna na likolo, soki

asalémá te, abulisamá te, abongisama liboso te, abotámá mpongo te, akopanzana biteni biteni. Bomoni? Nsalá yango nyonso ekolongwa na mapapu na ye, pe akokweya na nsé. Na ntembe te. Akoki kolanda mpongo te, na bosándá ya likolo. Soko ameki yango, boléma na ye ekomonisama polele. Ya sóló. Okokoka te.

²⁵¹ Mpo na nini? Akoki komona lokola mpongo te. Litomba nini komeka kopimbwa likolo mpenza, pe kozanga komona esika oyo ozali na ntango okomi kuna na likolo? Pe soki asengeli komeka, komeka ata komekola mpongo oyo, na misándá ya likolo, akokufa miso pe akoyeba te eloko nini ezali koningisa ye boye. Ya sóló. Akobelela pe akogánga, pe akobundabunda; kasi lobela ye bobele Liloba, ndeko, oh, wana nde bolema na ye ekoyebana.

Solola na ye likolo na libatizi na Nkombo na Yesu Klisto, to, Ye azali motindo moko lobi, lelo, pe libela, nyonso—nyonso ya ndenge wana, pe yebisa ye. “Ee, oh, zela mwa miniti moke!” Bomoni? Oh, iyo, wana, nsalá na ye ekobanda kolongwa. Bomoni, akopimbwapimbwa, kosakola, pe kobengana milimo mabe, pe koloba minoko na sika, pe kogánga, pe akobundabunda, akokimakima mbango bisika nyonso. Kasi ameka kolanda kuna na Likolo te; mpo, na ntembe te mpenza, akomonisama polele.

Kasi, ye abulisami. Apakólami. Akoki kopimbwa. Akoki komeka komata kuna na likolo, kasi te. . . mosika mpenza te. Bomoni, akoki kolia bipola, kasi akoki kolia Mosuni ya mobesu te oyo euti na Ngwende.

Akufá miso. Azali komitungisatungisa, kasi ayebi te mpo na nini azali komitungisatungisa bongo. Bomoni, Molimo moko oyo ekitaki likolo na ye, lokola mbula, mpo na kokómisa ye lisangu; mpo na kobanda ye azali lisangu te. Akotomboka. “Oh, nakoki kondima te. . . Oh, te, misie! Nayebi Dokotolo Jones alobaki. . .” Malamu, kende liboso. Bomoni? Kende liboso, soki olingi.

²⁵² Te, botala, abotámá na ye te, to asalémá na ye te, to abongisámá na ye liboso te, mpo na kozala ndeke ya lolenge wana. Akoki. . . Azali. . . ekoki kozala ndimo ya ngai oyo ékokola na nzete ya malala, kasi yango euti na misisa ata moke te. Ezali eloko moko oyo babakisaki. Pe ntango bamati likolo mingi na ba-denomination na bango na lolenge ete bakoki komona kotatolama te ya Liloba na Nzambe oyo ebongisámá liboso, na ntango wana nde bolema na bango ezali komonisama polele. “Oh, makambo yango, Pole likolo na motó, pe nyonso wana, oh, Ezali boléma.” Bomoni? Emonisami polele.

²⁵³ Asalémá te mpo ámónáká mosika mingi. Akoki komona bobele kokokana na oyo maneti ya denomination na ye ekotika ye átala. Kasi, na sima na yango, azali bobele mokufi miso lokola ngembó. Na ntango wana nde bolema na ye ezali komonisama polele. Bomoni? Wana nde esika mpongo ya solo akitaka mpo na kolia. Iyo, misie. Kuna nde esika bampongo ya solo, oyo

baponami bamonaka oyo ye azali. Ntango akoki koyamba Liloba yango te, bayebi mbala moko ete azali engondó moko ya denomination.

²⁵⁴ Mpo na nini, mpo na nini akoki kopimbwa te? Mpo, botala eloko nini aliaka. Aliaka mosuni ya kopola ya denomination. Yango eko—ekotonganga nzoto na ye ya molimo te, ekopesa ye bokolongonu ya molimo te, na elobeli mosusu, komema ye likolo ya bokeseni ya ba-denomination. Bomoni? Bomoni, aliaka biloko ya kopola; nzoto na ye esalémi na yango. Akoki komata kuna na likolo te, esika Mosuni wana ya mobesu ememaka mpongo yango. Akoki na ye kosala yango te. Bomoni?

²⁵⁵ Yango ezali kokokisa Matai 24:24. Azali kopimbwa, komata likolo na mopepe, kobetabeta mapapu na ye, kasi akoki mpenza komata likolo mingi koleka te. Bomoni? Ezali solo. Bomoni, akoki kokende te, akoki komata likolo mingi koleka te mpo na kozua Mana wana ya mobesu. Akoki kolia mana ya kala oyo ezali awa na mabele, mintomba ekúfá kala oyo baniataki yango eleki mpóso mobimba, pe sanza mobimba, to mibu ntuku minei mobimba, esili kopola. Akoki kolia yango, pe kosepela na yango, pe kogánga pe kobeta ntangwa, pe kosala makambo nyonso wana, komibwaka pe kopimbwa lokola mpongo mosusu. Apakólami, lokola ndeke mosusu.

Pe nzengó ezali loléngé moko ya mpongo. Toyebi yango. Ezali mpenza bongo, kasi ekoki kolanda mpongo ya solosolo te. Bomoni? Ekoki kosala yango te. Te, misie. Nzoto na yango etongámá bongo te; ye aliaka bipola ya ndenge na ndenge, bomoni, pe ekozala te. . . ekozala te—ekozala Mosuni ya mobesu te, Mana ya mobesu. Ekozala eloko oyo Luther alobaki, oyo Wesley alobaki, to oyo Dokotolo *Songolo-pakala* alobaki. Ekozala te na oyo Yesu alobaki mpo na ngongo oyo.

²⁵⁶ Tokende sikawa, tosilisa. Bapakolami: “Ba-Klisto,” na mikolo ya suka, kasi “balakisi ya lokuta pe mosakoli ya lokuta.” Botala ndenge ezali kokamwisa! Sikawa nalingi bokokanisa likambo oyo; tozali na ntango ya kotanga yango nyonso te: Matai 24:24 ná Timote ya Mibale 3:8.

Matai 24:24 elobaki, na mikolo ya suka, bomoni: “Ba-Klisto ya lokuta bakoya,” bapakolami, ya lokuta, “basakoli ya lokuta, pe bakosala bilembo pe bikamwiseli,” mpenza lokola Oyo ya solo mpenza, Oyo ya solo mpenza, “pe bako—pe bakopengwisa ata Baponami mpenza.” Sikawa botala, Yesu nde alobaki yango.

²⁵⁷ Tala Polo, bobele sima na Ye, pe alobaki: “Sikawa, na mikolo na suka, basambeli bakoya, bomoni, bato oyo bazali na lolenge ya kosambela. Pe bakokosa basi bazangi mayele, oyo bakambami na mposa mabe ndenge na ndenge ya mokili.”

Pe bazali komituna, koloba: “Mpo na nini ozali kogángela basi yango?” Oh, mawa. . . Bazali ata komona Yango te.

“Bakokosa basi bazangi mayele, oyo batondi na mposa mabe ndenge na ndenge,” mosika na makambo lokola . . . ya . . . Bomoni, “Pe lokola Yane pe Yambele . . .”

Matai 24:24, “Ba-Klisto ya lokuta,” bapokolami, ya lokuta, bakosala bilembo pe bikamwiseli mpo na kopengwisa Baponami.

“Lokola Yane pe Yambele batelemelaki Mose, bongo pe bato yango na mapoli; makanisi mapolá na oyo etali Kondima.” Ezali te kondima “moke”. “Kondima mpenza!”

“Kondima moko, Nkolo moko, libatise mo- . . .” Bokoki kozala na “Kondima moko” te kozanga kondimela “Nkolo moko.” Bokoki kozala na libatise mibale te, pe ezali te moko mpo na Tata, pe Mwana, pe Molimo Mosantu. “Libatise moko,” Yesu Klisto. Ezali solo. Bomoni, libatise ya lokuta!

²⁵⁸ Botala, ntango bokozonga na ndako bokokanisa yango. Botala Matai 24:24, Yesu nde azali koloba; Polo, na Timote ya Mibale 3:8; na ebele misusu. Pe sikawa bókokanisa yango.

²⁵⁹ Pe na sima bókoma Likomi mosusu: Luka 17:30, Malaki 4.

“Lokola Yane pe Yambele batelemelaki Mose,” Liloba epakólami ya ntango oyo, “bato oyo pe bakosala bongo,” moto moko te, “bato,” bapokolami “bakotelemela Sóló.”

²⁶⁰ “Na mokolo mpenza oyo Mwana na moto akomonisama.” Emoniseli 10:1 kino 7, botanga yango ntango bokozonga na ndako, “Nsango ya Mwanje na nsambo, oyo efungoli Bilembo.” Ezali nini? Ezali te ete mwanje azali Mwana na moto; kasi motindami azali komonisa Mwana na moto. Bokoki kokesenisa yango sikawa? Wana nde esika ezali komonana makasi mingi mpo na bino, bomoni. Ezali te Mwana na moto, Ye moko; kasi mwanje na nsambo, motindami ya nsambo, nde azali komonisa Mwana na moto na miso na bato, mpo Yango ekabwani na mposa. Akoki kokómisa Yango ebongiseli te. Ezali Mbuma, Yango moko, lisusu.

“Pe na mokolo yango, Yane pe Yambele bakotelemela,” bapokolami (bandimi ya nkombo pe bazangi kondima, lingomba ya lolenge ya libanda pe ba-Pantekotiste) bakotelemela Mbuma ya solo, “kasi botika bango; bolema na bango ekomonisama polele, lokola ya bango emonisamaki.” Bomoni? Bososoli sikawa? [Losambo balobi: “Amen.”—N.D.E.]

²⁶¹ Emoniseli 10, elobaki: “Na mikolo ya koyula ya mwanje na nsambo.” Sikawa bomikanisela, ya nsambo, Eleko ya Lingomba ya Laodikia. “Koyula ya mwanje yango,” ntango eleko ya lingomba yango ekokóma denomination pe ekokóma eleko ya lingomba, ntango yango ekokota na ebongiseli na yango ya Pantekote; ntango motindami epai na . . .

Motindami moko moko azalaki nini? Martin Luther azalaki nini? Mpamela mpo na Bakatoliko. Wesley azalaki

nini? Mpamela mpo na ba-Lutherien. Pantekote ezalaki nini? Mpamela mpo na baoyo mosusu. Sikawa Bomoi ekei wapi? Mosika na ebongiseli. Mposo lisusu te; ezali Mbuma. Ezali nini? Mpamela mpo na ba-Pantekotiste, bomoni, mpo na kokokisa Likomi ya ntango oyo. Bomoni?

²⁶² Botala, bobele mokolo oyo motindami yango... Ezali te ntango abandi, kasi ntango abandi kosakola Nsango na ye. Bomoni? Pull ya Liboso, lobiko na nzoto; Pull ya Mibale, kosakola; Pull ya Misato, kofungwama ya Liloba, mabombami emonisami. Ya koleka ezali te, ezali na molongo mosusu te likolo koleka basakoli mpo na komonisa Liloba. Kasi lolenge bobele moko mosakoli akoki kotatolama ezali na nzela ya Liloba. Pe, bomikanisela: Pull ya Misato ezalaki kofungolama ya Bilembo Nsambo wana, mpo na komonisa Solo oyo ebombamaki pe ekangamaki na bilembo kati na Liloba. Bomoni yango? [Losambo balobi: "Amen."—N.D.E.]

Ezali na ntango yango, na mokolo yango nde likambo oyo esengeli kosalema, ete bamekoli, Yane pe Yambele, bakomonana lisusu. Bobele ndenge basalaki ntango Mose ayaki ná Liloba ya ebandeli, mpo na kosakola Yango; bamonanaki mpo na komekola Yango. Ezali bongo mpenza. Sikawa bomoni nini Matai 24:24 ezali? Bomoni, bapokolami!

²⁶³ Sikawa ezali na makambo misato oyo tokoloba liboso tosukisa. Yango oyo. Nalingi boyoka yango na bokebi nyonso liboso ya kosilisa. Makambo misato, bobosana te, makambo misato ekokisamaki. Makambo misato etiami liboso na bino sika-sikawa.

²⁶⁴ Ya liboso. Mokili ezali na lolenge ya Sodoma. Yesu alobaki ete ekosalema. Botala libebi; basi na biso bazali kosala makambo lokola mibali; mibali na biso bazali kosala makambo lokola basi, ba-éfémíné; bato bapolá, bato na mbindo, bato mabe, balatisami na milimo mabe, pe bayebi yango te. Biblia elobaki ete ekosalema, pe ekómi na esika yango.

²⁶⁵ Ya mibale. Ezali na ntango yango, kokokana na Likomi awa, nde Yane pe Yambele bakomonana. Ya mibale.

²⁶⁶ Ya misato. Ezali na ntango yango moko nde Mwana na moto asengeli komonisama.

²⁶⁷ Wana nde mondimi na bino, mondimi-ya-nkombo, pe mozángi-kondima na bino. Ezali na Liloba moko ya solosolo oyo emonisami polele, etatolami; ezali na mondimi-ya-nkombo oyo azali komekola Yango, pe ezali na mozangi-kondima oyo azali koboya likambo yango na mobimba.

Kasi Pole ekozala na ntango ya mpokwa,
Nzela ya Nkembo bokomona yango solo. (Ya solo?)

Bikolo ezali kopanzana, Yisalaele ezali
kolamuka,
Bilembo oyo Biblia na biso esakolaki;
Pe mikolo ya Mabota ekómi ya kotanga
(Sodoma), etondi na nsomo;
Bozonga, E bapalangani, epai na bino.
Mokolo na lisiko ebelemi,
Mitema na bato ezali kosenzwa na kobanga
oyo;
Bótondisama na Molimo na Nzambe, minda
na bino elengelama pe engengisama, (mpo
bokoka komona Liloba ya ntango.)
Bótombola miso, lisiko na bino ebelemi!
Basakoli ya lokuta bazali kokosa, (balobaki ete
bakozala awa; bapakolami), Solo na Nzambe
bazali kowangana yango,
Ete Klisto Yesu azali Nzambe na biso.

Elingi koloba, bandimaka Yango te. Biblia elobaki likambo
yango ekozala awa. Yango oyo!

Kasi tokolanda matámbe ya bantoma. (Pole
moko! “Pe kozongisa Kondima ya batata epai
na bana.”)

Mokolo na lisiko ebelemi, ebelemi mpenza,
Mitema na bato ezali kosenzwa na kobanga,
(mabelé ezali kozinda);

Oh, bótondisama na Molimo na Nzambe,
minda na bino elengelama pe engengisama.

Botombola miso, lisiko na bino ebelemi.

Bondimi yango? [Losambo balobi: “Amen.”—N.D.E.] Na
bongo, tógumba mitó.

²⁶⁸ Kuna, na ekólo esika Liteya oyo ekokende, longwa na
Libongo ya Esti kino na Westi, longwa na Californie kino na New
York, kokita na Sudi, komata kino na Nordi, kuna na bilanga
ya lotómo, pe bisika nyonso Yango ekokende, pe na mongombo
oyo. Tozali babola. Tozali na biloko ya kitoko ya minene minene
wana te, ná ba-émisió ya televisió. Tozali komeka kosala nyonso
oyo tokoki kosala. “Kasi baoyo nyonso oyo esili Tata kopesa na
Ngai, bakoya.”

²⁶⁹ Sikawa, nalingi ete boyeba ete likambo oyo ezali mpenza
bongo, na bino baoyo bozali kolanda bande oyo. Bokoki ntango
mosusu kokanisa lelo ete nazalaki komeka koloba likambo
yango na ntina na ngai moko, wana ezalaki ngai koteya Liteya
oyo. Nazali na likambo ata moko te ná Yango, nazali bobele
mongongo, eloko mosusu te. Pe, mongongo na ngai, ata naboi
likambo yango ndenge nini ngai moko; mposa na ngai ezalaká
ya kozala moto ya bokila. Kasi ezali mokano ya Tata na ngai nde
nasángeli kosala yango, pe nakani kosala yango.

Nazali te Ye oyo amonanaki kuna na ebale; natelemaki bobele wana ntango Ye amonanaki. Nazali te Ye oyo asalaka makambo oyo pe asakolaka makambo oyo esalemaka na ndenge yango ebongi be; nazali bobele oyo azalaka pene ntango Ye asalaka yango. Nazalaki bobele mongongo oyo Ye asalelaki, mpo na koloba Yango. Ezalaki te oyo ngai nayebaki; ezali bobele na oyo ngai namitikaki na yango, nde Ye alobaki na nzela na yango. Ezali ngai te, ezalaki mwanje na nsambo te, oh, te; ezalaki komonisama polele ya Mwana na moto. Ezalaki mwanje te, nsango na ye; ezalaki libombami oyo Nzambe afungolaki. Ezali moto te; ezali Nzambe. Mwanje azalaki Mwana na moto te; azalaki motindami kouta na Mwana na moto. Mwana na moto azali Klisto; ezali Ye nde oyo bino bozali kolia. Bozali kolia uta na moto te; moto, maloba na ye ekokweya. Kasi bozali kolia Nzoto-Liloba ya Mwana na moto oyo ekweisamaka te.

²⁷⁰ Soki boleisami na mobimba ya Liloba nyonso te, mpo na kopesa bino makasi ya kopumbwa likolo ya ba-denomination nyonso oyo pe makambo ya mokili, bolingi kosala yango sikawa, wana tozali kobondela?

²⁷¹ Tata Molingami, oyo ezali likambo moko makasi. Ezali pete te mpo na mokufi kosala yango. Yo oyebi makambo nyonso. Pe nabondeli Yo, Nzambe molingami, ete makambo oyo ésosolama mabe te. Kasi tika bato bakoka kotambola na Pole ya Liloba na Yo.

²⁷² Pe, Tata Nzambe, nayebi te nani azali Moponami; Yo nde oyebi. Nayebi ntango ya Boyei na Yo te. Kasi nayebi bobele ete Yo olobaki ntango likambo oyo ekosalema, bapakolami ya lokuta oyo; na ntango oyo babandaki mpenza te.

Mose atikaki bango básala, mpo akokaki kosala eloko mosusu koleka te. Akokaki koloba bobele oyo Yo ozalaki koloba. Olobaki na ye abengisa ba-nzinzi; na sima bango pe babengisaki yango. Olobaki na ye abongola mai ekóma makila; na sima bango pe basalaki yango. Mose atosaki bobele kotosa, Liloba na Liloba, ndenge Olobaki, kasi na sima, Yo nde omonisaki bolema polele.

²⁷³ Sikawa, Tata, Yo ozali Nzambe, ata bongo. Liloba yango moko elobaki ete likambo yango ekosalema na mikolo ya suka. Bato mingi ya sembo, ndenge tolobaki yango lomingo eleki, baoyo batiaki maboko na bango na Sanduku oyo ezalaki likolo ya likalo ya sika, kasi na mapeka ya Balewi te, bakweyaki pe bakufaki, “bakufaki na masumu pe na bikweli,” kotelemela lisosoli na bango moko.

²⁷⁴ Batei mingi, bafandi na ba-biró na bango, bákotanga Liloba yango, pe bákolekisa lokasa na lombangu; kobanga kozua mokano, na koyeba ete akoki kobungisa esika ya lokumu na ye ná bato, ná lingomba na ye pe denomination na ye. Nzambe, sunga biso tósala yango ata moke te!

²⁷⁵ Petola mitema na biso, Nkolo, na mbindo nyonso ya mokili. Nkolo, nabelemi mpo na kopetolama. Nabelemi, elongo na lingomba oyo pe baoyo nyonso bazali kolanda pe moto nyonso akoyoka bande oyo. Natelemi, Nkolo, mpo násenga kopetolama. Nkolo, mema ngai na ndako ya moyemi mbeki pe buka ngai, bongola ngai nakóma mosali oyo Yo olingi.

Mpo ete, Nkolo Yesu: “Nazali moto na bibebu na mbindo,” ndenge Yisaya agángaki, “nazali kofanda elongo na bato na bibebu na mbindo; pe mawa na ngai, mpo ete namoni emoniseli ya Nzambe etalisami polele,” ndenge Yisaya amonaki Banje kati na Tempelo. Namoni ntango ya suka, Nkolo, pe mawa na ngai ná libota na ngai; mawa na ngai pe bato na ngai. O Yawe Nzambe, yokela biso mawa. Nazali kosenga mpo na ngai moko ná bato. Kotika te ete tokufa elongo na baoyo bazangi kondima, kasi tika ete tobika elongo na bandimi.

²⁷⁶ Denomination nyonso, Nkolo, mobali to mwasi nyonso. . . Nakoki kosenga te ete Yo ópambola denomination, na ntango ngai nayebi ete Otelemelaka yango. Kasi nakoki bobele koloba, Nkolo, soki Ozali na moko na bampate na Yo kati na bango, tika ete bayoka bande oyo. Tika ete bayoka Yango, Nkolo, pe básosola Yango na lisosoli oyo Okopesa bango, pe tika ete bábima kuna pe báyamba Yo. Tika ete bango bapengwisama te na kokufa miso pe momesano ya eleko oyo. Tika ete bango bameka kolia te eloko moko oyo ezalaki ebembe ya eleko mosusu. Tika ete bakamata Liloba.

Na lolenge wana nde Bafalisai babakaki Yo na ekulusu, Nkolo. Bazalaki kozua ebembe ya ntango na Mose, pe balukaki komisepelisa na yango; sima na Yo kotalisa elilingi, na biliki, ya mana ya sika mpokwa moko na moko, kotalisáká eleko moko moko. Kuna nde esika oyo bakweyaki. Ekotiselaki bango mbondo. Ebomaki bango, kolia bilei wana oyo esili kopola.

Pe, na ndenge ya molimo, ezali kosala likambo yango moko lelo; koboma bango, na ndenge ya molimo, na nzela ya denomination.

Sunga biso, Nzambe molingami. Nyonso ezali sikawa na maboko na Yo. Na Nkombo na Yesu Klisto.

²⁷⁷ Wana togumbi mitó, tokoyemba yango ntango bozali kozua mokano na bino. Bokokende kino na suka?

Nazali koyoka Mobiki-. . . (pe Ye azali Liloba). . . -si na ngai, kobenga, nazali koyoka. . .

“Oh, nateleanganaki ntango molai, kasi, sikawa, ya solo, nayoki Ye, ‘Boya epai na Ngai, bino nyonso oyo bozali kotatabana na nzela.’ Koyoka, ‘Kamata ekulusu na yo, bila Ngai mokolo na mokolo.’ ‘Ata natamboli na libulu ya molili ya kufa, nakobanga mabe te; kuna na matiti mobesu, pe pene na mai na kimia.”

Pe epai Azali kokamba ngai na . . .

“Nkolo, namoni bolema ya ba-trinitaire. Namoni ete mokili mobimba elonaki kati na yango; matiti mabe ezali kobota bisika nyonso. Kasi esika Okokamba ngai sikawa, Nkolo, nakozala lokola baoyo ya Misala 19. ‘Ntango bayokaki Yango, babatisamaki lisusu na Nkombo na Yesu Klisto.’”

. . . kolanda, (“Nasali ndambo ya nzela, Nkolo,
ekoki mpenza mpo na koyamba Yo.”)
Sikawa nakolanda Ye kino na suka.

[Ndeko Branham abandi koyemba na nse ya mongongo *Esika Akokamba Ngai*—N.D.E.]

²⁷⁸ Nzambe Molingami, nandimi sóló ete yango euti na motema na ngai. Nandimi sóló ete euti na mitema na baoyo nyonso bazali koyemba na ngonga oyo, ntango mosusu, mingi bakoyoka bande oyo, baoyo bazali awa te to baoyo bazali koyoka yango sikawa te. Tika ete tobelema, Nkolo, ata ekosenga kofuta soko nini. Olobaki: “Lokola moto oyo azali kokende kokutana na mampinga mosusu, soda moko, mokonzi moko; liboso, akofanda pe akotala, soki azali na makoki ya kosala yango, soki akoki kotika makambo ya mokili? Okoki kotika yango, pe kosangana na mampinga ya Liloba na Nzambe oyo ekomami; okoki kotambola elongo na basoda na Ye, kopimbwa elongo na bampongo na Ye?” Kokisa yango, Nkolo, na Nkombo na Yesu.

²⁷⁹ Bondimi? Boyambi Ye? Malamu. Tokomona bino awa, lisusu, na mpokwa oyo, soki Nkolo alingi. Bondimi yango ete ezali Sóló? [Losambo balobi: “Amen.”—N.D.E.] Ezali polele mpenza? [“Amen.”]

Bongo mema Nkombo na Yesu elongo na yo,
Mwana na mawa pe bolozi;
Ekopesa yo esengo pe kobondisama
Mema yango bisika- . . .

Sikawa, pesa mbote na moto oyo azali pembeni na yo,
sikawa.

Nkombo kitoko, O ya boboto!
Elikia ya mokili pe esengo ya Lola;
Nkombo kitoko, O ya boboto!
Elikia ya mokili pe esengo ya lola.

Tokogumbamela Nkombo na Yesu,
Tokofukama na makolo na Ye,
Na Lola, motole ya Mokonzi na bakonzi
tokolatisa . . . (na bongo, Azali Nzambe)
Ntango mobembo na biso ekosila.

Nkombo kitoko, Nkombo kitoko, O ya boboto!
 O ya boboto!
 Elikia ya mokili pe esengo ya Lola;
 Nkombo kitoko, O ya boboto!
 Elikia ya mokili pe esengo ya Lola.

²⁸⁰ Nakanisi ete batei nyonso balakisamaki na ntongo oyo, pe napesaki bango nyonso mbote.

Ntango moto abondeli mposo mobimba, komituna mituna, komona Makomi oyo, komona yango polele na miso na yo. “Mawa na ngai,” elobaki Polo, “soki natei Nsango Malamu te.” Na suka ya mobembo na ye, alobaki: “Nabombaki eloko moko te, nayebisaki bino Toli mobimba ya Nzambe, ndenge Epesamelaki ngai.”

²⁸¹ Ntango mosusu nabosanaka koloba makambo, kolakisa bato, kopambola bana.

Billy alobaki, mokolo mosusu, mobali moko ayaki, alobaki: “Nazalaki koya awa ekoki mbula mibale, mpo mwana na ngai abulisama.”

Billy alobaki: “Kokanisa mabe mpo na yango te. Nazali na mwana na ngai, ya mbula moko, pe naino abulisami pe te. Bongo nakozela kino akokóma mwa mokolo mpo akende kuna ye moko, nakanisi.”

²⁸² Bongo tomoni, ndeko mobali, ndeko mwasi, ezali te—ezali te, bomoni, ngai. . . Likambo moko, tosengeli kobulisa bana na biso.

Tosengeli kobatisa moto nyonso. Ebatiselo ezali; mai yango oyo. Soki naino obatisamá te, nini epekisi yo? Mai yango oyo. Yaka sikawa. Kozela kino na mpokwa te; yaka sikawa. Ezali na bato awa mpo na kobatisa moto nyonso oyo abongoli motema pe ayamboli masumu. Ata obatisama mbala zomi na mibale, bakobatisa yo na Nkombo na Yesu Klisto mpo na bolimbisi ya masumu. Bomoni? Tozali yango.

²⁸³ Kasi, bomoni, Nsango ezali na motema na ngai. Nasengeli kosakola Yango. Yango ezali ntina se moko na ngai, etali te oyo mwasi na ngai alobi, oyo bana na ngai balobi, oyo mokengeli na ngai alobi, oyo moto songolo na ngai alobi. Ezali Nkolo na ngai. Nasengeli kosakola Yango. Yango ezali ntina se moko na ngai.

²⁸⁴ Pe sikawa, mbala mingi, nabosanaka kotalisa batei. Nakanisi ntango mosusu. . . ndeko na biso, Ndeko Neville, ndeko moko ya motuya. Bandeko mosusu oyo bazali awa, tozali na esengo ya kozala na bino.

²⁸⁵ Ezali te ete tozangi koyokana na bino, ndeko, mpo na kozala na bokeseni. Mingi kati na bino awa bokoki kozala batei ya ba-trinitaire. Tolingi kokangela bino kanda te. Tolingi bino. Soki te, soki nandimaki yango te, nakokaki kobima na losambo oyo te liboso na ngai kofukama pe koloba: “Nzambe, sembola ngai.”

Nalingi te molimo ya lolendo pe ya moyimi esangana ná oyo ya ngai. Nalingi ete molimo na ngai ézala peto pe pembe, na bolingo ya bandeko, bulee na Molimo Mosantu. Sikawa, soki moto moko asaleli ngai mabe, ezali na yango likambo te. Pe ata nakoki kozala na makoki ya kozongisela bango mabe, naboyi likambo wana na bomoi na ngai. Te, na—nalingi kozala na bolingo. Nalingi kobeleva mpo na kosembola na bolingo, na bolingo, yango nde ekoyanola na makambo nyonso, na ngambo mosusu.

²⁸⁶ Naboyi kozala na bokeseni. Ozala Metodiste, Baptiste, Katoliko, Presbiterien, to moto nani, nalobi makambo oyo te mpo na kokesene na bino to kozala na lolendo liboso na bino. Soki nasalaki bongo, nazali mokosi pe nasengeli kofukama awa na etumbelo, kobondela kino Nzambe áyanola.

Kasi soki nalobi yango, ezali mpo na bolingo, pe namoni esika bozali kokende. Sikawa, nalobi likambo oyo na ndenge na ngai moko te, pe nalobi yango na kobanza-banza te. Napesi bino YANGO ELOBI NKOLO. Yango ezali Sóló. Pe nalingi bino mpo na makambo yango. Nzambe apambola bino

²⁸⁷ Sikawa, wana ezali biso koyemba eteni mosusu ya nzembo oyo, toyemba, liboso tokende. Tosengi na bino ete bozala lisusu awa na mpokwa, soki bokokoka. Soki bokokoka te, Nzambe azala na bino kino tokokutana. Tozali kobondela ete Nzambe apa—apambola bino pe apesa bino oyo eleki malamau na mboka na Ye, bomoni.

Mema Nkombo na Yesu . . .



BAPAKOLAMI NA NTANGO YA SUKA LIN65-0725M
(The Anointed Ones At The End Time)

Liteya ya Ndeko William Marrion Branham oyo, eteyamaki liboso na Anglais na mokolo mwa lomingo na ntongo, mokolo mwa 25, sanza ya sambo, na mobu 1965, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org